


ناهد الشافعي

من الأدب الساخر

طيار طار حلمه

من يوميات مدير



مكتبة مدبولي

طيار طار حلمه
من يوميات مدير

الشافعي ، ناهد .

طيار طار حلمه .. من يوميات مدير - من الأدب الساخر /
ناهد الشافعي . ط ١ . - القاهرة : مكتبة مدبولي ، ٢٠١١ م .
٢٧٢ ص ؛ ١٤.٥ x ٢١.٥ سم .

تدمك : 5 - 897 - 208 - 977

١ - الأدب العربي الهزلي
أ - العنوان .

ديوى ٨١٠.٨٠٣

رقم الإيداع : ٢٢٤٠٨ - ٢٠١٠ م

مكتبة مدبولي

٦ ميدان طلعت حرب - القاهرة

ت : ٢٥٧٥٦٤٢١ - فاكس : ٢٥٧٥٢٨٥٤

الموقع الإلكتروني : www.madboulybooks.com

البريد الإلكتروني : Info@madboulybooks.com

الإخراج الداخلي : مكتب النصر - تليفون : ١١٤١٠١٣٣٢

الآراء الواردة في هذا الكتاب تعبر
عن وجهة نظر المؤلف ولا تعبر
بالضرورة عن وجهة نظر الناشر .

من الأدب الساخر

طيار طار حلمه

من يوميات مدير

ناهد الشافعي

الناشر

مكتبة مدبولي

2011

إهداء

إلى عادل..

أهم مدير في حياتي.. ومصدر إلهام هذه اليوميات

تقديم

غزل عفيف في الكاتبة والمكتوب

إبراهيم عيسى

مصرية جدا ناهد الشافعى

كونها ناهد مبدئيًا فهذا مصرى للغاية حيث تشهد مصر موجات من
أسماء البنات فى كل حقبة زمنية لتعبر عن روح وهوى وتفكير المجتمع
وقتها ، فكما سيطرت ناهد ومنى على أجواء الخمسينات والستينات فقد
ظهرت مثلاً شياء وإسلام وإيمان فى السبعينات مشياً وتماشياً مع المد
الإسلامى وقد اجتاحت مصر اسم مريم للبنات فى التسعينات ثم ها هى
تظهر أسماء خديجة وعائشة الآن كأسماء عصر مضى وحنين لقصور
الثلاثينات وليس سعيًا للتمثل بالصحابيات ، إذن بمجرد ما تسمع اسم
ناهد تشعر أن عبد الحليم حافظ يغنى ، وأن مدرسة السنية بنات كسبت فى
أوائل الطلبة ، وأن جمال عبد الناصر راجع من مؤتمر دول عدم الانحياز
بكرة الصبح .. فى هذا الاسم شئ من مصر الجميلة البعيدة !

ناهد الشافعى سيدة مصرية بامتياز

فالمرأة المصرية أستاذة ومعلمة وعالة فى فن الالتقاط والاستشعار عن
بعد ، تدخل حفلة أو محفل فتستطيع تبعد دقائق أن تدرك من يجب من ؟
ومن يعاكس من ؟ ومن ناوى يخطب من ؟ ومن سيطلق من ؟ وتركن على
أذنك وتقولك : باين فاتن متخانة مع سعاد ، أو تنبهك كلم محمد كويس

لأنه شاييل منك أو شفت، السفرة فيها ملاعق مختلفة دليل على أنهم استلفوا الملاعق من الجيران أو أنه السقف لسه متبيض أو الطقم ده جديد ، وعشرات التفاصيل تدخل هذا العقل النسوى المصرى بسرعة خاطفة ويتم برمجتها فى حاسوب آلى ساكن فى بدروم المخيخ ، المرأة المصرية قمر طبيعى وقمر صناعى ، أما الطبيعى فأنت وذوقك الممتد من سعاد حسنى إلى هند رستم ، أما الصناعى فهو المكون من آلاف اللآلياف البصرية التى تقدر على رصد ومتابعة التفاصيل فإذا كانت هذه المرأة فنانة موهوبة هذه الموهبة الرائعة والناهدة مثل ناهد الشافعى فإنها تقدم مثل هذا الكتاب المتفرد وسأقول ليه متفرد لكن بعد شوية !

فى العالم كله هناك مشكلة عائلية كبيرة وهى الخرس الزوجى ، وكيف أن زوجين لا يلتقيان فيتحاوران ، تصاب البيوت بالخرس الزوجى بالضرورة وبالفعل !

لكن هذا فى العالم كله ، أما فى مصر فإن هذه المشكلة تتغير ويضاف عليها هذا الطابع المصرى والخصوصية المصرية حماها الله فيتحول الخرس الزوجى إلى صمم زوجى فالحقيقة المؤكدة أن الزوجة المصرية لا تتوقف عن الكلام ولا عن الحوار ، مع نفسها ويقولون ساعتها أنها اتجننت أو مع الشغالات فنقول لحظتها إنها ستجن وتقتل الشغالة أو مع أطفالها ونقول ساعتها أن الأطفال سيصابون بالجنون قطعاً ، أو مع جيرانها أو زميلاتهن فى الشغل أو مع زميلاتهن من راكبات الميكروباص أو سواق التاكسى حيث يحتدم الحوار حول ما يشغله فى الكاسيت وينتهى بقيمة الأجرة ، وهى تحاور طبعاً زوجها طوال الوقت صحيح أنه لا يسمع لكن هذا لا يمنع ، لا يمنع

مواصلتها الحوار بل وتصعيده وتنويعه وترويعه كذلك ، الزوج أصم لكن الزوجة تتجاهل هذا العيب الخلقى وتركز على ملامحه وهى تتحدث وعلى قسماته وهى تتحاور وتعتبره لاعب بانتونيم فائق الحرفة والخبرة .

فإذا كانت الزوجة المصرية الكلامية والمتكلمة المنطلقة والمتحاور المطلوقة ، مثقفة هذه الثقافة الواسعة وتملك تلك المعرفة الإنسانية المتسعة والمتنوعة والقدرة على التأمل العميق والتدبر فى شئون وشجون محيطها مثل ناهد الشافعى فإنها تقدم مثل هذا الكاتب المنفرد وسأقول ليه منفرد بعد شوية .

الرجل أكثر تهكماً من المرأة ، ربما تكون هذه الحملة دقيقة بقدر ما أعرف ، لكن تهكم المرأة وسخريتها ربنا ما يوريك ! التهكم النسائى الذى يتجلى فى طبخة زوجة على ظهر زوجها فى لحظة خصوصية لم يكن قدها وتقول له بابتسامة ناعمة وعيون ناعسة :

- أعملك كوباية لبن .

هذا التهكم الفطرى العدوانى الجارح يشكل جينات السخرية عند المرأة المصرية لكن مع ذلك فالكتابة الساخرة فى مصر كما فن الكوميديا أيضاً لا يتمتع ببطلات كثيرات ، على أصابع اليد الواحدة يمكن أن تعد فنانات الكوميديا فى مصر سواء فى مجال التمثيل أو الرسم الكاريكاتيرى أو الكتابة المسرحية ، أما الكتابة الصحفية الساخرة فالتاريخ الصحفى ليس كريئاً معنا فى التقديم كاتبات اتصفن أو منحن يوماً لقب كاتبة ساخرة !

هل لأن المرأة في مصر كانت أقل جرأة وأكثر جدية ، أو أنها كانت تحارب لإثبات أنها مثل الرجل فقررت ألا تضيع وقتها في الهزار !
ربما .

لكن في السنوات الأخيرة يمكن أن ألمس اقتحامًا بالمعنى الفنى (والأمنى ..
ليه لأ) للمرأة حقل ألغام الكتابة الساخرة .

من بين هذه الأسماء النادرة أضع ناهد الشافعى بهذا الكاتب فى منتصف
الدائرة ، فالكتاب ساخر من هذه النوعية الحقيقية الأصلية للسخرية ، جاد
جداً لدرجة تثير الضحك ومضحك جداً لدرجة تبعث على الألم ، وواقعى
بطريقة خيالية ودره من درر الخيال العلمى حين يقرر - الكاتب - أن يجد
حلولاً للواقع المصرى المستعصى على الحل !

هذه بعض من أسباب أنه كتاب متفرد ومنفرد .

لكن السبب الأهم لتفرد ما كتبه ناهد الشافعى ولانفراد إبداع هذه
الصحفية المبدعة والكاتبة الرشيقه الراشقة أن هذا الكتاب كتاب عن زوجة
تحب زوجها وتحاور زوجها تنطق سطور الكتاب بالشغب وبالشغف ،
بالمناوشة والمناقشة ، فى الصد والرد ، فى الشد والجذب ، فى المناكفة والمناهدة ،
فى أجمل وأصدق وأطرف حوارات زوجية فى تاريخ الكتابة ، ناهد الشافعى
ليست كاتبة مدهشة ومتألقة فقط بل كذلك زوجة فريدة ونادرة ، زوجة
مصرية سعيدة .. يا للغرابة !

المقدمة

كان يوما مختلفا من أيام شهر مايو منذ عامين، ولكنه أصبح فيما بعد يشبه أياما كثيرة جاءت بعده.. يوما قررت فيه الحكومة أن تزف إلينا خبرا سارا.. سعدنا بالخبر، ولكنها سعادة يشوبها الحذر والتوجس.. فحكومتنا تسعى منذ عدة أعوام سعيًا حثيثًا في إجراءات نقل كل شيء إلى كائن غريب عنا اسمه القطاع الخاص، ورأينا بأعيننا أثاث المنزل يباع في مزاد تلو مزاد، تمهيدا لخروجنا معه إلى الشارع.. فماذا حدث؟!

في هذا اليوم أعلنت حكومتنا أنها سترحمنا من الغلاء بعلاوة هي الأكبر في تاريخ العلاوات الحكومية (٣٠٪).. فرحنا، وقلنا ربما رق قلب حكومتنا علينا، وربما لا، ولم نستطع إلا الدعاء "اللهم اجعله خير" ..

وبالفعل تحققت مخاوفنا، وفهمنا حالة الحذر والتوجس التي أصابتنا.. حكومتنا "الذكية" قررت أن تموّل الغلاء من موارد حقيقية، هي حصيلة رفع أسعار مجموعة من السلع الأساسية، ومنها البنزين.. فكانت المفارقة أن الحكومة تواجه إرتفاع الأسعار بعلاوة تأتي حصيلتها من رفع الأسعار!!
منتهى الذكاء!!

جلست وزوجي نفكر كيف ندبر أمور المعيشة بعد هذه الحزمة من القرارات التي أتت على البقية الباقية من الأمل في حياة لائقة بعد مشوار طويل من العمل.. وأظن أن غيرنا كثيرين فعلوا مثلنا.. وقفزت فكرة رصد هذه المناقشت ومحاولات تدبير الأحوال.. ولم أجد إلا المدير كرمز لهذه

الطبقة المنكوبة، التي يسمونها تجاوزا "وسطى"، ربما لأنها مشدودة إلى أعلى بفعل الرغبة في حصد ثمرة الكفاح والصبر على مشقة الحياة أو حتى بفعل التطور الطبيعي والمنطقي لسنين العمر.. بينما القرارات الحكومية والمسؤولين عن رسم سياسات الدولة تأبى إلا أن تجذبها إلى أسفل مع المعدمين والكسالى، وما هم بكسالى، ولكن ما بيدهم حيلة..

هكذا بدأت الفكرة، وكانت المشكلة التي واجهتني وجعلتني أتردد كثيرا هي الكتابة بالعامية، فهل يصح أن أكتب موضوعاتي الصحفية في مجلة صباح الخير بالعامية؟! ولكن طبيعة التناول التي فرضت أن تأتي اليوميات في صورة حوارات طرفها الأول - دائما - هو المدير، وطرفها الثاني - في معظم الأيام - هي زوجته.. جعلت استخدام العامية ضرورة لا بد منها حتى تخرج اليوميات في صورة أقرب إلى الحقيقة

ولكن استمرارها يعود الفضل فيه إلى كثيرين، في مقدمتهم أعضاء حكومتنا الرشيدة والذكية التي لفرط ذكائها تمدني كل يوم بهادة جديدة من المفارقات التي تثرى الحوار تلو الآخر.. بعد ذلك يأتي التشجيع على الاستمرار من زملائي وأصدقائي، وأولهم الأخ الزميل الأستاذ رشاد كامل، الذي لولاه ربما ما رأت هذه اليوميات النور على صفحات مجلة صباح الخير ولا بين دفتي هذا الكتاب

لا يسعني في النهاية ألا أن أشكر الصديقات والأصدقاء الذين أعانوني على كسلي حتى أجمع هذه اليوميات وأحبسها في هذا الكتاب بكل ما لديهم من طاقة على المساعدة..

وأعتذر لما حملته هذه اليوميات من أوجاع وآلام جعلت إحدى صديقاتي تلومني لأنني طلبت منها مساعدتي في اختيار ما يصلح من الحلقات للكتاب، فاتهمتني بأنني أعطيتها جرعة مكثفة من الكآبة، فما كنت تدرك أننا كمصريين نتحمل كل هذه الضغوط ونتجرعها مرارة كل صباح مع فنجان القهوة السادة..

فإذا وجدت - عزيزي القارئ - في هذه اليوميات ما يسوءك ويعكر صفوك، فسامحني.. وإذا وجدت فيها ما يضحكك، فسامح الحكومة.. إن استطعت..

الميكروباص!!

اليوم الأول

- ميكروباص!! إنتى بتكلمى جد؟!!
- أيوة
- مش قادر أصدق
- وفيها إيه لما تركب الميكروباص؟
- وإفرضى إن حد فى الشغل شافنى وأنا نازل منه، حيبقى شكلى وحش قوى
- ولا وحش ولا حاجة.. وعموما إبقى إنزل قبل الشغل بشوية
- ده أنا كل يوم وأنا بأركن العربية بأشوف إبراهيم الساعى نازل من الميكروباص، لو شافنى حيقول إيه؟
- يا سيدى كلنا ولاد تسعة، ما أنا كمان حأركب الميكروباص وأنا رايحة شغلى
- وإنتى فاكدة إنك كده بتخففى عنى!! بالعكس إنتى بتدبحينى.. هو الواحد بيكبر ولا بيصغر؟! أنا دلوقتى مدير وإنتى رئيسة قسم
- بلاش تبص للموضوع من الناحية دى، بص إزاى حنوفر
- يعنى بعد ما ربنا أكرمنا وبقي عندى عربية، أركب ميكروباص!!
- لو فضلنا نركب العربية توصلنى الأول وبعدين تروح على شغلك
- حنصرف عالبنزين لوحده - بعد الزيادة - مش أقل من تلتमित جنيه،
- يعنى أكثر من قبل كده ميت جنيه

- بس بنوصل شغلنا بكرامتنا، لما نركب ميكروباص حنتبهدل
- ليه بتفترض حاجة ممكن ماتحصلش !!
- كل الناس اللى بيركبوا ميكروباصات بيشتكوا، وفي الآخر مش حنوفر كثير
- مين قالك كده !! لما نركب الميكروباص كل واحد فينا حيدفع خمسين قرش رايح وخمسين قرش راجع .. يعنى لما نشيل أيام الأجازات يبقى أنا وإننت حوالى خمسين جنيه فى الشهر
- ده كان الأول .. إنتى ماعرفتيش إن الميكروباص كمان أجرته زادت بعد السولار ما سعره ارتفع، يعنى أنا وأنتى مش أقل من سبعين جنيه ويمكن أكثر
- ياخبر !! معلش زى بعضه، نقول سبعين، ونحط بنزين للعربية بميت جنيه للمشاور المهمة ومهما حصل مانزودش أكثر من كده .. يبقى وفرنا مبلغ مش بطل
- اللى معذبني إن الواحد بيشتغل عشان يرفع مستواه، أنا وإننتى اتبهدلنا زمان فى المواصلات .. كنا صغيرين، اشتغلنا وتعبنا وكبرنا .. أقوم بعد ما قربت أطلع معاش أرجع للبهدة تانى؟!!
- خلاص، ماتوجعش قلبى أكثر ماهو موجدوع وأهو الميكروباص أرحم من الأتوبيس .. وإننت عارف الفلوس دى حنعمل بيها إيه، خلى السواد ياخذ الدرس .. الإمتحانات قربت
- أنا مش رافض الدرس عشان الفلوس وقلت له الكلام ده، لازم يذاكر كويس، دى مسألة مبدأ

— الولد مش معانا دلوقتي، وانت عارف إنه بيدكر ومتفوق ودايا يطلع الأول، والمادة دي بالذات ممكن تأخر ترتيبه.. أنا فاهمك كويس

▪ طب ماتفكرى فى حاجة غير حكاية الميكروबाص دي

— بلاش تنشيف الدماغ ده، جرب الأول

▪ ماشى ياستى

— أهو كده

▪ طب صبحنى بكرة بدرى ساعة، ماحدثش عارف الظروف

— حاضر، ربنا يهديك

▪ أما أشوف آخرتها معاكى إنتى وأفكارك

— ومكافأة لىك حأعمل لك طبق الرز بلبن الى بتحبه

▪ خليها مهلبية أحسن الرز غلى قوى

اليوم الثاني

▪ إتاخرتى قوى

— مالك ؟

▪ إنتى الى مالك ؟

— عندى صداع.. عملت إيه فى الشغل ؟

▪ إنتى قصدك تسألى عالميكروباص، أنا فاهم.. الصبح إتحانقت أكثر من

مرة.. لكن وأنا راجع عدت من غير مشاكل

— ركبت كام مرة؟

▪ هو إنتى استسلمتى ؟ أنا رفضت.. هي مرة واحدة بس.. لما السواق

قال كله ينزل كنت مش فاهم حاجة، قلت له ليه إنت لسه آخرك

ما جاش .. كلمة منه وكلمة منى، الناس إتدخلت .. الى نزل نزل واللى
قعد قال حندفع مرتين .. والسواق قال أنا غلبان والسولار زاد ولازم
أجيب الفرق .. قلت له إنت رفعت الأجرة عشان الزيادة وواحد خمسة
وسبعين قرش بدل خمسين، الى جنبى قالى باين عليك جديد ..

— إستنى بس .. أنا مش فاهمة .. يعنى كان ممكن ما أنزلش وأدفع الأجرة
مرتين!! ياريتنى كنت أعرف .. ده أنا وقفت أستنى ميكروياص تانى لما
الشمس أكلت دماغى، وفى الآخر جيت "مشى"
■ يا خبر!! ليه!! كتنى قاومتى شوية

— السواق قال لواحد من الركاب : الحكومة زودت سعر السولار عشان
تاخذ منى تديلك العلاوة، الراجل إتجنن ورد : أنا مش شحات، أنا
بأشتغل ومش مستنى حسنة من حد .. الناس كلها الى فى الميكروياص
إتدخلت وكانوا بيتكلموا كلهم فى نفس الوقت وما حدش سامع
التانى .. راسى كانت حتنفجر، وفجأة الراجل الموظف عيط وقعد
يحلف بالله العظيم إنه ما حدش من السواق حاجة حتي العلاوة لسه ما
قبضهاش، والناس تحايل فيه .. أول ما السواق قال إنزلوا نزلت، بس
مش فاهمة نزلنا ليه!!

■ السواقين دلوقتى قسموا المسافة، يعنى المشوار الى كان بخمسين قرش
بقى بخمسة وسبعين، وبعدين فى نص المسافة يقول ده آخر طريقى
عشان ناس تانية تركب وتدفع، وفيه سواقين قسموا المسافة ثلاث
مرات كمان

- منهم لله .. مش حرام عليهم؟!!
- أنا لما رفضت أنزل، السواق ابتدى يتكلم معايا، أصلي كنت قاعد جنبه .. علي فكرة دى ميزة كبيرة قوى
- إيه دى؟
- إن الواحد يلحق ويقعد جنب السواق، الناس ورا كانت حتموت من الخنقة، أصل الكنية تكفى إثنين ويقعد عليها ثلاثة، واللى ورا خالص بيعد عليها خمسة مع إنها ماتكفيش إلا ثلاثة
- عارفة .. ما أنا كنت قاعدة عليها، روحى كانت حتطلع
- ماعلينا، الراجل لما إتكلّم معايا لقيته غلبان، عنده عيال، والميكروباص مش بتاعه وبيضطر يدفع لناس كتير عشان يسيبوه فى حاله
- ناس مين دول
- مش مهم مين، المهم إن كلنا غلابة، المفروض نستحمل بعض .. والله صعب عليا قوى وإديته الجنيه ونص
- إنت بتقول إيه؟!! يعنى ثلاثة جنيه كل يوم، يعنى أكثر من ستين جنيه فى الشهر لو حدك!! أومال حنوفر إيه!!
- لأ ماهو وأنا راجع السواق كان ابن حلال، خد مرة واحدة بس
- بص بقى .. الولد لازم يذاكر، يسيبه من حكاية الدرس دى .. هو أنا وإنت عمرنا خدنا دروس، إنت كان عندك حق لازم يكون فيه مبدأ
- إنتى حتستسلمى من الأول!! تعالى نكمل الشهر ونشوف .. وقبل مانام نقعد مع بعض نحاول نلاقى إجراءات تانية ممكن نوفر بيها فى الميزانية

طيار طار طاه .. طيار طار طاه .. طيار طار طاه ..

— خلىنا لبكرة.. النهاردة أنا تعبانة قوى، مش حأعرف أفكر

■ أنا حاسس إن ربنا حيكر منا إنشاء الله

— يا رب

■ قومى هاتى المهلبية

— غريبة قوى، مالك فرحان كده ليه؟

■ عادى

— لأ، مش عادى.. فيه حاجة، قول فيه إيه

■ أصل وأنا نازل من الميكروباص لقيت إبراهيم الساعى جاى الشغل فى
الأتوبيس

٢٠ مايو ٢٠٠٨

بطاقة التموين!!

اليوم الأول

- تعالى دورى معايا
- إيه اللى إنت عامله ده؟! إيه الورق ده كله؟!
- فين البطاقة؟ هو إحنا كلى، ولا جزئى؟
- نعم!!!
- البطاقة.. إنتى مش فاكدة هى كانت خضرا ولا حمرا؟
- مالك بس!! تعبان من حاجة؟ أعمل لك ليمون بالنعناع يهدى أعصابك؟
- لأ مش عاوز، أنا عاوز بطاقة التموين القديمة عشان أجدها وأضيف الولاد، لسه اجراءات كتير.. لازم أطلع شهادات ميلاد اليكترونية، وأصور كل الأوراق بتاعتنا، المشوار طويل
- إيه بس اللى فكرك ببطاقة التموين دلوقتى؟!
- إنتى مش عايشة فى البلد.. قلت لك لازم تقرى الجرايد أو تشوفى برامج التليفزيون
- قرئت وشفّت
- طيب، مستغربة ليه بقى؟
- أنا بأسأل بس، عاوزة أفهم إيه اللى فى دماغك

■ يا هانم يالى مش حاسة، إحنا في خطر، ولو الميعاد عدى قبل ما نقدم على البطاقة، حنضيع.. قومي هاتي البطاقة، لازم أبدأ بسرعة، فاضل شهر واحد والميعاد يخلص.. وبعدين أبقي أفهمك

— أنا بأقرا الجرايد، وعارفة كل حاجة.. عشان كده بأقولك ماتتعبش نفسك.. إحنا مش من حقنا لا بطاقة خضرا، ولا حمرا
■ إزاي تقولى كده؟!

— مش أنا اللي بأقول، ده واحد مسئول قال في تصريح للجرنال، إن اللي ساكن في شقة مش من حقه يطلع بطاقة، والموظف كمان مش من حقه، واللى عنده حمام لوحده، واللى مرتبه أكثر ميتين جنيه...و...و.....

■ إمتى الكلام ده!! إذا كنت أنا قريت تصريح لواحد تانى، مسئول برضه، قال إن كل المواطنين من حقهم يقدموا ويستخرجوا البطاقة!!!
— ما أنا قريته، المسئول ده بالذات هو اللي قال إن الحكومة حتتحرى عن المتقدمين

■ تتحرى!! يعنى إيه؟
— يعنى "تأكد من عدم تسلل الأغنياء أو ميسورى الحال".. أنا فاكرة كويس عشان عجبتنى قوى كلمة "تسلل" دى

■ بأقولك إيه، أنا مصمم، ماتتعبش نفسك.. هاتي البطاقة، وأنا حأعمل كل حاجة

— أقولك إيه بس.. أنا.. بصراحة.. أنا قطعت البطاقة ورميتها من زمان
■ إزاي تعملى كده!! طول عمرك بترمى كل حاجة، وياما قلت لك نحتفظ بكل ورقة، ما حدش عارف حيحتاجها إمتى، لكن إنتى مابتسمعش الكلام، وبتقولى دى كر كبة.. شفتى بقى إن عندى حق!

— بالراحة بس شوية، إنت أصلك ناسى.. الحكومة هى اللى لغت البطاقة، الأول رفضوا يضيفوا الولاد، وبعدين فضلوا كل شوية يطلبوا إننا نروح مكتب التموين نجدها، ويعملوا تعقيدات ومشاكل ومشاورير، لغاية إنت نفسك ماقلت خلاص، مش عاوزين تموين

▪ مش ممكن أكون قلت كده، إنتى بتبرى عملتك.. أنا حاروح أقدم على واحد جديدة، أو أفهمهم إنها ضاعت

— أنا متأكدة انهم حيقولوا مش من حقك، وإنك متسلل، لإنك غنى أو ميسور الحال

▪ أنا كنت ميسور الحال، أنا لغاية وقت قريب، عمرى رفضت لك طلب إنتى أو حد من الولاد ! مش إنتى معايا خطوة بخطوة وشايفة الحال بيتغير إزاي !!

— شايفة

▪ مش إنتى اللى قلتى نركن العربية ونركب الميكروباص عشان نوفر بعد البنزين ما غلى !! هاتى الجرنال اللى وراكى عشان تشوفى، الوزير بيقول إن فيه دلوقتى حذاشر مليون ونص بطاقة، حيستفيد منها ثمانية وتلاتين مليون مواطن.. ولسه العدد حيرتفع لأكثر من أربعة وخمسين مليون..

يعنى الحكومة حتقول إن أنا أغنى من كل دول

— إذا كان عالحوكمة، حتقول كده بالظبط

▪ ما إنتى عارفة، مرتبى أنا وإنتى مع بعض مش بيعصلوا ألف وخمسميت جنيه

— بالنسبة لهم ده كثير، كثير قوى كمان

- يعنى حيقولوا إنى غنى، أو ميسور الحال !!
- أكيد، أقل من كده وبيقولوا !
- ده إحنا كل شهر نشوف إيه اللى ممكن نستغنى عنه عشان نكمل، ومش بنجيب إلا الضرورى، وياريت مكفى.. نفسى الحكومة تصدق إنى دلوقتى بقيت من محدودى الدخل، خليكى إنتى عالأقل معايا، مش تقفى مع الحكومة ضدى.. أنا كل اللى بأحلم بيه أعيش مستور وأربى العيال، خايف موت حد من الولاد يطلب حاجة، وما أعرفش أجيبها له.. أعمل إيه بس يا ربى !!
- بس، بس، حقك عليا، مش قصدى والله.. أنا خايضة عليك من المشاوير.. خلاص بكره حآجى معاك نخلص الورق
- لأ حأروح لوحدى، مش عاوز منك حاجة

اليوم الثاني

- إعملى لى شأى
- عملت إيه ؟
- قدمت.. بس بيقولوا حيعملوا لى بحث اجتماعى
- مش قلت لك !!
- بيسألوا أسئلة غريبة قوى، عندك غسالة أتوماتيك، عربية، أرض.. هو أنا بأقدم إقرار ذمة مالية !!
- مش قلت لك !!
- لأ وكم ان شقتك كام أوضة، والحمام بتاعك لوحذك ولا مشترك !!!

— مش قلت لك !!

■ فيه إيه !! لو قلتى الكلمة دى تانى مش حيحصل كويس

— إنت حتطلع غلبك عليا ولا إيه !!

■ أعمل إيه، جاي هلكان وقرفان .. حقتك عليا ياستى

— أنا من الأول قلت لك بلاش .. كنت عارفة اللى حيحصل لك .. وفى

الآخر البطاقة دى حتوفر لنا كام يعنى ؟

■ شوفى ياستى، كل فرد من حقه فى الشهر، كيلو سكر بستين قرش،

ونص كيلو زيت بخمسين قرش، وكيلو رز بجنيه، وباكوشاى

بخمسين قرش .. ده دعم كلى .. لسه بقى حيدوا دعم جزئى، السكر

بخمسة وثمانين، والزيت بتلاتة جنيه ونص، بس البطاقة ليها حد أقصى

إثنين كيلو بس من كل صنف

— يعنى كله كام ؟!

■ البطاقة حتوفر فى الشهر سبعة جنيه لكل فرد

— سبعة جنيه !! ده السكر بتاعهم كله تراب، والرز كسر، والشاى نشارة

خشب، والزيت

■ ماأنا سمعت إنهم لسه حيضيفوا الفول والعدس والمكرونة

— ولو .. كفاية البهدلة، والحاجة نصها بيترمى

■ إنتى أصلك مش بتبصى للموضوع كله .. البطاقة دى حتبقى الباسبور

بتاعى، واللى مش معاه بطاقة تموين حيقى عريان

— مش فاهمة

■ من غير البطاقة طول ما أنا ماشى حادفع .. لازم أعمل كل الى أقدر عليه عشان أطلع البطاقة، وإذا ماعملتش كده، ربنا يحاسبني، لأنى حأكون مقصر فى حق نفسى وحق ولادى .. فهمتى ؟!

— والله ما أنا فاهمة حاجة !

■ الحكومة بتقول إنها بتتوجه للفقرا، وإنها حتاخد من الغنى تدى الفقير .. فهمتى ؟!!

— بس بالراحة عليا والنبى .. فهمنى بالراحة

■ الحكومة بتلعب معانا عسكر وحرامية، أو السلم والتعبان .. ممكن نصحى الصبح نلاقى كل حاجة بقت عالبطاقة، واللى مش معاه بطاقة حيصيع

— لا يا شيخ !!

■ أنا باقولك كده .. البطاقة دى آخر أمل لينا كلنا

— أمل فى إيه ؟!

■ الأمل الى حيخلى الحكومة تصدق إننى فقير

— يامصيبتى !! الولاد يقولوا إيه ؟

■ الولاد !! هو انا بأعمل ده كله ليه ؟ مش عشان الولاد

— تقوم تقول لهم إننا فقرا !!

■ مش حأقول لهم .. أنا عاوز أقول للحكومة

— وهى الحكومة لما تقول لها كده، حتصدقك يعنى ؟

■ وما تصدقش ليه ؟ مش هى دى الحقيقة !! مش الحكومة هى الى

وصلتنا للى إحنا فيه دلوقتى !!

- ما هو عشان كده مش حتصدق، أو حتعمل نفسها مش مصدقة، وإلا تبقى بتعترف إنها فقرتنا
- مش بأقولك بتلعب معانا، إحنا كمان حنلعب معاها بطريقتها
- إزاي يعنى ؟!
- لازم أعمل البطاقة.. لازم أثبت لهم إني فقير.. مش عشان تديني حاجة، لأ
- أومال عشان إيه ؟!
- عشان تبطل تاخد مني
- تفتكر !!
- طبعا
- وبطاقة التموين هي اللي حتعمل ده كله ؟!
- البطاقة دي حتبقى سلاحى، كل ما الحكومة تاخد قرار، أطلع البطاقة أحطها فى وشها
- باعتبارها إيه ؟!
- شهادة فقر

٢٧ مايو ٢٠٠٨

الثانوية العامة

اليوم الأول

- إيه اللي معاكي ده ؟ دليل التليفون ؟!!
- دليل التليفون إيه، دى ملزمة العربى .. مش عارفة أشيلها فين
- كل دى ملزمة !! طب عاوزة تشيلها ليه، مش إمتحان العربى خلص .. إرميها
- أرميها إزاي، إنت عارف دى بكام، بمية وستين جنيه، كل تيرم بثمانين
- يااه .. هى كتاب مدرسة ولا كتاب خارجى ؟
- بأقولك ملزمة، مدرس السنتر هو اللي عاملها، كل مادة كده، فيها كتاب مدرسة، وكتاب خارجى، وملزمة السنتر .. غير بقى ملازم المراجعة وملازم فيها إمتحانات .. أما ملزمة ليلة الإمتحان، فدى بقى سعرها من خمسة لعشرة جنيه
- كل ده !! مش من فترة جبنا ملزمة من المدرسة ؟
- إسمها دليل التقويم، نماذج عملتها الوزارة وإشتريناها من المدرسة فى مارس بخمسة وخمسين جنيه، وفضلنا نذاكر فيها شهرين بحالهم، وبعدين الوزارة لغتها .. البنت كانت حتموت عالمجهود والوقت اللي ضاعوا
- ماضاعوش ولا حاجة أهى كلها مذاكرة واستفادة .. بس الوزارة تلغيها ليه ؟ مش هى اللي عاملها !!

— الوزير يقول إنه أكتشف فيها أخطاء كثير .. تصور بعد شهرين !!
طب مش ده معناه إن النماذج إتباعت من غير مراجعة، هو يصح إن
الوزارة تعمل كده؟ المشكلة بقى إن معظم المدرسين ماعرفوش إن فيه
أخطاء، يعنى المدرسين متلخبطين، والبنت مش عارفة مين فيهم الصبح
ومين الغلط

▪ إزاي ماقلتليش الحكاية دى من ساعتها؟

— كنت حتعمل إيه يعنى؟

▪ أقل حاجة أروح أبلغ جهاز حماية المستهلك، مش دفعنا فلوس
والبضاعة طلعت بايظة !! معاكى فاتورة؟

— بأقولك إيه، اللى حصل حصل، مش عاوزين نسب شوشرة للبنت ..
كفاية عليها القصة

▪ قصة إيه كمان؟!

— والإسلاماه .. طلعت عينها فيها، وكله كوم والكلمة والمعنى كوم تانى

▪ قصدك معانى الكلمات، ماهى لازم تعرفها عشان تفهم

— مش المعنى بس، كمان المرادف والجمع، ستاشر فصل وكل فصل مش
أقل من خمسين ستين كلمة لازم تحفظهم، وفى الآخر كل ده علي ربع
درجة

▪ ربع درجة !! كانت سابتهم خالص، بلا تضييع وقت

— إنت كمان حتقول كده؟ ده الطالب من دول محتاج كل درجة، دى
القصة عليها ثلاث درجات بحالهم

▪ والله أنا لو منها كنت سبت القصة كلها وريحت نفسى

— أسكت أحسن تسمعك، لو عملنا كده حسيب من كل مادة حته،
يعني عندك الفرنساوي، لازم تحفظ ستين موضوع إنشا، دول بقى
ست درجات

■ أنا مش مصدق، حفظ !! المفروض في اللغة تفهم القواعد ويكون
عندها حصيلة كلمات فتعرف تكتب موضوع الإنشا، هي مش بتفكر
خالص!!؟

— مالکش دعوة إنت، أنا اللي بأذاكر لها وعارفة الأمور ماشية إزاي..
العيال ماعندهومش وقت للتفكير، المذاكرة كتيير، أكثر ما أى حد
يتصور.. لسه كمان حيفكروا!! دول كانوا يضيعوا

اليوم الثاني

■ كنتي فين، إتأخرتي كده ليه؟

— كنت بألف عالسناتر عشان أحجز

■ إنتي ناوية تغيري السنتر بتاع البنت في عز الامتحانات!!؟

— لأ طبعا.. أنا بأحجز عشان السنة الجاية.. دي تالته، مافيش فيها هزار

■ من دلوقتي!!؟

— إنت نسيت اللي حصل لنا أول السنة؟ مالاقيناش غير مكان عادي مش
مميز

■ وإيه الفرق يا خبيرة!!؟

— المميز فيه إتناشر طالب بس، العادي يوصل لأربعين، وأكثر.. بس
تعبت قوى، سألت أمهات كل أصحابها وعرفت كل حاجة، مين

أحسن مدرس ويدي فين، وحجزت لها، كله أماكن مميزة، إنشاء الله
نبدأ في أغسطس.. بس إعمل حسابك أسعار تالته غير تانية
■ كام يعني؟

— الحصه اللي كانت بعشرين بقت ثلاثين عشان مميز، العادي بخمسة
وعشرين.. بس الإنجليزي والفيزيا الحصه بخمسين.. وكم عدد
الخصص حيزيد.. الله يكون في عونك يابنتي، حتضطر تنزل مرتين في
اليوم، مش مرة زى تانية

■ أنا مش فاهم والله إيه الفرق بين المدرسة والسنتر، لما المجموعه فيها
أربعين طالب.. إزاي الوزارة سايبه السناتر دى شغالة والعيال تروحها
وتسيب المدرسة؟!!!

— المدرسة مافيش فيها شرح.. المدرسين عارفين إن الولاد بتعتمد
عالدروس، وهم نفسهم بيقولوا لهم غيبوا، والحمد لله، أنا بالمحبة كده
قدرت أقفل الغياب، ونحمد ربنا إن السنتر بتاع البنت ما إتقفلش، دى
الوزارة الشهر اللي فات قفلت سناتر كتير

■ إسمعني يعني؟!!!

— مش عارفة بالظبط بس ناس بتقول إنها مش واخدة ترخيص.. العيال
الى فيها يا حرام اتبهدلوا عشان يلاقوا أماكن تانية

■ بالذمة ده أسمه كلام!! الوزارة سابتهم طول السنة وتيجي قبل
الإمتحانات تدور معاهم ترخيص ولا لا!! وإزاي أصلا الوزارة قابله
تدى رخصة للسناتر، كده بتعترف إن المدارس فاشلة ومافيش فيها
شرح

- معترف يا ستي، ربنا يكون في عونها، وعونا إحنا كمان.. أجيب لك عصير أو بطيخ معايا؟ الدنيا حرقوى
- لأ.. لا أنا ولا إنت، العصير والفاكهة على أد البنت لوحدها.. إحنا نقدر على نفسنا، لكن هي محتاجة طاقة وقالوا في التلفزيون لازم نعمل نظام غذائي للولاد بتوع الثانوية العامة وقت الإمتحان عشان يساعدهم على التركيز، عصير وفاكهة، أربع ثمرات في اليوم على الأقل، وما يكونش من صنف واحد، إشتريت على أدها، لو عملت حسابنا مش حنعرف ندفع تمن الدروس
- زى بعضه.. طب إعملى لى شاي على ما أرجع
- إعمل لنفسك.. البنت بتناديني.. أكيد خلصت حفظ وعاوزاني أسمع لها
- ربنا معاها

١٠ يونيو ٢٠٠٨

إمتحانات السنة الجاية!!

اليوم الأول

- ربنا يعدى الأيام الباقية على خير البنت حالتها وحشه خالص
- ربنا معاها، والله أنا حاسس إنى قصرت فى حق البنت دى وضميرى مش مستريح
- ليه بتقول كده، إحنا عملنا كل اللى فى مقدورنا، احسب صرفنا عليها كام، ده إحنا حبسنا نفسنا فى أوضه وحرمنا نفسنا من الأكل والخروج عشان نجيب لها كل اللى تطلبه
- بس معرفتش أجيب لها الإمتحانات
- وكنت حتجيبه مين بس
- سألت فى كل حته، الأول كنت بأقول لنفسى لأ، ده حرام، وربنا يحاسبنا لو عملنا كده، وبعدين لقيت الناس فى التليفزيون بتعترف على نفسها، ومنى الشاذلى قالت إن فيه واحد حلف لها إنه السنة اللى فاتت إشتري لبنته كل الإمتحانات، كانت جايبه فى سنه تانية خمسة وسبعين فى المية، لما اشتري لها إمتحانات تالته جابت خمسة وتسعين فى المية، قلت لنفسى أنا كده بأحرم بنتى من حقها، إزاي أقول ده حرام إذا كان اللى ما ذاكرش حيجيب أكثر منها لأنه قدر يشتري الإمتحانات، يبقى فين تكافؤ الفرص اللى الوزير بيقول عليه؟!
- ماتعملش فى نفسك كده، إحنا هنا فى القاهرة، والإمتحانات إتباعت فى المنيا، كنت حتعمل إيه يعنى؟

— بأقولك واحد اشترى لبتته الامتحانات السنة الى فاتت، المنيا إيه،
الإمتحانات بتتباع كل سنة فى كل حته، وإحنا مش حاسين ومش عارفين
السكة مين، أنا سألت وكنت على إستعداد أبيع أى حاجه فى البيت
واشترى لها كل الإمتحانات وأهى بجملة المصاريف، بس فشلت

■ مايقدر على القدرة إلا ربنا، إنت عملت كل اللى فى إيدك

— بس ضيعت بنتى، اللى إشتروا الإمتحانات دول، واللى إتعمل لهم لجان
خاصة عشان يعرفوا يغشوا خدوا حقها لإن كل واحد منهم جاب
نمرة واحدة أكثر منها ضيع عليها فرصة

■ أنا اللى مجتنى إن الامتحان اللى إتسرب ده هو أصعب إمتحان،
التفاضل والتكامل، جت أسئلة عمر البنت ماشافتها وبيقولوا إن
المدرسين ماعرفوش يحلوها، والموجهين فضلوا أكثر من ساعة لغاية
ماعرفوا الحلول يعنى تعجيز للولاد، ليه بيعملوا كده مش واخدين
باهم إن إلامتحان ده بيأثر على نفسية الطلبة لغاية آخر الإمتحانات،
يعنى ماينفعش يقولوا مادة وعدت، ولا حتى إنهم حيعيدوا توزيع
الدرجات، منهم لله

— حترجعى تانى تقولى إمتحان واحد، بأقولك كل سنه كل الامتحانات
بتتباع، بس تعرفى أنا حاسس إن اللى بيحصل ده مقصود

■ آه، أنا كمان بيتهيالى كده، عاوزين الناس تفضل مشغولة بالإمتحانات
والصعوبة والبيع، ما هو كل بيت فيه طالب فى الثانوية العامة، عاوزين
يشغلوا الناس لغاية مايخلصوا القوانين اللى عاوزين يلموا بيها فلوس منا

— مش بس كده، لكن فكرى، اللى بيحصل ده لمصلحة مين ؟

■ قصدك مين ؟

— طبعا أصحاب الجامعات الخاصة لإن الطلب عليهم حيزيد، والولد الى جايب أكثر من تسعين في المية، ومش عارف يدخل الكلية الى عايزها أهله حيدفعوا دم قلبهم ويدخلوه جامعة خاصة، وشوفي بقى كمان الى مجابش مجموع كويس، بدل ما يعيد يروح يتعلم بالفلوس

■ طب وهم حيستفيدوا إيه من كده ؟

— أكيد حيستفيدوا، ما كلها مصالح متشابكة، إحنا نايمين ومش عارفين إيه الى بيحصل من ورا ضهرنا

■ المصيبة ياخويا إنهم مصدقين إن فيه تعليم، تفتكر هم فعلا مصدقين ولا بيستعبطوا، لا العيال بتتعليم ولا لما بيتخرجوا بيلاقوا شغل، واللى اشتغلوا من عارفين يعيشوا، ولا عمرهم حيتجوزوا أو يشتروا شقه، إحنا بنعمل كده ليه ؟!

— لسه عندنا أمل، عبط، شفتى الإعلان الى بيعجى فى التلفزيون بيقلوا فيه للشباب بلاش تقعدوا عالقوهة روحوا إشتغلوا أى حاجة، عاوزين ولد تعب سنين وإجتهد وأهله صرفوا عليه الى وراهم واللى قدامهم ودخلوه كلية الهندسة يروح يشتغل على ماكنة فى مصانع الكبار منهم، وبعدين يعايروه بالتلاتين فى المية بتاعة العلاوة الاجتماعية

■ الناس دى ربنا حيحاسبها، تفتكر بيناموا عادى وضميرهم مستريح

— أفتكر ونص

اليوم الثاني

— أنا مانمتش طول الليل

■ ليه كفل الله الشر ؟

— بأفكر إيه اللى مفروض يحصل، مافيش غير حل واحد، الإمتحانات دى لازم تتعاد بها يرضى الله ..

■ ياخبر دى كانت البنت تروح فيها، دى تجربه صعبه قوى، أصل أنا لما كنت فى الإعدادية سنة واحد وسبعين وفى يوم إمتحان الجبر لقيت طنط أمينه جارتنا بتخبط الساعة ستة الصبح وفى إيدها ورقة قالت إنها الإمتحان جه لإبنها، طبعا ما صدقتش، بس قعدت جاوبت عليه، ورحت المدرسة، طلعتنا الفصول عادى وبعدين المراقبين قالوا لنا مفيش إمتحان لأنه إتسرب، والله لسه فاكره المشهد، البنات كلهم على السلم نازلين اللى تعيط واللى تصوت، معرفش ليه السلم ضاق علينا كده مع إننا بنستعمله كل يوم عادى، الإمتحانات إتأجلت أسبوع بس كان فيه بنات منهارة عاوزين يخلصوا، بأقولك تجربة قاسية

— بس شفتى عملوا إيه، لغوا الإمتحان، منى الشاذلى برضه فكرتنا إن امتحان الثانوية العامة إتسرب فى الستينيات، عارفه إيه اللى حصل، فضلت إذاعة إسرائيل تذيع الامتحانات كل يوم الساعة خمسة الصبح، وبعد خمس أيام الحكومة خدت بالها، لغت الإمتحان وعادته فى أغسطس، هوه ده اللى مفروض يحصل فى البلاد المحترمة

■ حتى لو عادوه، برضه فيه عيال هيجيلهم الإمتحان، بس فى الخباسة ماهى التجربة دى علمتهم .. تفكر حيعملوا إيه دلوقتى ؟

— ماهو الوزير قال، حيستنوا بعد التصحيح عشان يحددوا حيعملوا إيه، ولو لقوا لجنة معينة الإجابات فيها متشابهة يعيدوا فيها الإمتحانات ..
يعنى برضه ركزوا فى المنيا وعملوا نفسهم مش واخدين بالهم من اللى قال إشتريت السنة اللى فاتت واللى قبلها، مفيش حاجة حتحصل حتى لو إتشال مسئول أو إثنين، هوجه وحتعدى والسنة الجاية حيعصل نفس الشئ

▪ لأ مش معقول

— فاكـره السنة اللى فاتت، فيه ناس فى الصعيد طلـعوا على عربية فيها أوراق الإجابة بتاعة الثانوية العامة وحرقوها، حد عرف حصل إيه ؟
تعرفى أنا نفسى فيه إيه دلوقت ؟!

▪ فى إيه ؟

— نفسى أبيع اللى ورايا واللى قدامى وأخذك أنتى والولد والبنت ونهاجر على أى حـتة

▪ ونسيب بلدنا ؟!

— وهو إنتى لسه حاسه إنها بلدنا .

▪ تصدق إن البنت لسه كانت بتقولى نفس كلامك، الأول بعد إمتحان التفاضل وبعدين لما عرفت حكاية التسرب، قالت لى ياريت الواحد يروح فى أى بلد يتعلم ويشتغل ويعيش

— عندها حق

▪ أسكت دى كمان بتقول إنها مش ناوية تتجوز قال إيه خايفه تجيب ولاد مش عارفه مستقبلهم حيبقى شكله إيه لكن لو سافرت بلد تانيه ساعتها تفكر تتجوز وتخلف

— بأقولك عندها حق، إذا كنت أنا في السن ده عاوز أهاجر

■ أنا بقى مش موافقه، دى بلدى وبحبها وحأفضل أحبها، وحاقعد

فيها، لازم مقاوم وندافع عنها

— تدافعي إزاي، إذا كان دلوقتي لو حصل لك أى مشكلة مش حتعرفي

تاخدى حَقِّك، مش سمعتى الدكتور المحترم محمود كامل الناقة فى

التليفزيون يقول إن المصري دلو قتي بيمشي جنب الحيط عشان عارف

ومتأكد إن مفيش قانون يحميه أو ينصفه

■ **مش للدرجة دي**

— للدرجة دى وأكتر كمان، القانون عندنا ينفذ حسب التساهيل، يعنى

قبل ما أدخل مشكلة لازم أعرف مين الطرف التاني عشان أقدر

أشْتَكِيهِ وَلَا لَأَ ، إِذَا كَانَ كَبِيرَ أَشْتَرَى نَفْسِي ، وَلَوْ غَنَى بِرَضِهِ لِأَنَّهُ

حی عرف اِزای یشتری لنفسه کبیر

■ أنا برضه مش معاك، ومش حاسيب بلدى لا أنا ولا إنت ولا ولادنا .

— قاعدین یاختی ماہو السفر مش سہل یعنی، دی مجرد أحلام، بس أنا

لام أَتَصْرَفُ مِنْ دَلْوَقْتِي

■ **تعمل إيه يعني ؟!**

— أَدور على حدٍ يَجب لى السَّنة الجاية امتحانات سنة تالته

٢٤ يونيه ٢٠٠٨

إبني أستاذ في الجامعة

اليوم الأول

- يا إبني لازم ناخذ وندي في الكلام ، يا تقنعني يا أقنعك
- يا بابا أنا بأقول لحضرتك ده قرار نهائي
- إزاي بس .. بعد التعب ده كله ! طول عمرك متفوق وبتقول أنا أستاذ جامعي ، دلوقتي جاي تقول رجعت في كلامي !
- أنا بأقول كده عشان يبقى قرارى بدل ما ألاقى نفسى مرفوض ويجيلي إحباط
- وليه تفترض إنك مرفوض ؟
- مش بأفترض ، بس مش عاوز مصيري يبقى متعلق بقرار واحد غيري
- تقصد مين ؟
- العميد مثلاً .. وكمهان الأمن
- إشرح لي وجهة نظرك
- كل سنة ، مش بتقرا عن أوائل رفض عمداء كلياتهم يعينوهم لأسباب غير مقنعة ، أنا عارف دول إترفضوا ليه ، عشان ماعندهم مش واسطة ، أو عشان الأمن مش راضى عنهم .. مش فاكر جارنا اللي طلع الأول من كام سنة ، أنا قابلته وقال لي إنه أترفض عشان كان بيكتب آراء معارضة في مجلات الحائط ، رغم إن المجلات دي كانت بتتشانل بعد ما تتعلق بدقايق

- وهو إنت كنت بتكتب آراء معارضة ؟
- أنا بأحاول أشرح لك إن فيه أسباب كتير ممكن تتسبب إني ماأتعيش ،
عشان كده أنا مصمم إن مصرى يبقى فى إيدى أنا .. وبعدين حضرتك
عارف لما أبقي معيد مرتبى حقيقى كام ؟
- كام ؟
- كانوا ميتين جنيه حيقوا تلتمية بعد الزيادة اللى قرررتها الوزارة
- لأ مش معقول أكيد ده الراتب الأساسى وبعدين حتلاقى فيه حوافز
ومكافآت
- فعلا ، الحوافز مية أربعة وتلاتين فى المية، يعنى فى الآخر برضه مش
حيكفى غير يادوب المواصلات، وأنا مع احترامى لحضرتك رافض
مسألة الحوافز دى، المبدأ نفسه غلط ومهين ومش موجود فى أى دولة
محترمة.. الراتب يعنى راتب، وحكاية الأساسى ده إختراع مصرى
نفسى أعرف العبقرى اللى توصل له عشان يخلى رقبة العاملين فى إيد
رؤسائهم
- مش للدرجة دى يا حبيبى، دى محاولة من الدولة عشان تزود دخل
الناس
- لأ مش صحيح.. وعشان تتأكد شوف الوزير عمل إيه فى مفاوضاته مع
أساتذة الجامعة اللى إضطروا يضربوا احتجاجا على مرتباتهم .. الأستاذ
بعد تلاتين سنة أساسى مرتبه تمنيت جنيه، ولما طلبوا تعديل الخطأ
الوزير صمم إن الزيادة تكون منح ومكافآت، وبعدين قال إنها بشروط
زى التفرغ الكامل لأعمال التدريس والبحث العلمى والإشراف

▪ طب ماهو عنده حق برضه

— يابابا دى مش شخصيتك، إنت بتحاول بس تخلىنى أرجع فى قرارى وفاهم كويس إن الحكاية كلها محاولة للسيطرة على الأساتذة عشان يبقى رزقهم فى إيد العميد، يعنى الحكومة.. طب هو العميد نفسه أو حتى رئيس الجامعة متفرغين!! عارف دول بيقبضوا كام؟ مئات الألوف كل شهر، ده معناه إيه؟

▪ إنت شايف إيه؟

— النظام كله غلط، ماحدثش بيشغله العملية التعليمية أو التطوير اللى بيتكلموا عنه، الشيء الوحيد اللى عاوزينه هو السيطرة على الأفكار، أول ما الأساتذة قرروا الإضراب الوزير إهتم وحاول، بس بنفس التفكير، إن الأمور كلها تبقى فى إيد الوزارة، عشان كده صمم على مكافآت مشروطة وكل همهم إن الإضراب مايحصلش، لكن الأساتذة أضربوا، كانوا رافعين لافتات مرسوم عليها جزم رياضية وكرة قدم قصدهم يقولوا إن البلد بتتهم بلاعب الكورة وتتجاهل أستاذ الجامعة، المهم الإضراب عدى وإتنسى، تفتكر فيه مسئول واحد سأل نفسه الأستاذ ده حيعمل إيه لما مايعرفش يصرف على ولاده.. الوزير بيتكلم فى ألف وألفين جنيه، الأستاذ فى أى بلد بياخد اللى هو عاوزه، اللى يكفيه.. يقولوا إن الأستاذ مشغول عن الطلبة فى عمل بره الجامعة، طب ودى غلطة مين!! أنا لو إشتغلت مدرس فى مدرسة ثانوى حأكسب من الدروس الخصوصية أكثر من أى أستاذ فى الجامعة

.. طيار طار طوله .. طيار طار طوله .. طيار طار طوله ..

- بس إنت طول عمرك بتحب الدراسة والبحث.. وبتحلم تبقى أستاذ
و مش ببساطة كده تتخلي عن حلمك
- حتي بعد اللي قلته لحضرتك دلوقتي
- طب أنا عندي إقتراح.. فكر تاني شوف إذا اشتغلت حاجة تانية هل
حتبقى مبسوط، وإذا كانت الإجابة لأ خليك في حلمك الأول لأنه
حلم جميل ويستحق.. إيه رأيك ؟
- حاضر.. عشان خاطر ك بس

اليوم الثاني

- تعالى يا حبيبي إيه الأخبار ؟
- أنا وصلت لقرار.. حاسافر
- تسافر !! فين ؟
- أى حتته، الحكاية دى فى دماغى من زمان .. دلوقتي إتخرجت وجاهز
وحأبدأ أدور على أى فرصة
- أنا مش ضد السفر، بس المهم إزاي ؟ اللي كنت أنا بأحلم بيه إنك
تتعين معيد وبعدين كليتك تبعتك بعثة تكمل دراساتك العليا وترجع
- حتى لو ده حصل، حاسافر ومش حارجع
- طب ليه بقى ؟
- زى اللي سبقونى، تعرف إن سبعين فى المية من المبعوثين اللي بتبعتهم
الجامعة للخارج مش بيرجعوا ؟
- إخص عليهم .. وإنت عاوز تعمل زيهم !!؟

— حط نفسك مكانهم، الناس دي كفاءات في مجالات مختلفة، لو رجعوا حيلاقوا أنفسهم في شغل غير تخصصهم .. وحزروح بعيد ليه، جامعة القاهرة نفسها فيها تقرير لمركز دراسات الدول النامية يقول إن فيه أكثر من تمنيت ألف مصرى هاجروا، كلهم كفاءات وتخصصات مهمة ونادرة، دلوقتي أصبحوا مسئولين في أماكن حيوية وإستراتيجية في الدول اللي هاجروا فيها

■ حاجة تحزن بصحيح، بلدنا هي الخسارة

— أيوة كده إرجع لشخصيتك الحقيقية وسيتك من محاولتك كأب إنك تخليني جنبك

■ والله مش قصدي، أنا بأقولك تسافر بس عن طريق الجامعة وترجع تكمل أبحاثك وتخدم بلدك

— أبحاث إيه يا بابا، منين وإزاي؟ الدول دي بتصرف على البحث العلمي كتير، كتير قوى .. أنا قرئت مقالة إن دول نامية، مش أمريكا يعني، أقل حاجة بتتصرف أكثر من خمسة في المية من الدخل القومي على البحث العلمي .. تفتكر عندنا النسبة كام؟

■ أكيد أقل من كده

— أقل من واحد في المية، ومش بس كده، سبعين في المية من النسبة دي بتروح عالمربات والحوافز، يعني لا بحث ولا علمي، ولا حد فاهم الدور المهم للأبحاث العلمية، حلول كل مشاكل مصر موجودة في أبحاث بس بتفضل شوية ورق في درج المسئول المشغول بحاجات تانية مش من ضمنها البلد ومشاكلها

■ بس برضه الأستاذ حيفضل قيمة كبيرة ، والجامعة حيفضل لها
إحترامها

— أى جامعة ؟

■ كل الجامعات فى مصر

— إذا كان التقرير الى إتعمل عن أفضل خمسميت جامعة فى العالم مافيش
فيه ولا جامعة مصرية، عارف كام جامعة أمريكية طلعت فى التقرير،
مية وتسعين جامعة

■ هو أنا بأقول إننا أحسن من أمريكا، أنا بأقول إن مهها كان حتفضل
الجامعة عندنا أكثر مكان محترم فى بلدنا

— بجد !!! طب والمحافظة الى راحت هدت مبانى نادى هيئة التدريس
بجامعة القاهرة عشان الأساتذة عملوا إضراب، وقالوا إن المبانى
مخالفة، مع إنهم سايبين المسارح الى جنب النادى المخالفة برضه،
عارف إن حضرتك حتقول زيهم دى غلطة موظف، ماشى، يبقى
الموظف ده وصلته الرسالة، الدولة لا تحترم أستاذ الجامعة

■ مش حأكذب عليك، أنا مقتنع بكل كلامك من الأول، ويمكن عشان
كده مش عارف أقنعك بعكسه، لكن مشفق عليك من السفر

— مش حضرتك مرة قلت لما إن نفسك تبيع كل حاجة ونهاجر كلنا

■ أهو مجرد كلام، فضفضة، بس على الأقل كنت عاوز كلنا نكون مع
بعض، لكن إنت لو سافرت حتعيش لوحدك فى الغربية

طيار طار طامه .. طيار طار طامه .. طيار طار طامه .. طيار طار طامه ..

— يابابا الفقر في الوطن غربة، على ابن أبي طالب هو الى قال كده من
زمان، أنا بأقول لحضرتك من دلوقتي إنى بدأت فعلا أدور عشان
أسافر

■ طب خلينا نستنى لما تظهر النتيجة

— مهما كانت النتيجة

٨ يوليو ٢٠٠٨

نشترى وظيفه ؟!!!

اليوم الأول

- الولد طلع عنده حق
- أنا حاسة إنه مقهور
- ليه ؟! ماهو ده كان قراره من الأول
- أكيد كان لسه عنده أمل
- لأ .. هو لما قال مش عاوز أبقي معيد كان واضح إنه بيتكلم جد ومصمم، حتى لو كانت جت له كان حيرفضها، أنا الى مش مصدق لغاية دلوقتي إنهم رفضوا يعينوه مع إنه الأول كل سنة
- الكلية قالت إن القسم بتاعه مش محتاج معيدين السنة دى
- وإنتى مصدقة الكلام ده؟
- الولد قالى إن فيه طالب فى الدفعة بتاعة السنة الجاية شايلين له الوظيفة
- شفتى، كل كلمة قالها كانت صح، كان عاوز يبقى القرار قراره بدل مايبقى مرفوض
- ماهو كمان بيقول إن المرتب صغير
- المهم إنه بيدور على شغل
- قدم طلبات كتير ودخل إمتحانات وإنترفيوهات، ربنا يكرمه ويلاقى حاجة كويسة
- بيقول كل الشركات الى قدم فيها شركات كبيرة وبتدى مرتبات عالية، حياخدوه على إيه؟

— على تفوقه وشطارته

■ آه ... جايز

— بقى يعنى إحنا مانعرفش حد كبير كده ممكن يتوسط له !!؟

■ منين يا حسرة؟ الغلابة اللى زينا حيعرفوا ناس مهمة إزاي؟

— مافيش عندك فى الشغل أى حد؟

■ أنا مش ممكن أطلب من حد يعمللى واسطة .. طول عمرى ماشى

دوغرى وبأرفض الوسايط

— الزمن إتغير دلوقتى، مافيش حاجة عندنا بتمشى كده بالحق لوجه الله

■ عارف بس ما أقدرش .. إزاي الواحد ببساطة كده يغير من نفسه ومن

أفكاره ومبادئه؟

— عشان خاطر الولد ومستقبله

■ كنت فاكر لما أربيه كويس وأعلمه كويس أبقى بأمن له مستقبله،

طلعت بأضيعة

— عندك حق، الحاجات دى دلوقتى مش كفاية

■ عارفه أنا لما إترقيت وبقيت مدير السنة اللى فاتت حسيت إنى كنت

ماشى صح، بس إكتشفت إنى حتى فى دى مش زى زمائلى اللى فى

نفس المؤسسة

— إزاي يعنى؟

■ واحد مدير عندنا عرفت إن مرتبه بيوصل لعشرين ألف جنيه فى الشهر

وساعات أكثر كمان

— إيه !! إيه؟؟ هو بيعمل إيه !!!؟

■ زى الى بأعمله بس مش عارف إشمعنى هو الى راضين عنه كده،
وعمل الحكاية دى إزاي .. مافيش شهر يعدى من غير ما يطلع مهمة
عمل وياخد بدلات أد كده .. غير اللجان وإجتماعات مجلس الإدارة،
ماهم عينوه في المجلس، عارفة، إينه كان في جامعة خاصة إتخرج السنة
الى فانت وعرف يلاقى له شغل في شركة بترول .. يقولوا إنه بيقبض
مش أقل من أربع تلاف جنيه

— ماشاء الله، طب ماتروح تكلمه ... إسأله بس

■ هو ما بيكلمش حد، أصلنا مش من مستواه

— لازم نعمل حاجة، مش معقول نسيب الولد كده

■ ماهو لسه متخرج ما كملش شهر، ماتخافيش

— لأ أخاف .. إنت مش لسه سامع في التليفزيون إن فيه ملايين من
الشباب مش لاقين شغل من سنين وقاعدين عالقهاوى يشتغلوا شهر
ويقعدوا شهور لا مشغلة ولا مشغلة .. العيال دول مش بس خطر على
نفسهم دول خطر علينا كلنا، أومال حيتجوز إمتى ويبقى له بيت
■ خلينا خطوة خطوة

اليوم الثاني

■ مالك يا حبيبي، واقف كده ليه، فيه حاجة؟

— بصراحة يا بابا

■ قول يا حبيبي عاوز إيه

- بصراحة يابابا ... أنا عاوز عشرين ألف جنيه
- إيه !! كام ؟! ليه ؟! قصدى حتعمل بيهم إيه ؟
- بصراحة يابابا ... حأدفعهم رشوة
- رشوة !!! إنت عاوز تدفع رشوة ؟!!! إبنى أنا يدفع رشوة ؟!! طب
- لمين وعشان إيه ؟ عملت إيه قولى
- بصراحة يابابا حأدفعهم لواحد عشان يشغلنى فى شركة بترول
-
- مالك يابابا ... أنا
- ولا حاجة يا حبيبى كنت فاكرك بتتكلم جد، إيه الهزار الثقيل ده يا واد،
- كنت حأروح فيها
- أنا..... يابابا
- يا خبر أسود، بتتكلم جد !! إحنا وصلنا للدرجة دى ! والله أنا سمعت
- الحكاية دى بس ماكتتش مصدق، حتى الوظائف بتتباع ؟!!!
- فيه وظائف سعرها أكثر من كده بكثير، بس بصراحة يابابا ماعرفتش
- أوصل لها
- الحمد لله ياخويا .. طب ووصلت للوظيفة الرخيصة دى إزاي ؟
- واحد صاحبى باباه عنده مكتب توظيف، قال إن فيه شركة بترول طالبة
- موظفين وقدم لى، رحنا وعملنا إمتحان
- وقالوا لنا حنبت لكوا، بعد كده إتصل وقالى لو عاوز تشتغل لازم تدفع
- عشرين ألف جنيه
- مين اللى حياخدهم، هو يعنى ولا حد فى الشركة ؟

— يابابا المكتب وسيط، حياخذ عمولة .. بس طبعاً الى حياخذ الفلوس
واحد في الشركة عنده حق الاختيار .. وبرضه
بياخذ الكويسين

▪ كويسين يعنى إيه ؟

— كان فيه شباب كثير قوى متقدمين، الشركة حتعين أربعة بس، أخذوا
أفضل ناس في اللي إمتحنوا وطلبوا منهم
الفلوس، واللى يدفع هو اللي يشتغل
▪ ياخبر أسود

— بصراحة يابابا أنا عاوز بس أقولك إن المسألة مش مضمونة مية في
المية

▪ كمان !!!! ياخبر أسود

— أعرف واحد دفع فلوس وإتعين فعلاً من ستين تقريباً، بس المشكلة إنه
في نهاية التلات شهور بتوع الإختبار
فصلوه وضاعت عليه الفلوس .. بس إنشاء الله أنا مش حيحصل معاي
كده لإن صاحب مكتب التوظيف إبنه
صاحبى والحكاية دى عشان تتعمل صح لازم كل الأطراف تبقى تعرف
بعضها

▪ بس فيه طرف ما حدش يعرفه، أهم طرف، الراجل اللي في إيده كل
حاجة

— الراجل ده حأعرفه بعد ما إشتغل، وبعدين هو حياخذ اللي عاوزه يبقى
ما فيش حاجة تقلقنا

- مش قادر أصدق، إنت تعمل كده
— وحضرتك عاوزنى أعمل إيه؟
- إبذل مجهود شوية، دور كويس، أنا أدفع رشوة !! هى دى التربية الى ربيتها لك؟
- ماهو يابابا ... عاوز أقول، بس، من غير ماتزعل، مش حضرتك برضه كنت عاوز تشتري إمتحان الثانوية العامة لأختى، ولغاية دلوقتى بتقول لو عرفت تجيب إمتحان تالته السنة الجاية حتشتريه؟
- أنا لما قلت كده كان عشان الى حجب مجموع أكثر من بتتى عشان أبوه إشتري له الإمتحان يبقى بيضيع فرصتها فى دخول الكلية الى عاوزاها
- طب ماهو الى حيدفع لإبنه العشرين ألف حياخد الوظيفة الى أنا عاوزها
- بس إنت عاوز تدفع رشوة
— وتمن الإمتحان ده حضرتك تسميه إيه؟
- ولا حاجة، هو إنت شفتنى إشتريته، أهو كلام، مش يمكن بأقول كده عشان متأكد إنى مش حأعرف ألاقه؟
- يابابا .. شباب كثير قوى عملوا كده، فى شركات البترول وفى البنوك وحتى فى الحكومة .. الى عاوز يتعين لازم يدفع
- إذا كانت الحكومة واخده قرار مافيش تعيين وكل الى بيشتغلوا بعقود مؤقتة . حيدفعوا ليه بقى !

— بيدفعوا يابابا .. صحيح مبلغ أقل، بس بيدفعوا وعندهم أمل ووعود
إن حيقى فيه تثبيت، وأهو الشغل بعقد مؤقت
أرحم من المرمطة فى الشوارع فى وظيفة مندوب مبيعات، تعالى شوف
على النت الشباب اللى طالبين شغل،
أهو واحد بيقول إنه عاوز يشتغل فى شركة بترول ومستعد يدفع عشر
تلاف جنيه

■ عيني عينك كده .. لا حول ولا قوة إلا بالله . يعنى بس أنا حاجيب
عشرين ألف جنيه منين ؟

— ما أنا إنشاء الله أرجعهم لك، مش حضرتك عارف اللى بيشتغل فى
شركة بترول بيقبض كام ؟

■ بأسمع، ومش فاهم إשמعنى يعنى الشركات دى اللى بتدى مرتبات
كبيرة كده

— عشان شركات عندها موارد، مش تبع وزارة البترول ؟

■ وهى عشان وزارة البترول عندها موارد تقوم الشركات بتاعتها تاخذها
لنفسها !! الموارد دى بتاعة البلد كلها مش ملكية خاصة

— يابابا إحنا مش حنصلح فى البلد دلوقتى لازم حضرتك تقولى حتعمل
إيه، الراجل مش حيستنى كتير

■ لما أسأل الأول اللى حأعمله ده حرام ولا حلال

— حاضر .. أهى الفتاوى كلها قدامى عالنت .. حلال طالما إنى أستحقها
وإنى لم أتعدى على حق حد، وإنى كفؤ للوظيفة .. الحرام بس على اللى
بياخد الفلوس .. الفتوى مكتوبة قدامى أهى .. ها يابابا حتدفع ؟

- حادف؁ حاضر؁ اللى إنتو عاوزينه حأعمله .. فيه طلبات تانى ؟
— ماتزعلش يابابا.. كل اللى حضرتك صرفته عليا من يوم ما إتولدت
لغاية دلوقتى؁ لو مادفعناش العشرين ألف
دول؁ يبقوا زى قلتهم
- كده !! كتر خيرك يا إبنى
— مش قصدى يابابا .. أنا قصدى
- فاهم .. خلاص
— طب حضرتك حتجيب الفلوس مين ؟
- حأبيع العربية؁ ماهى مركونة؁ مش لاقى بنزين تمانين .. بس لما
حضرتك تشتغل فى شركة البترول إبقى فهمنى البنزين بيروح فىن

٥ أغسطس ٢٠٠٨

مدرس بالحصّة

- باب اللوق يا أسطى ؟
- إتفضل، بس ممكن تشرح لى السكة
- معقولة أسواق تاكسى وماتعرفش باب اللوق ؟!
- لأ أعرف بس مش واخد بالى أروح من هنا إزاي، أصلى لسه جديد ونازل القاهرة من حوالى إسبوع بس
- طب خليك على طول، ونزلت القاهرة ليه بقى ؟
- قلت أستغل فرصة أجازة نص السنة وآجى أشوف القاهرة أحسن ولا بلدنا
- هو إنت بتشتغل إيه فى بلدكوا ؟
- مدرس
- معقولة !! إزاي كده !! مدرس وتيجى تشتغل سواق !!
- ده بالنهار بس، لكن بالليل لقيت شغلانة فى كافيه حلوة قوى، بأقدم شيشة للزباين
- إنت فرحان !! ده أنا مش مصدق، مدرس !!!
- مستغرب ليه ؟ هو حضرتك مش سامع المشاكل بتاعة المدرسين اليومين دول ؟!
- سمعت إنهم حيدوكوا الكادر ويزودوا مرتباتكوا مية فى المية . ولا إنت سقطت فى إمتحان الكادر ؟
- لأ، أنا مادخلتش الإمتحان، أصل أنا مدرس بالحصّة

- يعنى إيه ؟!! عمرى ماسمعت إن فيه مدرس بالحصّة
- دى حاجة كده عاملة زى عمال اليومية، الحصّة بجنيه ونص، يعنى بأقبض فى الآخر ما بين تسعين وميت جنيه
- إنت بتشرح بيا، صح ؟ عاوزنى أزود لك الأجرة !!
- أبدا والله .. أنا حأشرح لك .. المفروض إنى آخذ مية وأربعين جنيه بس ساعات بيبقى فيه أجازات رسمية فتروح علينا الحصص بتاعة اليوم ده، يعنى عندك مولد النبى جه يوم إثنين، اليوم ده عندى فيه أربع حصص، أجرتهم راحت منى
- يا إبنى والنبى إوعى تكون بتضحك عليا
- طب إسأل حضرتك عشان تصدق، أنا بقالى تسع سنين متخرج ولسه بيسمونى شباب الخريجين، إتعاقدوا معايا ومع غيرى بالحصّة عشان يسدوا العجز فى المدرسين، وكل شوية يقولوا لنا حنغير العقد بتاعكوا لعقد مميز، وبعدين يطلعوا بيضحكوا علينا
- إيه العقد المميز ده ؟
- المميز بتلتمية إثنين وعشرين تجنيه، والأجازات مش بتتخصم، ياريت لو حضرتك تعرف حد فى وزارة التربية والتعليم تساعدنى . ولو إنه مش حيفرق كثير
- إزاي ؟! ده حىخلى مرتبك ي زيد تلتمية فى المية .
- عارف الميت جنيه دول بتوع المرتب، يادوب بأخذ بيهم التوك توك عشان أروح المدرسة وأشتري ساندويتشين فول وطعمية
- طب وبتعمل إيه ؟! أكيد بقى بتدى دروس خصوصية

— لمن يا أستاذ؟ مدرسين الطلبة الغلبة أغلب منهم، مافيش عندنا في البلد حد يقدر يدفع ثمن دروس خصوصية، أنا بألقط رزقى، بأروح بلد جنبنا وأشتغل نقاش، ماهو مش معقول أشتغل في بلدنا وأدخل بيت ألاقى ولد من تلامذتى

■ ياخبر، ياريتنى أقدر أعمل لك حاجة بس مأعرفش حد في الوزارة، طب ماتروح إنت لوحدك وتحاول

— الحكاية مش سهلة، نظام التعيين له طريقة، بتنزل إعلانات مسابقة في مديريات التعليم نروح نقدم، بتوع القاهرة ممكن يتعاقدوا في الوزارة ودول بيعملوا لهم عقود مميزة مدتها خمس سنين، لكن في الأقاليم العقود المميزة دى بالواسطة، دلوقتى الوزير قال إنهم حيلغوا العقود الى بالحصه بس ده في التعاقدات الجديدة، إحنا محدش سائل فينا، تعرف حضرتك إن فى أى وقت ممكن يرموا العقد بتاعى ولا لينا حقوق ولا تأمين صحى ولا تأمين اجتماعى ولا أجازات عارضة، يعنى لو ربنا إدانى عمر مش حآخذ معاش

■ إنت بتفكر فى المعاش!! خيلنا فى المصيبة اللى إنت فيها دلوقتى

— لأ لازم أفكر، هو أنا حأفضل مظلوم فى البلد دى لغاية ما أموت وكل طموحى إنى أتحول من العقد أبو مية للعقد أبو تلتمية؟ المدرسين يا أستاذ أغلب فئة فى مصر، يبقى عاوزين البلد تتقدم إزاى؟!

■ لا حول ولا قوة إلا بالله، عندك حق والله، بس لو عملت العقد المميز حتاخذ الكادر، مش كده برضه؟

— لسه لما أمتحن، والله يا أستاذ إحنا بعد ده كله بنقبض كل ثلاث أربع شهور، لو كان عندنا في البلد مدارس خاصة كنت قدمت فيها

▪ يعنى المدرسين في المدارس الخاصة حالهم أحسن

— طبعا . بس بصراحة مش كل المدارس .. المدارس الكبيرة والأجنبية لكن دى الوصول ليها صعب قوى، بس الطلبة بتوع كليات التربية بيعملوا إيه ياخدوا في الجامعة كورسات ماث - رياضيات يعنى - وكمان إنجليش - يعنى إنجليزى - ولما يتخرجوا يلفوا على المدارس وهم وحظهم، أما المدارس الخاصة العادية حالهم مش فارق كثير حتى فيهم الى مش عارفين ياخدوا الكادر

▪ إزاي !! الوزارة قالت كلهم حياخدوا

— أصحاب المدارس قالوا حنجيب مين إذا كانت الوزارة منعت زيادة المصاريف

▪ أنا بعتولى ورقة مع بتتى إنهم عاوزين ميت جنيه عشان يدفعوا للمدرسين الكادر

— واحد صاحبي بيشتغل في مدرسة خاصة، أول السنة عملوا معاه عقد جديد بنص المرتب، وبعدين حطوا عليه الكادر فرجع لنفس المرتب .. وفيه مدارس تانية ولا إدوا الكادر ولا حتي العلاوة الاجتماعية بتاعة السنة اللي فاتت .. ظلم، ظلم، ظلم

▪ هدي نفسك بس

— أنا مش عارف إزاي الوزير بينام وهو عارف إن فيه ناس مظلومة الظلم ده كله .. تعرف حضرتك إن واحد كان من تلامذتى دخل كلية التربية

وإتخرج، راح الوزارة عملوا له عقد مميز، وجه إشتغل في نفس المدرسة،

هو دلوقتي بياخد تلتمية، وأنا لسه محلك سر !

▪ معلىش، ربنا كريم، بكرة تتعدل

— بكرة أنا مهدد بفسخ العقد

▪ ليه تانى ؟!

— عشان لازم أمحي أمية خمس مواطنين في البلد

▪ يعنى إيه ؟!

— ماهو فيه قرار إن المدرسين لازم يمحوا أمية خمس مواطنين في ثلاث

شهور، وهددونا اللي مش حيعمل كده، حيفسخوا عقده.. وفضلوا

يقولوا لنا كلام كبير قوى، زى خدمة البلد، والخدمة العامة،

وماتقولش إيه إدتنا مصر

▪ ماهو عندهم حق يا إبنى

— وهي خدمة البلد دى واجبنا إحنا بس !! مش الكل لازم يخدم البلد

زينا، إشمعنى إحنا ؟!

▪ عشان إنتوا مدرسين، إنتوا اللي تقدرنا تعلموا الناس دى

— وإذا كانوا مش عاوزين، أعمل إيه، ده أنا دخت عشان أقنع أى خمسة

أميين إننى أعلمهم وماحدث راضى، أعمل إيه؟

▪ مش راضين ليه ؟!

— بيقولوا عندهم شغل، مافيش وقت لمحو الأمية، بيدوروا على رزقهم..

وبعدين لما عرفوا إننا محتاجين لهم إبتدوا يساومونا، تصدق إن فيه واحد

طلب مني خمسميت جنيه عشان أمحي أميته !!

- معقولة !! طب وانتوا حتاخدوا فلوس عالشغل ده ؟!
- مش عارف .. فيه موظف فى المديرية قال حيدونا ميت جنيه على كل واحد، والله أنا موافق، ياخد الميت جنيه إذا خدتهم ويسمح لى أعلمه ..
- لكن أجيب خمسميت جنيه منين !! هو إحنا ناقصين ذل ومهانة !!
- ذل ومهانة إيه يا راجل، ماتقولش كده
- لأ أقول .. حضرتك حتنزّل هنا ؟
- لف شوية، وإهدا ماتعملش فى نفسك كده .. أنا طول عمري بأقول إن المدرس ده حاجة كبيرة قوى
- ده كان زمان، على أيامكم، إحنا عندنا فى البلد مدرس تربية فنية، دبلوم صنایع تخصص زخرفة، لقى إعلان إنهم عاوزين مدرسين فى المناطق النائية، راح قدم كان فاكر إن عشان ماحدث بيروح هناك حيقبض كويس، عارف حضرتك لقى العقد بكام ؟!
- بكام ؟
- أربعين جنيه !!
- لأ مش معقول
- ماهم بيقولوا له إنت مؤهل متوسط
- وإيه اللى جابر كم علي كدما دى حاجة تقصف العمر
- أنا لما اشتغلت بالحصة من الأول كان عندى أمل إن الأمور حتتغير، ولما إبتدوا يتكلموا عن الكادر وتطوير التعليم، والسلام الكبير ده كله، الأمل كبر، وما أخبش عليك، أنا مدرس، وبأحب شغلى، ولسه عندى أمل حضرتك رأيك إيه ؟

.. طيار طار حلمه .. طيار طار حلمه .. طيار طار حلمه .. طيار طار حلمه ..

▪ أكيد فيه أمل، طبعاً، مش ممكن الوضع ده يستمر، الوزير لازم يعمل حاجة

— أنهى وزير؟!

▪ وزير التربية والتعليم طبعاً

— المشكلة كلها فى الميزانية

▪ يعنى إيه؟

— أكيد ميزانية رواتب المدرسين فى الوزارة قليلة، ولازم تزيد

▪ إنت عاوز تقول إن مين المسئول؟!

— بيتهيالى كده الحكاية دى فى إيد الدكتور بطرس غالى

▪ الدكتور غالى!!! ربنا يدك طولة العمر

٣ فبراير ٢٠٠٩

سوق السبارات

اليوم الأول

- سلامو عليكم
- وعليكم السلام، إتأخرت كده ليه ؟
- العربية اتخطت
- يامصيتي.. إزاي ؟
- رحت الجرنال أعمل إعلان لبيع العربية، لقيته حيتكلف تلتमित جنيه، واحد قال لي إعمله أحسن في جرنال الإعلانات اللي بيتوزع ببلاش، مش حيتكلف أكثر من ثمانين جنيه.. خرجت لقيت العربية مخطوطة، وواحد ابن حلال واقف جنبها، قالي إنه أخذ نمرة الميكروباس الى خطها
- طب وعملت إيه ؟
- ولا حاجة، حأعمل إيه يعنى ؟ أخذت النمرة ومشيت
- وليه ماروحتش القسم تعمل محضر ؟!
- ومن إمتى الى بيعمل محضر بيعرف ياخذ حقه !! المحضر ده عشان أخذه أرفع بيه قضية.. والى حيحصل إنى حأقعد في القسم ثلاث أربع ساعات، وبعدين أخذ المحضر أرفع بيه القضية، تفضل كام سنة في المحاكم، وحتى لو إتحكم لي، مش حأعرف أخذ حاجة، ومش حينوبنى غير إنى أصرف على القضية أكثر من الى حأصلح بيه العربية

- وهو القانون الجديد بتاع المرور، ماعملش حاجة في المشكلة دي؟
- القانون معمول عشان ياخدوا مننا .. لكن حيتعبوا نفسهم ليه، ويفكروا
إننا لينا حق المفروض ناخده!! دي حاجة ماتهمهوش خالص
- مش إحنا لما بنجدد الرخصة بندفع تأمين إجباري!! مش المفروض
التأمين ده يصلحوا لنا بيه العربية!!؟
- لأ.. التأمين الإجباري ده معمول عشان... مش عارف الحقيقة معمول
ليه
- مش بيزيد كل سنة برضه؟!
- بيتهيألى إنه معمول "محبة" كده لشركات التأمين!! يعنى عشان
يشغلّوهم
- يعنى يا ربى مافيش حاجة في البلد دي تتعمل لمصلحتنا أبدا!!
- المفروض يبقى فيه محكمة مخصوصة لحوادث المرور، تحكم بسرعة..
ويكون فيه تأمين فعلا ضد الحوادث يصلحوا لنا بيه العربيات، بس
يزودوه على الناس اللى بتعمل حوادث كثير، ويخفضوه للى ماشين
صح.. القوانين دي موجودة في كل الدنيا
- لكن إحنا لينا ربنا
- طب إيه رأيك، أصلح العربية، ولا أبيعها كده؟
- هي حتكلف كام؟
- مش أقل من ألف جنيه، قطع الغيار بقت نار.. غير الوقت اللى
حنضطر نستناه
- يا خبر.. طب لو سبيناها مخبوبة، ده حيققل سعرها كثير؟

- مش عارف .. بأقول أسيبها ونشوف
- وحتعمل إيه ؟
- حأعمل الإعلان أبو ثمانين جنيه .. أنا جعان قوى، هو الغدا إيه النهاردة؟
- رجعت متأخرة من الشغل قلت أجيب معايا تونة، لقيت علبة التونة بقت بسبعة جنيه !! يعني أجيب أربع علب بثمانية وعشرين جنيه !! ليه ؟! جبت بطيخة وقلت ناكل جبنة وبطيخ
- حلو .. الدنيا حر قوى والبطيخ يطرى شوية
- ماهى البطيخة طلعت بايظة .. الراجل المفترى حقنها مية عشان وزنها يزيد، باظت
- معقولة ماحدث بقى عنده ضمير خالص !!
- جبت عدس وعملت كشرى إسكندرانى .. تصدق كيلو العدس بقى بستاشر جنيه !!
- إشمعنى العدس الى مش حيفلى !! هاتى الأكل خلى الواحد يتخمد شوية
- والنبي ما تضايق نفسك، يمكن خبطة العربية دى فدت حاجة تانية
- ماهو الولد مستعجل، خايف بيع العربية ياخذ وقت، وواحد تانى يشتري الوظيفة
- بص بقى .. إنت تعمل الإعلان، وكمات يوم الجمعة تروح سوق العربيات الى فى مدينة نصر .. يقولوا الى عاوز يبيع أو يشتري يروح هناك .. وربنا يوفقك، يمكن تبيعها وإنت واقف
- يا رب

اليوم الثاني

- يعنى برضه ما إتباعتش !! تفتكر الخبطة هي السبب ؟
- واحد تاجر قالى صلحها أحسن عشان اللى عاوز يشتري لما يشوفها كده يفتكر إنها بايظة خالص، وده يقلل سعرها
- لسه حنستنى لما تتصلح !! الوظيفة مش حنستنى
- يعنى أعمل إيه ؟ قالوا لى روح بدرى عشان تلاقى مكان، وصلت الساعة ثمانية ونص، وبرضه مالاقيتش .. ركنت بره السوق، إيه الزحمة دى، كل الناس عاوزة تبيع عربياتها !!
- ماهو طول عمره السوق ده كده
- لما وصلنا أنا والولد قلنا نفطر الأول، دخلنا محل فول وطعمية وطلبنا طبقين فول، الطبق يادوب مايكفيش حاجة، وبعدين فوجئت ان تمناه ثلاثة جنيه ونص
- ما أنا قلت لك أعمل لكم ساندويتشات
- مش الفكرة .. أنا بأقولك اللى حصل .. إزازة المية الصغيرة، بإثنين جنيه، والسوق مليان بتوع الحاجة الساقعة، وحلويات وبسكوت، وكله أسعار سياحية، مش فاهم ليه يعنى .. تفتكرى المكسب ده كله بياخده الباعين ولا السوق بيشاركهم ؟
- المهم .. حصل إيه ؟
- وقفنا جنب العربية، كل شوية واحد ييجى يسأل بكام، نقوله، يسبينا ويمشى .. كثير !! ييجى ساعتين .. بعد كده بدأ ناس غيرهم ييجوا يسألوا ويفاصلوا، ينزلوا مبلغ واحد، كلهم يقولوا نفس المبلغ
- يبقى أكيد هو ده السعر بتاعها

■ أنا قلت زيك كده، وبعدين طلع فى دماغى أسيب الولد جنب العربية
وَألف شوية، قلت أشوف باقى العربيات بيحصل معاها إيه.. لقيت
الحكاية بتتكرر

— قصدك إيه ؟

■ مافيش زباين رايحة تشتري، كل الموجودين رايعين بيععوا، واللى مالى
السوق هم التجار.. كل تاجر من دول له مكان، ومعاها فريق.. الأول
يلفوا، يعرفوا العربيات الموجودة وتمنها المعروض، ويرجعوا يخطوا
السعر الى عاوزينه وبعدين يلفوا تانى عشان ينزلوا الأسعار

— وإزاي السوق سايبهم كده ؟!

■ دايبا أسئلتك مستفزة.. الحكاية واضحة، السوق مليان رجالة، كل
رأس ما لهم جردل ومية وصابون، واقفين بس عشان يغسلوا العربيات،
وياخدوا فى كل عرية عشرين جنيه

— رزق، وشطارة

■ طب يافالحة ورينى شطارتك وقولى لى أعمل إيه

— هم التجار دول وصلوا معاك لكاه ؟

■ أقل من السعر الى أنا عاوزة بعشر تلاف جنيه

— ده معناه إن الأسعار نزلت

■ أسعار إيه الى نزلت، ما أنا لسه شارح لك الفولة.. هو إنتى شوفتى أى
عربية جديدة فى الإعلانات سعرها نزل ؟!

— الصراحة لأ.. دى يمكن زادت

■ إسمعنى بقى حاجتنا إحنا الى أسعارها تنزل !! أنا أفهم لما سعر عربيتى
ينزل يبقى السوق كله نزل، زى ما أبيع رخيص أشتري رخيص. لكن
أبيع رخيص وأشتري غالى، يبقى فيه حاجة غلط !!

- هو إنت ناوى تشتري عربية جديدة ؟!
- مش حارد عليكى
- إيه اللى مزعلك بس ؟ أنا عاوزة أفهم
- أنا عاوز أقولك ان إحنا اللى بنرخص .. إحنا وكل اللى بنملكه، عربيتى
وبيتى وحياتى .. كلها دلوقتى بتباع بالرخيص
- والله ما أنا فاهمة حاجة
- ولا أنا .. مش فاهم اللى بيعحصل ده لمصلحة مين بالضبط .. حد يقول
إنى أضطر أبيع عربيتى عشان أشتري وظيفة لإبنى !!
- بالراحة شوية، أحسن يسمعك
- هو أنا خايف منه !! أنا خايف عليه .. ولد متفوق، طلع الأول والكلية
رفضت تعيينه، ماشي، حنصديق إنهم مش عاوزين معيدين فى القسم
بتاعه، لكن وظيفة محترمة، هو يستحقها، وأكثر واحد تخصصه
يناسبها .. حد يقول يشتريها !! يبقى، احساسه إيه بعد كده ؟! تفتكرى
ممكن ينحج ويشغل بذمة وضمير !!
- لأ .. إلا دى .. إبننا زى الفل
- ما أنا عارف .. ده حتى هو اللى قالى إوعى تبيع يا بابا إلا لو جالك
السعر اللى العربية تستحقه .. صعب عليا قوى مش عارف أعمله إيه
- بص .. أنا حابيع حنتين الذهب بتوعى وبتوع البنت، ونحاول نستلف
الباقى .. ونبقى نسدد لما نبيع العربية
- بيعى الذهب .. ولو إحتاجنا حاجة تانية، نبقى نبيع العيال

١٢ أغسطس ٢٠٠٨

طبار طار حلمه

- برضه نازل ؟
- عاوز حاجة يابابا ؟
- عاوز أعرف بتروح فين كل يوم
- بأدور على شغل
- شغل إيه اللى بتدور عليه بالليل كده، اللى بيدور صحيح يبقى الصبح
- الشغل بتاع الصبح خلص
- يعنى إيه الكلام ده ؟
- الناس اللى بيشتغلوا الصبح بيستغنوا عنهم دلوقتى، إقرا الجرايد
- مش للدرجة دى يا حبيبى خلى عندك أمل
- أمل فى إيه، إذا كان فى ثلاث شهور عدد العاطلين زاد ثمانية وثمانين ألف
ولسه يقولك نص مليون واحد حيقعدوا فى بيوتهم على آخر السنة،
يبقى اللى زى حىلاقى شغل !!!
- ده إنت زى الفل، طول عمرك متفوق وطلعت الأول، وكان مفروض
تتعين.....
- تصدق يابابا أنا ندمان على التفوق اللى ضيّع منى حاجات كتير فى سنين
الدراسة دى كلها
- إوعى تقول الكلام ده

— ليه .. يعنى لو كنت سقطت لى كام سنة كده، واحدة فى إعدادى،
وواحدة فى ثانوى، وإثنين تلاتة فى الجامعة، مش كان زمانى لسه فى
الكلية ومش مطلوب منى أعمل حاجة غير الدراسة
▪ بس كل اللى يعرفوك بيحلفوا بأخلاقك وتفوقك

— وفى الآخر كسبت أياه، ما أنا عاطل أهو
▪ إوعى تفتكر إنى ساكت، أنا موصى كل الناس، تعرف إن أمك عاوزة
ترفع قضية على الجامعة عشان تتعين معيد

— أنا مش موافق وقلت لكم قبل كده خلاص الحلم القديم ده أنا
صحيت منه، ومش مستعد أبقي معيد عشان أقف أعمل إضراب أو
إعتصام مع أساتذتى اللى مش لاقين ياكلوا

▪ لأ، هم بيعملوا كده عشان يرفعوا مستواهم، مش لاقين ياكلوا دى
كلمة كبيرة قوى

— ماتفرقش يا بابا، قول لما تنسى حكاية القضية دى وإنشاء الله تسمع
أخبار كويسة قريب
▪ أيه .. طمنى

— يعنى، واحد صاحبى واعدنى بشغل
▪ فين؟

— بعدين يا بابا، لما يرد عليا حاقولك
▪ إوعى يا إبنى تقبل أى شغل، أنا مش حأوافق أبدا إنك تشتغل إلا فى
تخصصك

— وأنا مستغرب قوى موقفك ده

■ بقى بعد سنين التعب دى كلها تشتغل أى شغلة !! ماينفعش يا حبيبي،
ماينفعش

— لأينفع يا بابا ' ولازم حضرتك تحضر نفسك إننى عمري ما حاقدر
أشتغل فى تخصصي، مش حالأقى، لو حضرتك تلاقى لى ماشى، ياريت
■ قصدك إيه، قصدك إننى مقصر فى حقك !!؟

— لأ مش قصدى، أنا أقصد.....

■ أنا مش مقصر، إنت لما جيت وطلبت منى عشرين ألف جنيه عشان
تشتري الوظيفة بتاعة شركة البترول، أنا رفضت؟! ماترد
— لأ، وافقت

■ مش كنت حأبيع العربية عشان أديك الفلوس وعملت إعلان ونزلت
وإتبهدلت فى سوق العربيات يوم بحاله .. حصل ولا ماحصلش ؟
— حصل

■ مش كنت مستعد أخسر فى تمنها عشان أجيب لك الفلوس وإنت اللى
قلت خلاص مش عاوز

— قلت يا بابا، عشان الوظيفة كانت إتباعت خلاص

■ يعنى أنا السبب برضه، أنا اللى إتأخرت وماعرفتش أبيع العربية ؟

— هدى نفسك يا بابا، أنا كنت عاوز أقول لك إننى مش حالأقى الوظيفة
الى حضرتك مستنيها

■ ليه؟! ليه؟! يعنى كل الشباب اللى فى الجامعة دول حيطلعوا يشتغلوا
نفس الشغلانة، يبقى إيه لازمته التعب والتخصص؟! !!

— بص يا بابا، خمسة وتسعين في المية من الشباب العاطلين متعلمين. يعنى معاهم مؤهلات عليا ومتوسطة، مش لاقين شغل يعملوا إيه، بيقبلوا أى شغلانة، واحد صاحبي من الدفعة اللى قبلت بيشتغل عامل نضافة في المطار، لقي الشغلانة دي بواسطة كبيرة قوى، تعالى شوف خريجين الجامعة اللى بيشتغلوا دلوقتى سواقين وبياعين ومربيات أطفال .

■ مش معقول، مش ممكن الحكومة حتسيبهم كده

— يا بابا الحكومة نفسها عينت خريجي الجامعة عمال نضافة في إدارة تعليمية وإشترطت عليهم يشتغلوا بالإعدادية ورافضة تعترف بشهادتهم الجامعية أو تحسن وضعهم، طب روح في أى مكان طالب موظفين وشوف الطوابير، إقرأ صفحة الحوادث وشوف الجرايم اللى بيرتكبها خريجين الجامعة زادت إزاي، كل ده ليه ؟

■ لا حول ولا قوة الا بالله

— يا بابا أنا لسه قارى في الجرايد إن إتناشر ألف شاب إنتحروا في مصر في الأربع سنين اللى فاتوا عشان مش لاقين شغل

■ إيه اللى بتقوله ده يا حبيبي، إنشاء الله حتلاقي أحسن شغلانة، أنا متأكد وعندي أمل كبير

— ماهي حكاية الأمل الكبير دي هي اللى مجناني، وكل كلامي عشان بأحاول أقنعك إن أى شغلة تيجي لازم أقبلها، ومش حافضل أستنى المصروف وأنا في السن ده

■ عاوز فلوس يا حبيبي ؟ قول ماتتكشفش، خد أدى كل اللى معايا

— متشكر يا بابا أنا معايا فلوس

- معاك كام ؟
- معايا، لو إحتجت طبعاً حاقولك
- مالك إتلخبطت كده ليه، فيه إيه ؟
- مافيش حاجة، عن إذنك لازم أنزل أحسن إتاخرت
- تعالى هنا إتاخرت على إيه ؟ رايح فين ؟
- فيه إيه يا بابا ؟
- معاك كام ورينى، طلع كل اللى فى جيبيك، إيه ده جبت الفلوس دى منين ؟!
- إهدا وطى صوتك أحسن ماما تسمع
- إقفل الباب وقولى بتعمل إيه، لأ ماتقولش خايف أسمع .. بس ماينفعش لازم أعرف
-
- إتكلم يا ولد، جبت الفلوس دى منين ؟!
- بصراحة يا بابا ... أنا إشتغلت
- إشتغلت !! إزاي ماتقوليش، ومن إمتى ؟!
- من إسبوعين
- وشغل إيه ده اللى بيقبضوا منه بعد إسبوعين، إوعى يا إبني تكون عملت حاجة غلط
- أبدا والله
- يعنى إشتغلت إيه وإزاي، إذا كنت طول النهار نايم وبتنزل بعد العصر وماترجعش إلا الساعة إثنين بالليل

- وساعات بعد كده بس بتبقوا نايمين
- إتكلّم بقى .. إشتغلت ايه ؟
- طيار
- إتأدب يا ولد .. حتريق على أبوك !!
- أبدا والله .. أنا اشتغلت طيار فى مطعم وميعادى جه وكده حأتأخر
- مش حتنزل إلا لما أفهم، يعنى إيه طيار فى مطعم ؟
- يعنى بأوصل الأوردرات على الفيسبا
- إيه !! إزاي تعمل كده ؟ وإزاي ماتقوليش ؟!
- عشان ماكنتش حتوافق
- طبعاً مش حأوافق ومش حأتنزل ومش حترجع الشغل ده تانى
- يا بابا أنا اشتغلت بواسطة كبيرة، شباب كتير كانوا متقدمين لها وكلهم متخرجين من الجامعة، وكان صاحب المطعم كان عاوز طيار عنده خبرة بس ابنه صاحبى وهو اللى صمم وزن على باباه لحد ما وافق يشغلنى، وكان ساعدنى أطلع الرخصة
- إنت !! هى دى آخرتها، ده إنت كان مفروض تبقى أستاذ فى الجامعة وتعمل ماجستير ودكتوراه
- عارف حضرتك لو أنا فى أى وظيفة لما آخذ الماجستير كنت حأزيد أربعة جنيه والدكتوراه ستاشر
- يعنى إنت عاوز تفهمنى إنك مبسوط !
- لغاية دلوقتى مش متضايق ولو إن حظى وحش
- قصدك إيه ؟

— الفلوس الى معايا دى التيبس، يعنى البقشيش، يوم يطلع لى خمسة جنية
ويوم عشرة، واحد زميل قديم بيقول إن الأزمة المالية دى خلت
الطلبات تقل وكمات التيبس

▪ ومرتبك كام إنشاء الله ؟

— ميتين وخمسين جنية، لو كانت الفيسبا ملكى كان المرتب يوصل
لخمسميت جنية

▪ يا خسارة تعبنا معاك !!!

— لأ صاحب المطعم أكد لى إن بعد شهرين حيزودنى، بس حاقبض على
قسطين . قسط أول الشهر وقسط فى نص الشهر، عشان يضمن إنى
أستمر معاه

▪ يا سلام !!!!

— ده كمان بيدينى خمسين جنية مصاريف للفيسبا، بس لو خلصوا ملوش
دعوة أكمل أنا من معايا، من فلوس التيبس

▪ إنت يا حبيبى، يا أملى وحلمى، ومسمى نفسك طيار، الله يسامحك

— مش أنا، الشغلة إسمها كده، طيار، يعنى بأطير عالارض عشان أوصل
فى الميعاد، أصل الزباين بيزعلوا قوى لو الأوردر إتأخر، وحضرتك
عارف زحمة المرور، عشان كده صاحبي نصحنى أشتغل شيفت الليل،
الشوارع أهذا والطلبات أكثر

▪ دى شغلة كلها مخاطر، الشوارع مابتزحمش وإنت طيار، ممكن أى حاجة
تحصل - لا قدر الله - وكمات بتروح بيوت ناس مانعرفش أصلهم من
فصلهم

ناكل إيه النهاردة؟؟!

- إيه ده.. حنطّر رز؟؟!
- آه
- يعنى إيه؟؟! لأ، مش حافط رز.. قومي هاتى الفول
- ماشى.. بس مافيش عيش، حتاكل فول إزاي، بالشوكة؟؟!
- وماقلتيش ليه من إمبارح، كنت جبت معايا وأنا راجع من الشغل!!
- العيش مش حيدخل البيت.. ده قرار نهائى
- مين اللى قرر؟؟!
- أنا
- بمناسبة إيه إنشاء الله؟؟!
- إنت مش عايش فى البلد دى ولا إيه!! مش قرئت حكاية القمح الروسى البايظ اللى إستوردوه!! ولاّ عامل نفسك مش واخد بالك!
- قرئت، بس قرئت كمان إنهم مسكوه، ولسه فيه عليه كلام.. يعنى العيش اللى فى السوق من قمح تانى.. إنتى بتلككى؟؟!
- مسكوه!!! طيب.. أنا بقى قرئت إن تسع تلاف طن منهم إتسربوا قبل التحقيق ما يبتدى
- يعنى العيش اللى عندنا، فى الشارع بتاعنا بالذات، هو اللى إتعمل من التسع تلاف طن دول؟؟!

— جاز آه و جاز لا، بس الى قريته عن الشحنة دى يخلى الواحد يقرف
من أكل أى حاجة داخل فيها القمح.. تصور الكيلو الواحد فيه مية
و واحد حبة سامة و خبيثة!!

▪ يعنى إيه؟!

— أنا عارفة!! بيقولك عبارة عن تسعة وعشرين حبة من الحشائش
السامة، وإثنين وسبعين حبة خبيثة.. إزاي ناكل عيش وإحنا عارفين إن
ممکن الرغيف الى قدامنا معمول من القمح الروسى!!؟

▪ يا ستى مش منه.. حتى لو الكمية دى إتسربت، حتكفى إيه ولا إيه!!؟

— طب والأوكرانى الى إستوردوه من كام شهر!!؟

▪ لأبقى.. الأوكرانى قالوا إنه مش بيضر الصحة

— ما أنا فضلت عاملة نفسى مصدقاهم من ساعتها لغاية دلوقتى

▪ وإيه الى جد!!؟ ما تكمل على كده وإفضلى عاملة نفسك مصدقة

— مش قادرة.. فاكرك السمك الفيتنامى الى اسمه "باسا"؟

▪ وده ماله راخر!!؟ مش فى الآخر قالوا طلع سليم؟!

— لا، هم إختلفوا.. ناس قالوا سليم، وناس قالوا مسمم.. معامل

الصحة ومعامل الزراعة وقعوا فى بعض

▪ إنتى صدقتى الى قالوا مسمم، مش كده، دايمًا نظرتك سوداوية

ومتشائمة

— إدينى أمانة واحدة عشان أصدق العكس.. إمتى الحكومة بتاعتنا

صدقنا معنا أو عملت حاجة لمصلحتنا عشان أصدقها

▪ يا شيخة حرام عليكى.. مش للدرجة دى

— ما تجنّيش .. إنت بتتكلم فى إيه .. لو كنا شفنا حد إتحاسب يمكن كنت
أغير رأيى .. لكن ما حصلش .. كل اللى دخلوا البلد بلاوى وسم
هارى وتقاوى مسرطنة، وغيره وغيره، بقوا مليونيرات وطلعوا زى
الشعرة من العجين .. ومش بس كده، أكلونا كل اللى إستوردوه عشان
يثبتوا براءتهم

▪ أديكى قلتيتها، أكلنا كل الحاجات دى، وأهى صنعتنا بمب!

— صحة مين اللى بمب؟! المصرين كلهم عندهم فيروس سى، وأمراض
تانية كتير عمرنا ما كنا نسمع عنها .. والله الواحد نفسه يروح يجلل،
بس أرجع أقول الأحسن إننى أفضل كده مش عارفة

▪ بأقولك إيه .. مش حافط رز يعنى مش حافط رز

— إنت حر .. إنزل اشترى عيش، بس على أدك، أنا وولادى مش حناكل
معاك

▪ ولما أفطر رز، أتغدى إيه؟!!

— أهى دى مشكلة تانية .. حنتغدى إيه .. بجد مش عارفة

▪ حنقولى لى بقى إن اللحمية بتاعة الخنازير اللى أعدموها حنتخلط
باللحمة عند الجزارين .. وأنا حأقولك مش حيحصل

— لأ حصل .. ومسكوا جزار فى السويس ببيعها، وبصراحة أنا مستغرباك
قوى .. مش أكلونا قبل كده لحمة حمير وكلاب وحيوانات ميتة؟!!

▪ بس مسكوهم وحاكموهم وحبسوهم

— بعد إيه؟!! طب واللى لسه ما اتمسكوش؟!! بطل الطفاسة اللى إنت
فيها دى .. كل ده عشان تاكل لحمة!!

- طفاضة!! الله يسامحك، هو إحنا يعنى بناكل لحمه أد إيه؟ ده فيه دراسة بتقول إن المصرى بياكل كيلوا لحمه واحد فى الشهر، داخل فيها كمان مخلفات السلخانات وبقايا الدبايح.. غير بقى الأسعار
- أديك قلتها.. مش حنقدر ناكل لحمه.. وأنفلونزا الطيور خلطنا نخاف من الفراخ، غير سعرها اللى بقى نار.. وكله كوم وأسعار السمك اليومين دول كوم تانى
- أنا اللى نفسى أعرفه، اللحمه السودانى اللى قالوا عنها، وطلعوا وفد رسمى راح المطار استقبل الطيارات اللى جاية شايلها، وقالوا حييعوا الكيلو بخمستاشر جنيه.. حصل فيها إيه!! جابوا ألف وخمسميت كيلو، خلصوا، ويا دار ما دخلك شر
- كلناها بالهنا والشفاء.. وبعدين راحوا جابوا لنا لحمه أثيوبى، وكانت فضيحة
- ياااه... فكرتيني.. راحوا لشركة مجهولة ملهاش سابق أعمال، وإدوها الصفقة بالأمر المباشر، ومن غير ما تقدم خطاب ضمان، راحت أثيوبيا وجابت اللحمه من مناطق موبوءة، مع إن المسئولين فى أثيوبيا حذروهم ونصحوهم يشتروا من مناطق تانية
- هو ده العادى فى بلدنا.. طب مش كل الدراسات قالت إن اللانثون، اللى بيتباع بالشىء الفلانى، مصنوع من فول الصويا وبقايا اللحم المخلوط بالتوم والتوابل، وانه خطر عالصحة، وفى الآخر سايبينه يتباع فى المحلات عادى!!
- ده أنا قرئت كمان إن السمك بتاع المزارع بياأكلوه دم مجمد ومخلفات عمليات الدبح عشان يكبر بسرعة، وان ده برضه مضر

— بلاش كل ده.. تعالى شوف أى مكان وزارة الصحة بتقفله عشان بيقدم أكل مخالف للمواصفات الصحية، إيه اللى بيحصل؟!!! صاحبه يروح يدفع غرامة عشر تلاف جنيه، ويرجع يفتحه تانى يوم

▪ تصدقنى، لسه من يومين قارى إن مصانع البطاطس المقلية، أو أى حاجة غيرها مقلية، بيرجعوا يبيعوا الزيت اللى قلوا بيه لمطاعم الفول والطعمية بخمسين قرش الكيلو

— كفاية.. مش قادرة أسمع أكثر من كده

▪ لسه فيه حاجات كتير

— بأقولك مش قادرة.. تقدر إنت بقى تقولى ناكل إيه؟!!!

▪ إسمعى كلامى.. غمضى عينكى، وكلى عيش بالفول أو بالجبنه

— مش قادرة.. أولا الجبنه غالية قوى، ده غير بقى اللى بيتقال عن اللبن

المغشوش ببودرة السيراميك، بس العيش!! مش قادرة

▪ جربى

— أنا حاقولك بصراحة.. أنا كنت ناوية أعمل زى ما بتقول كده، أغمض

عينى، لغاية الراجل المسئول ما طلع فى التليفزيون وقال فى مجلس

الشعب إن الحشرات اللى فى القمح دى مشكله بسيطه، وإنها مجرد

حشرات ميتة، وممكن نتخلص منها بالغربلة

▪ طيب.. أهو حل بسيط أهو!!

— وهو كان عرف منين!! كان غربل قبل كده ولا أعجن أو خبز!! المهم

إنه إعترف إنهم استوردوا قمح مليان حشرات ميتة، مع إنهم وجعوا

دماغنا أيام القمح الأوكرانى، بالمواصفات القياسية اللى مصر عاملها

فى متطلبات السلامة.. قال إيه مواصفاتنا أعلى من المواصفات العالمية!!

.. طيار طار طاه .. طيار طار طاه .. طيار طار طاه .. طيار طار طاه ..

▪ تعرفى عندك حق فى حاجة.. أكبر غلط إننا معتمدين على الإستيراد فى أكلنا.. مع إن كل الدراسات اللى إتعملت فى مصر لقت إن المصريين أكثر بند بيصرفوا عليه هو بند الأكل ده

— هى هى.. أكلنا مغشوش.. وأكل بره فاسد ومسطن

▪ طب.. بس.. أفطر رز دى!! حاجة صعبة قوى

— كلها نعمة ربنا

▪ ما هو الدكاترة برضه قالوا إن أكل الرز الأبيض كثير مش صح

— يعنى إيه؟! عاوز رز بنى؟! مافيش مانع

▪ لأ فيه.. ده غالى قوى

— يبقى تاكل اللى قدامك وإنت ساكت.. وتحمد ربنا

▪ حامده وشاكره.. وناوية تعملى إيه عالغدا؟

— كشرى

▪ كلها نعمة ربنا

٢٦ مايو ٢٠٠٩

القمح أمن قومي .. طب والفراولخ ؟!!!

- حمد لله عالسلامة، والله زمان، من إمتى ماحدث شافك
- الله يكرمك، بصراحة أنا جاي عشان آخذ رأيك في حاجة نويت عليها،
إنت برضه كبيرنا
- ماتقولش كده، كبيركوا إيه يا راجل!
- لا صحيح أنا فكرت كثير آخذ رأي مين وقلت مافيش غيرك
- أنا تحت أمرك
- أصلى نويت أأجر فدان من الإثنين، قرار صعب، والناس في البلد قالوا
لي توكل على الله، بس أنا عمري ما كنت أصدق إنى أعمل كده
- مش فاهم، وتأجر ليه إذا كنت مش عاوز؟!!
- أصله مش جايب همه
- طب هدى نفسك كده وإشرح لي
- الحكومة حددت سعر توريد الأردب ميتين وأربعين جنيه، يعملوا إيه
دول؟!!
- أردب إيه ؟
- القمح .. السعر ده ظلم .. عارف فدان القمح بيكلفني كام، مش أقل
من ألفين وخمسميت جنيه، حرث وتقطيع الأرض لأحواض،
والتقاوى والسجاد، ده إذا جبتهم بسعرهم مش من السوق السوداء، غير
المبيدات والحصاد والدرس وأجرة العمال
- يعنى فى الآخر بتكسب كام؟

— الفدان يجيب حوالى خمستاشر أردب، يعنى آخرتها مايوصلش المكسب ألف جنيه، أعمل بيهم إيه ؟ إذا كان إيجار الفدان ألفين ونص يبقى الأحسن لى أآجره .. إيه رأيك ؟

▪ طب وإيه اللى يخلى واحد تانى يقبل يآجر بالسعر ده إذا كان مش حيكسب ؟

— ماهو مش حيزرع قمح

▪ أو مال حيزرع إيه ؟

— أى حاجة، ده فدان البرسيم بيكسب أقله ثلاث تلاف جنيه

▪ معقولة !!!

— وأكثر

▪ طب ماتآجر الفدانين

— وأقعد كده لا شغلة ولا مشغلة

▪ ولما تآجر فدان، التانى حتزرعه إيه ؟

— مش عارف

▪ أصل أنا بأقول لو كل الفلاحين بطلوا يزرعوا قمح، البلد حتعمل إيه ؟

— تستورد، ماهو ده الى الحكومة عاوزاه

▪ إزاي تقول كده، معقولة برضه الحكومة مش عاوزة الفلاحين يزرعوا

قمح ؟ !!

— هو ده الواضح، ماهم بيقلوا المستورد أرخص من المحلى

▪ معقولة ؟ !!

— يقولوا أردب المستورد بمية وثمانين جنيه بس
▪ ده دلوقتى عشان الأسعار العالمية نزلت، لكن أفرض إن السعر زاد بعد
الفلاحين ما يبتلوا يزرعوا قمح ساعتها مش حيبقى قدامهم غير الشرا
بالغالي

— ما حدش يفكر بالطريقة دى، مع إن بقى السعر اللى يقولوا عليه لسه
مش داخل فيه سعر الشحن والنقل والتفريغ
▪ مش بس كده، دول كمان بيروحوا يجيبوا قمح فاسد ومليان حشرات..
تفتكر الحشرات الميتة اللى بيلاقوها فى القمح المستورد دى، بعد ما
يتغربل زى ما قالوا، وزنها حيبقى أد إيه، وساعتها الأردب يقف
بكام؟!!!

— إنت رايق وأنا بأقطع وجايلك عشان تريحنى
▪ أريحك إزاي؟ إذا كانت مراتى محرمة علينا العيش من ساعة القمح
الروسي ده، أنا اللى بأقوله إننا لازم نزرع قمح يكفيننا وما نحتاجش
نستورد خالص

— طب أنا حاقولك حاجة تانية.. عارف الشون بتاعة القمح؟
▪ شون يعنى إيه؟

— المخازن.. أصل فيه نوعين من المخازن، أبراج وشون.. الأبراج دى
كويسة قوى وبتحمى المحصول بس بناها بيكلف كتير، عشان كده
بيخزنوا فى الشون.. الشونة بقى مكشوفة وبيتعرض فيها المحصول
لعوامل الجو والمطر والتراب وكمان السرقة، تصدق إن عشرة فى المية من
المحصول بيتلف فى الشون قبل ما يتوزع، المحلى والمستورد

- ياه .. كثير قوى
- المهمل الشونة بترفص تستلم من الفلاحين
- ليه؟
- مش عاوزين يستلموا كميات صغيرة، يقوم الفلاحين يضطروا يبيعوا للتجار .. ييجى التاجر ياخذ الأردب بميتين وتلاتين، يلم ويورد للشونة ويكسب .. والفلاح هو الى يروح في الرجلين
- حاجة غريبة فعلا !!
- الوزير بقى قال مش حاستلم أقبح درجة نظافتها أقل من إثنين وعشرين ونص قيراط
- ماهو عنده حق، ولا إيه ؟!!!
- ياسلام !!! بقى جابوا من بره قمح بايظ، السنة الى فاتت من أوكرانيا وعشان ينفع لازم يتخلط بالمصرى .. والسنة دى من روسيا مليات حشرات وبلا أسود، وأهو بيقولوا حيرجعوه .. إشمعنى بقى ؟!
- عندك حق، بس أنا عاوز أعرف ليه القمح المصرى أغلى من المستورد ؟
- عشان غلوا السهاد .. أنا حأشرح لك، إحنا كنا زمان ماشيين على نظام اسمه الدورة الزراعية، كانت الحكومة بتلزم الفلاح يزرع محاصيل معينة كل ثلاث مواسم . الموسم الأول يزرع قطن مع برسيم، والتانى درة شامية وبرسيم، والتالت قمح ورز .. الفلاح يورد المحصول والحكومة تديه السهاد بسعر رخيص .. لما إتلقى النظام ده الحكومة ضاعفت سعر السهاد وكم إن مش بنلاقه إلا فى السوق السوداء، عشان كده الفلاح بطل يزرع والحال بقى زى ما إنت شايف

- يا خسارة .. شوف وصلنا لإيه؟
- نص الأراضى فى مصر مزروعة دلوقتى فاكهة
- وده كويس ولا وحش؟!!
- اللى فكر فى الحكاية دى كان قصده إن الفاكهة بتتصدر بره، فقالوا نصدر فاكهة ونستورد قمح، قاموا عملوا إيه بقى، كتروا فى زراعة الفراولة، مع إن الفراولة بالذات بتتلف بسرعة وتخزينها ونقلها مكلف جدا
- أنا مصمم إننا لازم نزرع قمح يكفيننا وما نحتاجش نستورده، دى حاجة خطر والقمح قضية أمن قومى، أنا فاكر إن الدكتور أحمد الليثى لما كان وزير زراعة كان عنده مشروع إن مصر تحقق إكتفاء ذاتى من القمح على سنة ألفين وسبعناشر، بس قرئت كلمة قالها قريب إن الحكومة مش من أولوياتها زراعة القمح ومش مهتمة خالص بحكاية الإكتفاء الذاتى دى والدليل إن الأراضى المزروعة قمح لسه بتقل
- بتقل قوى، كان عندنا أكثر من أربعة مليون فدان مزروعين قمح وصلنا دلوقتى لأثنين مليون بس، ولسه، وإنتاجنا نزل من ثمانية مليون طن لسته مليون، مع إننا محتاجين أربعناشر مليون طن عشان نكفى إحتياجاتنا
- أربعناشر مليون!! كثير قوى، ليه ده كله؟!
- شوف.. ثلاثين فى المية من الكمية دى بيتم إهدارها فى صنع العيش اللى بيروح علف للحيوانات والمواشى الفاقد ده ممكن ينزل خمسة فى المية بس لو حد تابع وإهتم، وزير الزراعة أمين أباطة قالها، عمرنا ما حنوصل لإكتفاء ذاتى من القمح إلا إذا وصل إستهلاكنا للمتوسط العالمى

■ الى هو إيه ؟

— متوسط الإستهلاك العالمى للفرد تسعين كيلو فى السنة، الوزير قال إن المتوسط عندنا بيوصل لمتين كيلو، فرق كبير قوى مش كده ؟!

■ ماهو لو حسبنا الثلاثين فى المية المهدرة، غير إن الناس عندنا بتاكل عيش حاف عشان ما عندو مش يجيبوا غموس، يبقى عادى.. يعنى لما الغلابة دول يقدرُوا يشتروا رز ولحمة وفاكهة الاستهلاك أكيد حيقل

— عشان كده بقى فكروا فى حكاية إنهم يزرعوا قمح فى أوغندا، عشان يعملوا الإكتفاء الذاتى الى بتقول عليه

■ بالذمة ده كلام، بقى لما نزرع بره أرضنا ونقسم المحصول بينا وبينهم، ولسه الشحن والنقل، يبقى ده إسمه إكتفاء ذاتى !! غير كمان الى كتبوه فى الجرايد عن البلاد دى

— كتبوا إيه ؟

■ بيقولوا البلاد دى فيها مشاكل سياسية طول الوقت، ويمكن أى حاجة تحصل وما نقدرش ناخد الى زرعناه، وساعتها يبقى لا طولنا بلح الشام ولا عنب اليمن

— والحل !!

■ مافيش غير إننا نزرع القمح على أرضنا

— إذا كانت أرضنا كلها ستة مليون فدان صالحة للزراعة

■ ليه ؟! وإزاي مش عارفين يكتروها ويستصلحوا أراضى الصحرا دى كلها، ده فشل

— إحنا محتاجين حاجات كتير لازم تتعمل، صعبة صحيح، لكن مش مستحيلة.. المهم الإرادة والرغبة الحقيقية والتخطيط السليم

▪ زى إيه ؟

— نوسع مساحة الأراضى المزروعة قمح، وبعدين نرفع إنتاجية الفدان، بدل سبعة عشر أردب ممكن توصل لأكثر من خمسة وعشرين أردب، والآخر نمنع الهدر الفطيع للمحصول

▪ المهم النية !!

— الإستيراد ده بيدافع عنه ناس لهم مصالح، شوف مين اللى بيستورد ومين بيسمسر ومين بيعتكر !!

▪ إنت صعبتها زيادة

— إنت عارف إن ساعات بورصة القمح العالمية أسعارها تنزل جامد ولا حد يتحرك أو ينزل يشتري، يستنوا لما السعر يزيد ويروحوا يعملوا صفقات، تسمى ده إيه ؟ !!

▪ عشان أكون مؤدب، أسميه هطل وإهمال

— طب قول لى بقى، إيه رأيك، أأجر الفدان ولا لأ ؟

▪ لأ

— بعد كل اللى قلتهولك !! طب أعمل إيه ؟

▪ إعمل زى الوزير ما قال

— اللى هو إيه ؟

طيار طار طاه .. طيار طار طاه .. طيار طار طاه .. طيار طار طاه ..

■ قال كل واحد يزرع الى يريجه ويزود دخله.. شوف إنت بقى، برسيم،
فاكهة، المهم يبقى عندك فلوس، وساعتها تشتري العيش، مش أبو
خمسة، لأ، أبو خمسين كمان

— طب والبلد، والأمن القومى !!؟

■ إتكل على الله وسيب الحكاية دى لأوغندا

١٦ يونيو ٢٠٠٩

إنت مصرى !!؟

- حمد الله عالسلامة يا حبيبى .. قاعد معانا أد إيه المرة دى ؟
- على طول .. خلاص مش راجع هناك تانى
- خير ما عملت .. تقعد معانا بقى ، وكفاية كده .. إنت بقالك ييجى عشر سنين
- حذاشر يا عمى .. بس بصراحة أنا مارجعتش بمزاجى ، هم اللى نهوا عقدى
- ليه كفى الله الشر ، عملت حاجة ؟!
- أبدا .. أصل الكفيل بتاعى كان عاوز يشغلنى ساعات زيادة من غير فلوس ، ولما قلت له ماينفعش قال لى يبقى مرتبك حيقل .. كلمة منه وكلمة منى ، قال لى مع السلامة
- ولا يهملك .. إوعى تزعل نفسك
- بصراحة أنا أحسن من غيرى .. على الأقل ما حصلتش مشاكل ، ولا إتهمنى بالسرقة زى ما بيحصل لمصريين كتير .. بس رفض يدينى كل مستحققاتى
- إزاي !! طب وعملت إيه ؟!
- حأعمل إيه يعنى .. إستعوضت ربنا ورجعت
- كنت تروح تشتكيه وتحاول تاخذ حقك
- إنت مابتقراش جرايد يا عمى !! مش شايف المصريين بيتبهدلوا إزاي فى كل حته ، والسفارات ما بتسألش فيهم !!

- وهي السفارات حتعمل إيه، وما لها وما مال الحكاية دي ؟!
- إزاي تقول كده يا عمي !! الهدف الأول للعمل القنصلي والدبلوماسي في الخارج هو مصلحة المواطن.. اللي قال الكلام ده وزارة الخارجية المصرية نفسها في بيان طلعتة من سنة.. وقالت كمان إن فيه دول مابتقولش للسفارات المصرية أسامي المقبوض عليهم أو المحتجزين في السجون.. كان قصدهم يقولوا إن ده السبب إن السفارات مش بتساعد الناس دول
- طب وحيعملوا إيه في دي بقي !! ما هو مش بإيديهم
- لو كانوا بيعملوا حاجة ما كانتش الدول دي عملت كده أصلاً.. لو السفارات بتاعتنا قوية وشايقة شغلها، مافيش دولة تجرؤ إنها تعمل كده
- عندك حق.. لكن ممكن الحكاية دي تكون بتحصل مع الكل، مش المصريين بس
- لا.. ما يقدروش.. طب عارف، من فترة كده كان واحد هندي ماشي بعربيته ومعاه ابنه، جت عربية بسرعة كبيرة وخبطته، العربيتين إتقلبوا، وهو وإبنه إتغوروا، بس السعودى مات
- يا خبر.. أكيد الراجل الهندي راح في ستين داهية
- إسمع بس باقى الحكاية.. السعودى كان هو الغلطان، بس طبعاً الهندي خاف.. وهو في مكانه طلع الموبايل وكلم السفارة بتاعته، قالوا له هنجيلك عالقسم، وإوعى تتكلم إلا لما نوصل ومعانا مترجم
- وبعدين !!

— لما وصل القسم كان الكل شاكك فيه، وحس إنه حيلبس القضية.. لكن لما جه وفد السفارة الأمور إتغيرت، اضبطوا يمشوا بالقانون.. وطول التحقيق كان فيه إتصالات من السفارة عشان يطمنوا، وكان من وزارة الخارجية السعودية الى برضه سفارة الهند كلمتهم وطلبت منهم التأكيد على العدالة.. وفي المحكمة الراجل أخذ براءة وكان تعويض عن العربية والإصابات اللي حصلت له

▪ طب لو كان ده مصرى، كان حصل إيه؟!!!

— أول حاجة عمره ما كان حيعرف يتصل بالسفارة، رقم التليفون أصلا مش حيبقى عنده، ولو عرفه ماحدثش حيرد عليه، ولو ردوا مش حيعملوا له حاجة

▪ مش معقول.. مش للدرجة دى

— ليه؟!!! الدكتور المصرى المحكوم عليه بالحبس والجلد، ما سمعتش القنصل المصرى وهو بيتكلم فى التليفزيون وبيقول إنهم قدموا طلب عشان يزوروه، والسلطات هناك ماردتش عليه!! قال كمان إن دورهم يقتصر على إنهم يطالبوا إن الراجل يتعامل كويس

▪ بس قال برضه إنهم بيعملوا نقض فى الحكم وإنهم حيحضروا المحاكمة الجديدة عشان يتأكدوا إنها محاكمة عادلة

— طب وماحضروش المحاكمة الأولى والثانية ليه؟!!! عرفوا وطنشوا، ولا ماعرفوش من أصله؟!!! فى الحالتين السفارة مقصرة

▪ يعنى معقول السفارات مابتعملش حاجة خالص!!

— السفارة دلو قتي مهمتها تعمل أوراق.. السبب الوحيد اللي بيخلي المصريين يروحوا السفارة لو إحتاجوا ورقة، شهادة ميلاد، تجديد باسبور، توثيق ورقة معينة.. وياريت المعاملة كويسة.. واحدة أعرفها راحت السفارة عشان توثق شهادة، طلبوا منها تصور ورقة معينة، ورفضوا يصوروها لها، خرجت تدور علي مكان تصورها فيه، كانت وقفت من الصبح في طابور طويل قدام السفارة لغاية ما وصلت للموظف، مرهقة والدنيا حر نار.. لقت جنبها سفارة الباكستان دخلت وطلبت منهم يصوروا لها الورقة.. عاملوها أحسن معاملة، وقاموا بالواجب.. وبعدين إضطرت ترجع تقف في طابور تاني.. بهدلة يا عمى، بهدلة

▪ تصدق عندك حق.. أنا سمعت واحد مصري بيتكلم في التليفزيون، كان في تايلاند لما المطارات هناك إتقفلت.. بيقول إن المصريين لما راحوا السفارة عشان يشوفوا لهم طريقة يرجعوا مصر القنصل قاهم إن مهمة السفارة إنها تجوز وتطلق وتكفن.. والله ساعتها ما صدقتش

— يا عمى مسئول في الخارجية المصرية هنا قال ساعتها، إنه مش معقول السفارة تتحرك عشان مشكلة فردية.. ماكانش عارف أصلا عدد المصريين اللي عندهم مشكلة، في الأول قال أربعة خمسة، وبعدين قال خمستاشر.. والآخر طلّعوا أكثر من مية

▪ إلا صحيح إن سفارات تانية بعثت طيارات خاصة أخذت رعاياها من مطارات حربية

— طبعا.. أنا عمرى ما سمعت سفارة تقول إن ملهاش دعوة بالمشاكل الفردية.. لو واحد بس لازم تساعده

- بيتهألى إن السبب فى كده قلة الإمكانيات .. أكيد السفارات دى بتاعة بلاد غنية، مش زينا
- وزارة الخارجية قالت أكثر من مرة إنها حتعمل هيئة لرعاياها فى الخارج وإنها عاوزة تعمل صندوق بس محتاجين خمسين مليون جنيه
- ياااه .. وحييجيهم مين ؟
- هم عاوزين المصريين اللى بره يدفعوهم، وبيقولوا إن المصريين مش موافقين
- ليه !!! ما هو لمصلحتهم
- يمكن مش متأكدين إنهم بعد ما يعملوا الصندوق حلاقوا الرعاية .. ويمكن مش متأكدين إن الفلوس حتتخط فى الصندوق من أصله .. ويمكن حاجات كثير، بس بالذمة ياعمى حد يقول إن عشان السفارات تقوم بشغلها وترعى المصريين فى الخارج، يبقى لازم يدفعوا !!
- خلاص، مادام السفارة مش حتخدم المصريين إلا لو دفعوا، ومادام المصريين مش عاوزين يدفعوا، يبقى يقفلوا السفارات أحسن، على الأقل يوفروا المرتبات
- إزاي بس ؟ ومين اللى يهينى الجو لزيارات المسئولين الرسمية، ويوفر لهم سبل الراحة .. ومين اللى يحضر ماتشات الكورة اللى بتلعب بره، ومين اللى يحضر الإحتفالات والمعارض، ومين، ومين ؟ !!
- لأ بجد .. تعرف المصريين اللى يسافروا دول هم الغلطانين .. ليه يسيبوا بلدهم ويروحوا يتبهدلوا كده ؟ !

— وهو الى سافر كان لقي شغل في مصر وما اشتغلش !! ولا الى يشتغل
كان قدر يفتح بيت ويتجوز ويربى عياله !! ده المصري بيقبل مرتب
أقل من غيره بكثير، حتى لو كان أحسن منه في المؤهل والخبرة.. وبيقبل
أى وضع، ويتنازل عن حقوق كثير.. كل ده ليه ؟

■ ليه ليه ؟!!

— عشان مش لاقى فرصة في بلده، أنا مرة واحد هناك قال لي ما إنتوا في
بلدكوا بتتعاملوا أوحش من هنا زعلانين ليه ؟

■ وقلت له إيه ؟

— ما عرفتش أرد عليه.. كان مفروض أقول له إيه ؟

■ تقوله..... تقول إنه..... مثلاً..... تقوله أى حاجة.. إنك في بلدك
وحوالك أهلك

— عموماً يا عمى إذا كانت دى مشكلة الى بيسافرو يشتغلوا، طب
إفرض شاب مسافر يدرس، أو حد رايح يتعالج، أو حتى يتفصح.. لو
حصلت له مشكلة مش حيا لاقى حد يساعده

■ عندك حق

— بص يا عمى.. المفروض إن المصريين لما يسافرو أى دولة يروحوا
السفارة يسجلوا أنفسهم، زى أى بلد ما بتعمل، لكن المصريين
ما يروحوش لأنهم متأكدين إن الحكاية دى مش حتفيدهم بحاجة..
الى يسجلوا أنفسهم ما يزيدوش عن خمسة في المية

■ ودول الى يشتغلوا ولا الى بيدرسوا ؟

— الله أعلم.. بس أنا عاوزك تعرف يا عمى إن المصريين الى يشتغلوا بره
مهمين جداً لمصر.. حضرتك عارف إن تحويلات المصريين دول

بتمثل عشرة في المية من العملات الأجنبية في الموازنة العامة.. يعنى أد العملات الى بتدخل البلد من قناة السويس، وساعات بتزيد

▪ معقولة !! ما كنتش أعرف والله !! دول لازم الدولة تهتم بيهم قوى قوى

- بتهتم بيهم من ناحية واحدة بس
- الحمد لله، أهو إهتمام .. من أى ناحية ؟
- دى حاجة قريتها عالنت.. " إن وزارة الخارجية تعمل على تحقيق أقصى استفادة من التحويلات المالية للمصريين في الخارج في عملية التنمية الوطنية في مصر "
- إسم الله عليهم

٢٣ ديسمبر ٢٠٠٨

الشارع طين؟؟!!

- شرفتي !!
- سلامو عليكمو.. ها، عامل إيه دلوقتي؟
-
- مالك؟ ما بتردش ليه؟ لسه تعبان؟
- يعنى إنتى عارفة إنى تعبان!!
- طبعاً، وعشان كده قلت لك الصبح بلاش تروح الشغل وخليك مريح النهارده
- ولما إنتى عارفة، وقلتى لى أريح، ليه إتصلتى وصممتى إنى أنزل أنقل العربية؟؟!!
- ما أنا قلت لك.. وأنا نازلة الصبح كان صاحب المحل بيفتح، وطلب منى أنقل العربية عشان سدت عليه مدخل المحل
- وهو إشتري الشارع!! ما هو لو كل صاحب محل رفض إن العربيات تركن قدامه، مش حنلاقى مكان نركن فيه عربياتنا
- أنا خفت يعمل حاجة فى العربية، قلت أكلمك تنقلها
- يعمل حاجة فى العربية إزاي!! هى فوضى!! وبعدين القانون الجديد بتاع المرور فيه عقوبات للى بيعملوا كده
- هو حصل إيه؟؟!!
- حصل بلاوى يا ستى.. كان يوم ما يعلم بيه إلا ربنا.. لو كنت رحت الشغل كنت استريح

— طب قل لي بس حصل إيه

■ نزلت.. لقيت الشارع علي آخره، وفيه مكان فاضي قدام شوية.. أول ما طلعت بالعربية لقيت حضرة أمين الشرطة جاي ياخذني مخالفة عشان مش رابط الحزام

— يا خبر!! ليه بس تعمل كده!!؟

■ أعمل إيه!! بأقول لك كنت يا دوب بأتحرك بالعربية

— المهم، وبعدين؟

■ قلت له أنا ساكن هنا ونازل بس أنقل العربية قدام شوية.. مافيش فايده، قال إيه، القانون الجديد بيقول لازم تربط الحزام قبل ما تدور المفتاح في العربية

— يا سلام!!!! أول مرة أعرف الحكاية دي

■ قلت له يعني إنت سايب كل العربيات الي راكنة صف تاني دي، وجاي تاخذني مخالفة حزام قبل ما أتحرك من مكاني!!

— ليه بس!!؟ كنت إتكلم معاه بالراحة.. قوله حاضر.. خفك عليا.. مش حأعمل كده تاني

■ أهو الي حصل بقي.. المهم لقيت ظابط واقف بعيد شوية بيتفرج علينا، رحت وقلت له، وحكيت له كل الي حصل

— كويس، برافو عليك.. وبعدين!!

■ بص لي من فوق لتحت وقال لي، عندك كمان مخالفة لوحات

— لوحات إيه!!؟

■ قال إيه.. اللوحة بتاعتى سودا!!!

طيار طار طاه .. طيار طار طاه .. طيار طار طاه ..

— قصده النمرة بتاعة العربية يعنى؟ طب وإحنا مالنا، مش واخدينها من المرور!!!

▪ ما أنا قلت له كده، قام قال: المرور إداك نمر سودا عشان معندوش نمر بيضا!!

— يعنى عاوز إيه؟! كان مفروض نرفض النمر بتاعة المرور، ولا نعمل إيه؟!!!!

▪ كان مفروض يا ستي أنا أدهنها أبيض عشان ماأبقاش مخالف

— وإحنا كنا حنعرف مين.. أنا فاكرة إن اللى يغير أى حاجة فى النمر هو اللى يبقى مخالف

▪ ماهو ده اللى أنا قلته بالظبط، صوتي على شوية، من غلبى، راح قايل لى هات الرخص.. قلت له حاضر، حأطلع أجيبهم من الشقة فوق.. قالى مخالفة تالته.. السير بدون رخص

— يادى الحوسة.. وليه بس تنزل من غير الرخص؟!!!

▪ ما هو كله منك

— يعنى إيه، دفعت مخالفات كام؟!!!

▪ فى اللحظة دى بقى، حضرة الأمين جالنا.. قال للظابط، إتفضل سعادتك يا باشا وأنا حأتصرف معاه.. أول ما الباشا مشى، حضرة الأمين قال لى، كل سنة وإنْتَ طيب

— بمناسبة إيه؟!!

▪ من غير مناسبة.. محبة!!

— مش فاهمة

▪ إيه اللى مش فاهمة، ماهي باينة.. يعنى فتح مخك

- وإديته؟!!!
- طبعاً
- كام؟
- اللي كانوا معايا
- كام يعنى؟
- مش لازم تعرفى، أنا قلت ده واقف فى الحته كل يوم، لو زعل منى
حيحطنى فى دماغه.. المشكلة بقى إن الحكاية دى خدت وقت طويل،
والمكان اللي كنت حاركن فيه إتأخذ
- وبعدين!!
- ربطت الحزام وطلعت أدور على ركنة.. وأنا داخل الشارع الى جنبنا
لقيت حضرة الأمين واقف، ضحك لى وقال مخالفة
- تانى.. ليه المرة دى؟!!!
- بيقول سير عكس الاتجاه
- أنهو شارع ده؟
- اللي جنبنا.. اللي بندخله كل يوم ولا حد عمره قال لنا إنه اتجاه واحد،
ولا فيه يافطة بتقول كده.. حضرة الأمين قال إنهم حولوا إتجاه الشارع
من يومين ولسه حيعلقوا اليافطة، وعشان كده ساعحنى!!
- كتر خير
- كتر خير على إيه!! ماهو لسه واخذ كل اللي فى جيبى
- المهم، كمّل
- فضلت ألف حوالين البيت مش لاقى حته، كل الشوارع فيها عربيات
راكنة صف تانى، وعربيات نمرها سودا.. وأنا بس اللي وقعت من قعر
القفة

— وفي الآخر ركنت فين؟

- بعيد قوى.. وأنا راجع لقيت شابة ياعينى ماشية ومعها عربية أطفال فيها ابنها الصغير، عنده كام شهر كده، المهم، الست واقفة تعيط، العربيات سدت الشارع خالص، وهى مش عارفة تروح فين، عاوزه تطلع الرصيف بس مش نافع، الرصيف على عليها، وما فيش المطالع اللى مفروض يعملوها للمعوقين أو الحالات اللى زيها

— يا عينى.. وبعدين!!؟

- العربيات وراها مش مدياها فرصة، فضلوا يدوها فى كلاكسات، وهى ملخومة، وعصبية السواقين لخميتها أكثر.. ولا الباشا الظابط أو حضرة الأمين جم يساعدها أو يقولوا لهم إن الكلاكس مخالفة.. رحت أنا شلت لها العربية، وهى شالت ابنها.. وبعدين قالت لى خلاص سيب العربية عالرصيف وأنا حارجع البيت

— معقولة!! سابت العربية

- لأ، هى قالت كده عشان مكسوفة منى.. مشيت معاها لغاية بيتها، فضلت تشكرنى كتير قوى..

— ربنا يوقف لك ولاد الحلال

- لقيت جنب بيتها واحد بتاع دوكو، إتفقت معاه يدهن لى النمر أبيض.. تصورى حياخد خمسين جنيه!!!

— ياااه.. هو إحنا ناقصين، حنلاقيها منين ولا منين!!

- التعب كان حيموتنى، بس ما فيش معايا ولا مليم عشان أركب.. اضطريت أرجع مشى، وأنا مش قادر

- معلىش .. حقلك علىا
- الشوارع كلها زحمة، مش فاهم ليه الزحمة فى الوقت ده، وفى كل شارع تلاقى طباط وأمناء شرطة، هم اللى عاملين الزحمة .. موقفين العربيات وحضرة الأمين بيتكلم مع السواقين
- بيتكلم معاهم فى إيه؟!!
- أكيد بيقول لهم كل سنة وإنتوا طيبين .. من قرفى قلت أطلع أمشى عالكورنيش، وياريتنى ما عملت كده
- ليه؟
- عند كوبرى أكتوبر كده، وأشم لك ريحة فظيعة .. المكان زى ما يكون مراحيض عامة
- يا ساتر!!
- تصورى، كل المطالع والمنازل والسلام بتاعة الكوبرى، وباقى الكبارى، الناس بتعتبرها حمامات .. ريحة ومنظر لا يحتمل، أسوأ مكان، اللى تحت أسد كوبرى قصر النيل، قدام الفنادق الكبيرة
- إخص عليهم، إزاي يعملوا كده؟!!
- ده نداء الطبيعة .. إنتى عارفة إن مصر خرجت من تصفيات تنظيم كاس العالم بتاع كرة القدم بسبب إن ماعندناش دورات مية عامة فى الشوارع؟!!
- يا سلام!!
- ساعتها قالوا إن مجلس الوزراء وافق إنهم يعملوا حمامات ذكية، تشتغل بالكروت الذكية، وتنصف نفسها .. بس المرة بخمسين قرش

طيار طار حله . طيار طار حله . طيار طار حله . طيار طار حله .

— يا سلام!!!

- بس يقولوا حتبقي للسياح بس وممنوع المصريين يدخلوها
- أحسن برضه، كده كده المصريين مش حيقدرُوا يدفعُوا خمسين قرش كل مرة يضطروا يدخلوا فيها الحمام
- يا مؤمنة، دول كانوا عملوا حمامات في وسط البلد، وكلها كام شهر المية إتسربت وبوظت المنطقة.. قفلوها
- مش كفاية كلام في الموضوع ده.. عاوزة أقوم أحضر الغدا
- هو الغدا إيه النهاردة؟
- قلقاس
- اليوم كان باين من أوله

١٣ يناير ٢٠٠٩

اللجنة !!

اليوم الأول

■ الواحد هلك

— ها.. خلصتوا؟!!

■ لسه

— ليه؟ بتعملوا إيه ده كله؟!!

■ بنجتمع

— كل ده!!

■ الأول نفضل ندردش شوية، وبعدين ناخد إستراحة.. ونرجع نجتمع

تانى، ولما الضهر يدن نقوم نصلى، ونرجع نكمل

— إيه الهدف من تضييع الوقت ده؟

■ ماهو بكده يتحسب لنا ثلاث جلسات مش واحدة، كل جلسة بخمسة

وعشرين جنيه

— بجد، يعني أخذت النهاردة خمسة وسبعين جنيه تانيين!! طب

ومالك.. مش باين عليك فرحان؟

■ اللى بيحصل ده حرام والله، الحكاية مش مستاهلة، والمؤسسة أصلا مش

محتاجة ماكينات التصوير دى كلها.. واحدة أو إثنين كفاية، مش

إتناشر

— إتناشر!! كثير صحيح، بس إحنا مالناش دعوة

— والله حرام.. كانوا بالفلوس دى زودوا المرتبات أو عملوا مكافآت للموظفين، أو حتى حطوهم فى صندوق العلاج أو الحالات الطارئة..
أى حاجة تنفع الموظفين الغلابة

▪ ماينفعش.. الفلوس دى بتاعة المشتريات

— طب وإيه يعنى؟

▪ بند المشتريات فى الميزانية ماينفعش يتصرف فى حاجة تانية.. والسنة قربت تخلص، قالوا بدل الحكومة ماتاخذها يستفيدوا، ولسه الموضوع ماخلصش

— فيه إيه تانى؟!!

▪ عاملين لجنة دلوقتى عشان يشتروا ورق التصوير والأحبار، وطبعا الشركة دى هى الوحيدة اللى عندها، يعنى برضه المناقصة حترسى عليها

— بسيطة، مش قلت بيصوروا كام ورقة فى اليوم، يعنى مش حيحجبوا كثير

▪ لأ.. ماهو رئيس مجلس الإدارة أصدر قرار بتصوير كل أوراق المؤسسة وتوزيعها على الإدارات كلها، وذلك حرصا على الشفافية والنزاهة

— لعيب

▪ مش بأقولك السرقة سهلة قوى.. بس أنا سمعت إن الشركة اللى إستوردت الماكينات والورق والخبر حتخلص اللى عندها وتقفل

— طب وساعتها حتملوا إيه؟

▪ لسه حنشوف.. بس أكيد حيكهنوا الماكينات ويشترىوا جديد

— تعرف إنك غلطان عشان سبت اللجنة من الأول، كان لازم تقعد وتعرض .. يمكن كنت تقدر تغير حاجة

■ أغير إيه .. طب إسمعي دى .. مقرر اللجنة حكى لى إن بتاع الشئون القانونية إعترض فعملوا إيه !! بعد ما وقع على محضر الاجتماع ومشى، عملوا تعديلات

— يا خبر .. إزاي؟

■ الأوامر إن المحضر يتكتب بالقلم الرصاص، أتاى دى حاجة عادية دايا تحصل .. بعد كده رئيس مجلس الإدارة شخصيا هو اللى عمل التعديلات

— والراجل اللى اعترض عمل إيه؟

■ قال حسبى الله ونعم الوكيل، خاف وسكت .. ما هو قابض بدل حضور إتناشر جلسة فى لجنة كانت تخلص فى جلسة واحدة

— ماتفرقش

■ لأ تفرق .. هم قاصدين يورطوا الكل عشان ما حدش يقدر يتكلم

— طب خلى بالك .. إوعى تقول تانى عاوزهم يختارونى فى لجنة

■ وهو أنا مجنون .. طب لعلمك بقى هم إختارونى فعلا وأنا إعتذرت

— من غير ما تعرف اللجنة عشان إيه، مش يمكن مافيهاش مشاكل !!!

■ ما أنا عرفت .. رئيس مجلس الإدارة عامل طلبية جديدة

— ليه المرة دى؟

■ بيقولك حفاظا على سرية وثائق المؤسسة قرر يجيب لكل موظف جهاز لتقطيع الورق

٤ نوفمبر ٢٠٠٨

- كذب إزاي؟
- الراجل جه وخذ عشرين جنيه كشف، وبعدين قال إن الترومبة عاوزة تتغير، وكنهان الكاوتش بتاع الباب
- وبكام دول؟
- قال لى الترومبة بمية وأربعين جنيه وحيأخد أربعين جنيه تركيب، والكاوتش بميتين جنيه وخمسين للتركيب
- يا خبر!! ده كثير قوى
- عشان تعرف إن عندي حق.. حنجيب فلوس لده كله منين!!
- ما إحنا أول الشهر
- واحدة صاحبتى قالت لى إن كل اللى بيعملوا إعلانات دول نصابين، ولا هم التوكيل الوحيد ولا حاجة.. خدت منها نمرة مركز الصيانة
- طب عال، كلميهم وشوفي
- من أولها قالوا لى أربعة وأربعين جنيه كشف!!
- ليه!! أربعة وأربعين جنيه مرة واحدة!! ده ولا كشف الدكاترة
- إعمل حسابك، حييجوا بكرة واللى حيقولوا عليه حن دفعه
- طيب، طيب.. كنتى بس سألتهم عن الأسعار
- سألت.. طلعت الترومبة بخمسة وخمسين، والكاوتش بثمانية وثمانين..
- بس قالوا لازم الفنى ييجى الأول عشان يقرر إيه اللى بايظ بالظبط، وبعدين يجيب الحاجة
- ياااه.. كل ده فرق كان المركز عاوز ياخده!! إيه السرقة دى؟ إزاي يسيبوهم يعملوا إعلانات من غير ما يتأكدوا فعلا إنهم توكيل بجد!!

— مع إن ناس كتير إتكلمت فى الحكاية دى.. أنا بس خايفة يقول لى فيه حاجة تانية بايظة فى الغسالة

▪ ربنا يستر.. حد يقول إن غسالة تبوظ، تقومى تعملى ده كله.. مش طايقة حد وعماله تزعقى عمال على بطل

— ما إنت مش واخد بالك إن ميزانية البيت حتنضرب، مش الشهر ده بس، لأ، شهرين تلاتة كمان

▪ وحنعمل إيه بس؟!

— فاكركلما التلاجة باظت السنة الى فاتت، وطلع السبب إن الكهربا قطعت ورجعت بفولت عالى، فاكركلما دفعنا كام؟!!

▪ فاكركلما الحكاية، بس مش فاكركلما دفعنا كام

— ستميت جنيه.. غير بقى إن العامل فضل أكثر من شهر رايح جاي، يصلح حاجة وتطلع مش هى السبب

▪ آه.. كانت أيام سوده.. الله يكون فى عون الغلابة

— ما إحنا غلابة

▪ أنا بأتكلم عن الأغلب منا.. أنا برضه مدير، وإنتى موظفة كبيرة.. وحنة غسالة عاملة فينا الى ما يعمل

— حنة غسالة!! بأقول لك إنها أهم حاجة فى حياتى

▪ ماشى.. قومى ولعى النور

— ماهو والع

▪ والع إزاي!! الدنيا ضلمة قوى

- أصل ثلاث لمبات إنحرقوا
- تانى!! هو إحنا حنغير لمبة كل يوم ولا إيه!!
- آه.. كل يوم لمبة بتتحرق، الناس مابقاش عندها ضمير، بيعملوا المص
تتحرق بسرعة عشان بيعوا أكثر
- طب هاتى لى اللمص عشان أغيرهم
- مش حينفع.. لازم الكهرباءى هو اللى ييجى يغيرهم
- يا سلام.. إنتى بتهرجى!! الكهرباءى يغير اللمص!! وبتقولى عاوزه
توفرى!!
- أصل اللمص بتاعة اليومين دول غريبة قوى
- غريبة يعنى إيه؟
- القزاز بتاع اللمة بي فصل من الدواية
- وعرفتى إزاى؟
- ما أنا كل ما آجى أغيرها ده اللى بيحصل
- أكيد العيب فىكى مش فى اللمة.. قومى هاتى وأنا أوريكى
- إتفضل.. ورينى شطارتك
- إفصلى الكهربا.. أهو ياستى بتفك أهى.. إيه ده!! إيه اللى حصل!!؟
- شفت أهى فصلت، عشان تصدقنى.. أنا حاولت أكثر من مرة
- يعنى إيه، مش عارفين نصنع حته لمبة!!
- المصرى والصينى.. الإثنين بي فصلوا
- لأ.. مش ممكن.. يعنى إيه يعنى!! لازم أفكها.. يا سلام يا
باشمهندس.. أهى إتفكت

- عفارم عليك. ركب الجديدة بقى
- خلاص وصل الكهربا وإفتحى النور
- الله ينور عليك.. يا حوستى!!
- معقولة!! اللمة إتحرق، ده أنا لسه مركبها
- وأدى جنيه ونص طاروا فى ثانية واحدة
- هى اللمة وصل سعرها جنيه ونص؟!!!
- دى عشان صغيرة، فيه أغلى من كده بكتير
- طب إيه رأيك بقى حأروح أعمل محضر فى القسم، عشان الشركة دى ماينفعش تعمل كده من غير ما حد يحاسبها
- ولا حد حيحاسب، إشتري دماغك
- حأشتري إيه ولا إيه!! الواحد يجيب مين؟! ما فيش صنايعى بيتحرك من مكانه إلا لما ياخد عشرين جنيه.. يعنى لو حنفية باظت فى البيت، السباك مش حيخرج بأقل من خمسين جنيه
- ومش بعيد يبوظ حاجة تانية قبل ما يمشى عشان نجيبه تانى
- الناس أخلاقها بقت وحشة قوى
- طب إعمل حسابك من أولها عشان ما يحصلش بينا مشاكل.. لو الغسالة ما إتصلحتش بكرة حأشتري واحدة جديدة
- يا حلاوتك!! إذا كان البيه الدكتور لسه حييجى بكرة يكشف ويقول المرض إيه، يبقى إزاي حتصلح بكرة؟!!!
- ماشى.. بعد بكرة

- إنتى عارفة الغسالة الجديدة بكام!!
- ماليش دعوة، مش حاقعد فى البيت ده من غير غسالة
- دى أقل غسالة دلوقتى بألفين جنيه.. وعموما.. إذا عاوزة واحدة جديدة إتصرفى إنتى، بس مالكيش دعوة بمصروف الشهر، مش حادفع منه إلا تمن التصليح
- إسمع بس.. كده كده الغسالة بقاها خمسة وعشرين سنة، كتر خيرها، دلوقتى فيه غسالات فيها إمكانيات كبيرة قوى، غسيل وتجفيف وكما تنضيف بالبخار
- والله؟! مالك بس، يوم واحد الغسالة تبوظ فيه تتجتنى بالشكل ده؟!!
- لأ يومين.. ولسه مش عارفة لغاية إمتى
- إنشاء الله بعد يومين كمان تكون إتصلحت.. مش معقول كل ما حاجة تبوظ فى البيت نرميها ونشترى غيرها.. إنتى عارفة الأحوال
- مش حنرميها.. أنا سمعت إن فيه أماكن كتير عندها تبديل.. تاخذ الجهاز القديم البايط، وتديك جديد.. وتدفع الفرق بس
- والفرق ده كام بقى؟!!
- ما أعرفش، نسأل
- من غير ما تسألنى، أنا أقول لك
- وإنت تعرف مين؟!!
- واحد صاحبى السخان بتاعه باط، إتصل بالشركة عشان تصلحه قالوا له على حكاية التبديل دى، وفضلوا يقنعوه إن السخان لما يبوظ صعب يتصلح، وحيته بعد كده

— وبعدين

- إتفقوا معاه على اليوم وراح له العامل ومعاه السخان الجديد، فك القديم وركب الجديد، وقاله القديم بخمسين جنيه

— بس!!!

- أيوة بس.. المهم.. لما جه يدفع تمن الجديد، لقي العامل بيخصم عشرين جنيه بس، مش خمسين

— أكيد قال له التلاتين جنيه دول تمن التركيب

- لأ، التركيب ببلاش.. الإعلان بتاعهم كان يقول كده

— يعنى إيه؟! عاوز يسرقه!!

- لأ.. الفلوس دى تمن فك السخان القديم

— حلوة.. وملعوبة.. عجبتنى والله

- أيوة كده إضحكى.. المهم تشيلى الفكرة البايخة بتاعة الغسالة الجديدة من دماغك

— ربنا يستر

٥ مايو ٢٠٠٩

أنبوب "دبليفرى"!!

اليوم الأول

- مين اللى جه؟
- ده سيد
- سيد مين؟!
- ابن أم سيد
- هى برضه ماجاتش الأسبوع ده؟!!
- ماهو جاي عشان يقول لى إنها لسه واقفة فى طابور أنابيب البوتاجاز، ومش حتقدر تيجى
- معقولة!!! أنا مش قادر أصدق إن الأزمة دى لغاية دلوقتى مش لاقين لها حل
- أنا اللى نفسى أعرف إيه سبب الأزمة أصلاً
- المكتوب فى الجرايد وبيتقال فى التليفزيون، إن قباين الطوب ومزارع الفراخ، هما السبب عشان بياخدوا الأنابيب اللى معمولة للبيوت ويستخدموها
- والمفروض يستخدموا إيه؟
- المازوت، بس لما سعره إرتفع قرروا يستخدموا البوتاجاز عشان أرخص
- كلام ما يدخلش الدماغ!

- المسئولين يقولوا كده
- لو هى دى بس المشكلة، كانت إتحلت من زمان، لكن الموضوع ده بقاله أكثر من شهرين
- وبيتكرر كل سنة فى نفس الميعاد
- إشمعنى بقى؟؟!!
- يقولوا إن البرد هو السبب، عشان كده كل سنة لما الشتا يدخل، الإستهلاك بيزيد وتحصل الأزمة
- يا خبر، كل سنة بتتكرر وما حدش إتعلم يعملوا إيه!! حكومة غريبة قوى
- مستغربة ليه، قولى لى عن أى أزمة حصلت قبل كده والحكومة بتاعتنا حلتها أو عرفت تواجهها ببساطة.. الحكومة عندنا بتتحرك بترتيب مدروس.. الأول الأزمة تحصل، وبعدين تتفاقم، ساعتها تبتدى تدبنا تصريحات، وبعدها تتحرك، وجهودها تتعثر، وتفشل.. خطوة بخطوة، الأزمة تخلص لوحدها.. وأنا وإننى أهو، السنة الجاية حيحصل نفس الشيء
- بس خلىنا فى السنة دى.. البيت بقى زى الزفت، وأم سيد لسه واقفة فى الطابور
- أنا سمعت إن الدكتور على مصيلحى أخذ قرار بتشديد الرقابة عشان يظبط السوق، ويتأكد إن الأنابيب المنزلية مش حتروح غير للبيوت
- دكتور على مصيلحى بتاع العيش؟؟!!
- آه

— أنا سمعت كده .. واحدة معايا فى الشغل، قالت لى إن مواسير الغاز الطبيعى وقفت على ناصية شارعهم ومادخلوش عندهم، واللى بيحفروا قالوا لهم إنهم خايفين يكملوا لإنهم مش عارفين حيلاقوا إيه تحت الأرض

■ أنا اللي أعرفه إن الدكتور نظيف نفسه أكد إنهم شغالين، ووزير البترول قال إنهم وصلوا الغاز لأربعتاشر قرية

— يعنى شغالين فى القرى وحيسبوا القاهرة وإسكندرية!! ماتصدقش كل اللي تسمعه .. دول مستخسرين الغاز فى المصريين عشان أرخص من البوتاجاز .. ياريت بس يوفروا الأنابيب للناس الغلابة دول

■ تعرفى إنهم السنة اللي فاتت لما حصلت نفس الأزمة، زى الأيام اللي إحنا فيها دى، قالوا إنهم حيعملوا مشروع، حلو، إسمه أنبوبة ديليفرى .. يعنى يوصلوا الأنابيب لغاية البيوت وياخدوا سعر التوصيل .. منها يحلوا المشكلة بتاعة الطوابير، ومنها الشباب يلاقى شغل .. راح فى المشروع ده؟؟!!

— يا سلام لما تدقق كده فى كل حاجة، قول يا باسط

اليوم الثانى

■ إزيك يا أم سيد .. نقول مبروك؟؟!!

— الله يبارك فيك، الحمد لله، جبت الأنبوبة بعد عشر تيام، كنت بأروح من الفجر، وأرجع زى خبيتها آخر النهار

■ معلىش .. المهم إنك فى الآخر نجحتى

— ومين بقى الى حيعوضنى عن الأيام الى راحت دى كلها!! ده كل يوم
عدى ضاع عليا خمسين جنيه بأخدهم من الشقق الى بأشتغل فيها
■ إيه!!! خمسين جنيه!! يعنى إنتى بتاخدى مننا خمسين جنيه كل
أسبوع!!؟

— فيه حاجة يا بيه!!؟

■ لا مافيش.. المدام بتقوللى إنك بتاخدى خمسة وتلاتين

— ما هو ده كان السنة الى فاتت، بس بعد الغلا الى حصل ده بقوا
خمسين، تصدق حضرتك إنى أخذت الأنبوبة بعشرين جنيه، والنبى ده
مش حرام!!؟

■ وهي سعرها الأصلي كام؟

— المفروض لما أجيبها من المستودع أدفع إثنين جنيه ونص، ولو جبتها من
البياعين السريحة بأخدها بخمسة، وساعات سبعة.. وكنا راضيين
والله.. بس أنا نفسى أعرف الفرق الكبير فى السعر ده، تفتكر حضرتك
مين الى بياخده؟

■ إنتى إشتريتها من مين؟

— أنا كل يوم كنت بأقف، بصراحة بأقعد، أحط الأنبوبة وأقعد عليها..
تيجى العربية بتاعة الأنابيب، أشيلها وأجرى.. مش عارفة إيه الى
بيحصل، ما حدش يلحق ياخذ حاجة.. وبعد شوية نلاقى السريحة
ماشين بيعوا، الأول كان السعر عشرة جنيه، وبعدين بقى خمستاشر،
وأنا مالحقتش أشتري إلا لما السعر وصل عشرين.. أنا بقى بأسأل،
الفرق ده بياخده البياع، ولا بيشاركه سواق العربية!! بيتهيالى بتوع

- بيعى الموبايل أبو كاميرا، مش أحسن من البهدلة دى كل سنة!!
- الله يحظك يا بيه.. عموما الغاز مش حيدخل الحته بتاعتنا عشان عشوائية.. بس والنبي يا بيه ما تعرفش حد يساعدنى أعمل بطاقة التموين، أصلى قدمت من زمان ولا حد سأل فيا، وبيقولوا حيحطوا أنبوية البوتاجاز عالبطاقة، ومش عارفة أعمل إيه
- يا خبر!! أنا قلت من الأول لازم كلنا نعمل البطاقة، لو كنت أعرف حد كنت عملت لنفسى
- طب ما حضرتك عندك غاز، عاوز البطاقة ليه؟
- ماحدش عارف الدور جاى على إيه!!

٢٧ يناير ٢٠٠٩

الأتوبيسات راحت فين؟!

- وبعدين.. حنفضل كده كثير؟
- ما أنا بأقولك نركب تاكسى، أو حتى ميكروباص
- تاكسى مش راكب، كفاية اللى حصل لى من السواقين.. وبعدين إيه الفرق بين الأتوبيس والميكروباص؟
- ما هو الأتوبيس مايجيش.. حنستنى لحد إمتي؟
- أصل أنا بصراحة عاوز أعرف، اللى بيقول عليه زميلى، صح ولا لا؟
- اللى هو إيه؟
- بيقول إن هيئة النقل العام قللت الأتوبيسات
- وعملت كده ليه؟
- بيقول عشان تشغل الميكروباصات والسيرفيس بتوع القطاع الخاص
- وده كلام برضه!! وهم ناقصين شغل!!
- طب تسمى اللى إحنا فيه ده إيه؟ بقالنا أكثر من نص ساعة واقفين.. حتى الأتوبيسات اللى مش طريقنا قليلة قوى
- أنا قرئت فى الجرنال كلام لرئيس هيئة النقل العام بيقول إن الأتوبيسات فيها مشكلة عشان عندهم نقص فى السواقين
- طب مايجبوا.. ده الشباب العاقل مالى الشوارع
- ماهو بيقول طالبين مؤهلات متوسطة وحيدربوهم عالسواقة ويطلعوا لهم رخص، وماحدث إتقدم

- إزاي الكلام ده ؟ وإنتي مصدقة ؟!!
- آه
- إسمعنى !!
- أصلى عارفة إن مراتبات السواقين بتوع النقل العام عندنا قليلة قوى
- عادى
- كنت راكبة مرة ميكروباص، السواق بتاعه قعد يحكي إنه كان شغال على أتوبيس نقل عام أكثر من خمستاشر سنة، مرتبه وصل بعد كل السنين دى لتلتمية وعشرين جنيه بس
- اللى أعرفه إنهم بياخدوا بدلات، نسبة من التذاكر يعنى
- ماهو قال إن البدلات سبعين جنيه، يعنى فى الآخر مايبوصلش لربعميت جنيه.. المهم إنه قرر يشتغل على الميكروباص بعد ما يخلص ورديته فى الهيئة.. وبعد شوية ساب الهيئة خالص ويشتغل ورديتين عالميكروباص
- وما قالش دلوقتى بيكسب كام ؟
- قال.. كان بيشتكى إنه بعد شغل طول اليوم مش بيدخله إلا ألف وخمسميت جنيه
- حلوين... أهو.. فيه أتوبيس جاى.. كام ؟ ينفع ؟ رايح ناحيتنا ؟
- لأ.. يا خسارة، ده شكله حلو ونضيف قوى
- تلاقيه أبو جنيه ونص
- يااه !! معقولة، فيه أتوبيس نقل عام تذكرته بجنيه ونص ؟! من إمتى الكلام ده ؟

- من زمان
- أنا فاكدة إن الأتوبيسات عندنا بربع جنيه
- ماهو فيه بربع جنيه.. بس دى بقى الى زميلى بيقول إنها إنقرضت تقريبا
- وهو فيه موظف يقدر يدفع ثلاثة جنيه فى اليوم عشان يروح شغله ويرجع !! هو مرتبه كام لما المواصلات بس تكلفه تسعين جنيه فى الشهر !!؟
- المفروض إن فيه كمان أتوبيسات بخمسين قرش، وفيه بخمسة وسبعين، وجنيه وربع، وجنيه ونص
- وكل دول راحوا فين؟! رجلنى وجعتنى من الوقفة، بطل العند بتاعك ده وشوف لنا طريقة نروح بيها
- إستحملى، شوية.. أو مال لو كنا الظهر ساعة الزحمة، كنتى عملتى إيه.. تعرفى إنهم إشتروا أتوبيسات جديدة وإستخسروها فى الغلابة؟! — يعنى إيه؟!
- يعنى قالوا مش معقول نجيب أتوبيسات جديدة ونضيفه كده، ونعمل التذكرة بتاعتها بربع جنيه
- آه.. الناس الى على أد حالها تتركب أتوبيسات على أد حالها
- مرة شفت فى التلفزيون سواق أتوبيس، كان بيقول إنه لما بيروح الصبح ياخد الأتوبيس يلاقى فيه مشاكل وأعطال، يروح يبلغ عنها، ما حدش يسأل فيه.. ولو إعترض ورفض يخرج بالأتوبيس يعتبروه ممتنع عن العمل، ويجازوه

- الكلام اللى إنت بتقوله ده، له معنى واحد
- أبوة يا أم العريف .. إتحفينى بأرائك
- الأتوبيسات القديمة تذكرتها بربع جنيه .. صح ؟!
- صح
- لما تبوظ، مايصلحوهاش .. صح ؟!
- وبعدين ؟
- يشتروا جديد، ويستخسروه فى الربع جنيه .. إيه رأيك ؟
- قولى إنتى
- معنى شوية بشوية، مش حيبقى فيه تذكرة بربع جنيه خالص .. وبعدين يعملوا نفس الشئ فى التذكرة أم خمسين قرش، لغاية مايوصلوا لأعلي
- سعر
- حلوة
- مش كده بذمتك !! أنا سمعت بقى إنهم أصلا حيخصصوها هيئة
- النقل العام
- لأ، لأ .. رئيس الهيئة قال مش حيحصل
- حيحصل .. وبكرة تشوف .. فيه خبر قرينه إن محافظ القاهرة طلع قرار
- السنة اللى فاتت، رقمه ألفين تنمية ثلاثة وخمسين، فيه المعنى ده
- قال حيخصصوها الهيئة ؟!!
- لأ .. قال حيعملوا شركات للنقل الجماعى فى القاهرة الكبرى، تجيب
- أتوبيسات أربعة وتلاتين راكب، وتقدم خدمتها فى نقل الركاب
- مش معنى كده إنهم حيبيعوا الهيئة

ومحطات، وطريق ثابت تمشي فيه، مش حسب التساهيل.. لكن
عندنا... أهو جه، الحمد لله، إركبي بسرعة، والله كويس مش زحمة
قوى يعنى

— التذكرة طلعت بكام؟

▪ جنيه وربع

— يعنى زى الميكروباص.. ماكان من الأول

▪ قلت لك مش قصدى التوفير

— والنبي إيه !!

▪ يا سلام.. وحنقعد كمان !! تعالى، ما تقعدى

— الكنبه مخلووعة.. إسندها لغاية ما أقعد

▪ ماتتاخرى شوية

— أروح فين يعنى؟

▪ لازم تعملى رجيـم

— الكنبه هـى الـي صغيرة، والممر ضيق قوى.. ده أبو جنيه وربع !!

▪ المرة الجاية نجرب أبو جنيه ونص

— جربه لو حدك.. أنا ماعنديش إستعداد أضيع عمرى وأنا واقفة على

محطة الأتوبيس، موقفنى ساعة والميكروباصات رايحة جاية.. أنا الحق

عليا إنى سمعت كلامك، وفي الآخر تقوللى إعملى رجيـم

▪ بأهزر معاكى، مالك واخداها جد كده !

— إيه الست دى، حاسبى ياست قعدتى على رجلينا

▪ معلىش نستحملها.. لازم نشيل بعض.. تعرفى أنا نفسى فى إيه ؟

.. طيار طار حلمه .. طيار طار حلمه .. طيار طار حلمه ..

— فى إيه ؟

▪ تجربة جديدة.. زى ما عرفت حقيقة الأتوبيسات فى البلد، عاوز أعرف حقيقة وسيلة مواصلات ثانية

— عرفت حقيقة الأتوبيسات من ساعة واحدة وقفرتها بالمحطة

▪ أيوة عرفت

— طب مبروك

▪ عارفة المرة الجاية حأركب إيه ؟

— مش عاوزة أعرف، عشان مش حأبقى معاك

▪ لما تعرفى حتغيرى رأيك

— ليه، حنركب طائرة !!

▪ لأ.. مش حتصدقنى.. توك توك

— يامصيبتى !!

١٤ يوليو ٢٠٠٩

توك.. توك.. فهو توك توك !!

- راسى حتنفجر، حاسس إن جواها وابور جاز.. إعملى لى شاي وهاتى لى أسبرنتين
- قلت لك من الأول مافيش داعي للحكاية دى، توك توك إيه اللى كنت عاوز تركبه، آدى النتيجة.. طول ما هو ماشى يتكتك، تك، تك.. يا ساتر
- وإيه الواد اللى ركبنا معاه ده !! ده سنه مايزيدش عن عشر سنين، إزاي ماخدناش بالناقبل ما نركب ؟!
- كلهم كده
- هى العيال دلوقتى بياخدوا رخص سواقة ؟ ولا المرور بيسمح إن سواقين التوك توك يسوقوا من غير رخص ؟!
- لأ طبعا فيه رخصة، بس مافيش رقابة
- معقولة !! إشمعنى التوك توك ؟!!
- إيه اللى إشمعنى التوك توك، يعنى قصدك إنهم عاملين رقابة على مين ؟
- مش قصدى حاجة.. أنا مستغرب إنهم يسيبوا شوية عيال يسوقوا ويعملوا حوادث وبلاوى، وكم ان الدوشة اللى كنا فيها، الواد حاطط كاسيت أكبر منه، وساعات ومكبرات صوت.. كأننا فى فرح فوق السطوح.. راسى حتنفجر.. إلا الأغنية بتقول إيه ؟
- "التوك توك بتاعى إتسرق"
- لأ مش دى.. الثانية بتاعة "آآآه" !

— الأغنية كلها "آآه"، هي كلمة واحدة.. بس الى عجبتنى بتاعة "أنا عامل دماغ"

▪ عجاكى قوى !! طب إيه رأيك إن العيل ده شكله عامل دماغ فعلا

— خدت بالى.. أصل سيد برضه شغال على توك توك

▪ سيد مين؟

— ابن أم سيد

▪ العيل ده !!

— هو شكله صغير، بس عنده أربعاش سنة.. المهم إنه بيقول لأمه، إن

العيال دى فعلا بتضرب بانجو، وبيعلموا بعض وحاولوا يعلموه بس

هو رفض.. بيشرب سجاير بس، لكن إيه.. حريقة

▪ ودى حاجة تفرح؟!

— أمه بتقول الحمد لله إنها جت عالسجاير، مع إنه بيشرب ييجى علتين

وأكثر كل يوم

▪ مصيبة.. الواد ده لما يكبر حيوصل لإيه؟

— هو عاوز يشتري ماكنة تبقى بتاعته

▪ ماكنة ???

— ماهم بيقولوا عالتوك توك ماكنة، المهم هو حيدخل السنة دى مدرسة

الصنايع، ويتعلم تصليح الموتورات بتاعة التلاجات والغسالات، قلت

لأمه ما تشغليه فى ورشة أحسن، ياخذ خبرة مع الدراسة، ولما يتخرج

يفتح محل.. قالت لى إنه رفض عشان الأسطوات بيضربوا العيال

▪ وبكام الماكنة على كده؟

— تبتدى من خمستاشر ألفن وتوصل لتلاتين.. بس بيقولك إيه، بتجيب فى اليوم مش أقل من ميت جنيه

■ بس بيعمل بلاوى... شفتى الواد الى ركبنا معاه كان ماشى بسرعة إزاي!! وكام مرة كان حيعمل حادثة

— ماهو سيد برضه كل شوية يحصل له حادثة، لسه أمه كانت بتحكى لى إن الماكنة إتقلبت بيه، وجه صاحبها ومعاه سبع رجاله عشان يحكموا مين الى يدفع ثمن التصليح، قعدوا عندها للساعة أربعة الصبح، وحكموا تدفع النص، وصاحب الماكنة النص

■ آه، يعنى عاوزة فلوس

— بتقول سلف

■ والفلوس الى بيكسبها الواد، بتروح فىن؟!

— ماهى العيشة غالية قوى

■ والله تلاقى الواد بيشرب بانجو وهى مش عارفة.. أتاى التوك توك ده مشاكله كتيرة قوى، غير إن الى بيسوقوه شوية عيال، وغير الدوشة والزحمة، والحوادث.. كمان بقى حواليه شوية بلطجية ببيعوا المخدرات ويعلموا العيال، التوك توك ده لازم يتمنع

— ما كل الى بتقول عليه ده برضه بيعمله بتوع الميكروباص، مابتقولش ليه يمنعوه

■ يمنعوه

— وبعدين، الناس تعمل إيه؟

■ ماهو الى بيحصل ده غلط

— شوف.. التوك توك حل مشاكل كثير

▪ زى إيه إنشاء الله ؟

— أم سيد بتقول إنها مش بتعرف تركب الأتوبيس والميكروباص والمترو،
عشان السلام، رجليها بتوجعها، ماهي كبرت برضه.. وكم ان بتقول
إنها ماكانتش بتعرف تزور بنتها عشان ساكنة فى حته مقطوعة
وشوارعها ضيقة، مافيش مواصلات بتدخلها.. دلوقتى بقت تركب
التوك توك يوصلها من الباب للباب

▪ يا سلام.. بقى عشان أم سيد تزور بنتها، البلد تخرب !!

— مش أم سيد بس، كل الكبار فى السن استفادوا من التوك توك، والناس
الى عايشة فى حتح محرومة من المواصلات.. أنا سمعت ان الفلاحين
دلوقتى أحوالهم إتحسنت قوى بعد التوك توك ما دخل القرى

▪ إزاي بقى ؟!

— الى لقي لقمة حلوة بعد ما إشتغل عليه، واللى كان بيتعب قوى عشان
يروح السوق شايل بضاعته، والتلامذه الى كانوا يمشوا مسافات
طويلة عشان يوصلوا مدارسهم

▪ طب و الى بيموتوا فى الحوادث، واللى بيتسرقوا ويتخطفوا، واللى مش
عارفين يمشوا على رجليهم عشان الماكينات الى ملت الشوارع !!
— كل ده مقدور عليه

▪ نعم !! مقدور عليه إزاي ؟

— قصدى يقدروا يصلحوه، يطبقوا القانون، ويراقبوا، ويظبطوا
المخالفين.. كده يعنى

■ ماهم مش عارفين أهو

— لأ.. هم مش ماشين صح.. القانون الجديد بتاع المرور عمل رخصة للتكاتك وللسواقين، وساب كل محافظة تحدد الأماكن اللى يمشى فيها، والأجرة، والألوان.. المفروض بقى يحصل تعاون بين المحافظة والمرور.. لكن إيه اللى بيحصل؟

■ واضح إنك دارسة الموضوع كويس

— من ساعة ما إنت قلت نجرب التوك توك وأنا بأقرا عنه.. كل فترة تطلع حملة إسمها حملة التكاتك، يخرج الطباط يلموا الكل، ويحجزوا الماكنة، والناس تصوت.. ومش فاهمة ليه يروحوا يكسروا التكاسى.. المهم، فيه غرامات، ناس تدفع وماتعرفش ترجع الماكنة، وناس ترجعها من غير ماتدفع.. وأصحاب التكاتك يضيعوا، ماهم شاريينه بالتقسيط، يعنى رزقهم ورزق عيالهم يبقى فى خطر

■ المشاكل دى كلها موجودة من زمان، من ساعة ما فتحو باب الإستيراد للبلوة السوداء دى وهم فى مشاكل ومش عارفين يحلوها

— أديك قلتها، مش التكاتك دى موجودة فى بلاد كتير؟! إشمعنى إحنا بس اللى عاملة مشاكل كده؟! عشان مش عارفين ننظمها

■ أنا فاكركويس، مرة وزير الصناعة قال إن التوك توك ده وسيلة مواصلات غير آمنة.. يعنى الحكاية محسومة

— لأ.. اللى حصل إن الهيئة العامة للمواصفات والجودة حطت شروط ومعايير للسلامة والجودة بتاعة التكاتك، منها مثلا إنهم حددوا السرعة بخمسة وأربعين كيلو فى الساعة.. المهم التنفيذ

— مافيش حاجة إسمها مستعصية

- **لأ فيه.. لما المشاكل تكبر يبقى حلها صعب، وفي بلدنا بالذات تبقى مستحيلة**

— مش للدرجة دی

■ هي كده.. كان مفروض من أول يوم فكروا يستوردوا التكاك دي، يدرسوا الموضوع كويس، يحددوا مساراته، وسرعته، وكل اللي قلتي عليه، يتعمل الأول وبعدين التوك توك يشتغل، ويتنفذ القانون من أول يوم.. لكن هم إشتروا دماغهم لغاية ما بقى ناس كثير معتمدين عليه زى ما بتقولى، وسابوا المخالفات لما بقت عادة.. دلوقتى مستحيل ينظموا حاجة، مش حيعرفوا.. خبرتنا معاهم بتقول مش حيعرفوا

— طب و الحل ؟!

■ قومی ہاتھی لی اُسپریتین کہاں

۱۱ أغسطس ۲۰۰۹

حكايات البورصة

- إفضل.. إشرب الشاي.. مالك بس، شكلك مش عاجبني خالص!!
- مافيش.. أنا بس جاي أفضفض معاك شوية.. إحنا طول عمرنا أصحاب وبأستريح لما أتكلم معاك
- طب إتكلم، طمنى
- مراتى خدت العيال وراحت عند أبوها
- يا خبر.. ليه؟ إيه اللي حصل؟
- زعانة يا سيدى إنى ماسمعتش كلامها
- فى إيه؟
- ما هى ماكانتش موافقة على حكاية البورصة دى
- بورصة!! إنت شارى أسهم فى البورصة؟! طب مين؟! ما الحال من بعضه.. ده يمكن مرتبى أكبر من مرتبك عشان أنا مدير وإنت موظف عادى!!
- بصراحة.. أنا بعت شقتنا.. والشقة اللي قاعدين فيها دلوقتى إيجار جديد، وخلص مش قادر أدفع إيجارها.. ومش عارف أروح فى
- مش مصدق.. ده إنت طول عمرك عاقل.. إزاي تعمل كده؟!!
- أنا لما أخذت القرار ده كان بعد دراسة طويلة، قرئت كويس وعرفت كل حاجة عن الشركات اللي إشتريت فيها.. وفعلا الأسهم بتاعتي

سعرها إتضاعف، بس الغلطة الى عملتها إني ماخرجتش في الوقت المناسب

■ وليه ماخرجتش؟ ماهي دي قلة خبرة برضه

— ما أنا كل ما كنت آجي أبيع بتوع شركة السمسرة يقولوا لي إستني شوية.. أشوف برامج التليفزيون الكثير قوى اللي بقت تنكلم غالبورصة، ألاقى الخبرا اللي جايبينهم برضه يقولوا إستنوا شوية.. لغاية ما حصل الي حصل.. أنا خسران لغاية دلوقتي أكثر من نص فلوسى بكثير.. وأدينى قاعد مستنى الفرج

■ والفرج ده حييجى منين، وإزاي؟!!

— واحد خبير كبير قال في التليفزيون خلاص الخسارة الكبيرة حصلت ومافيش قدام أصحاب الأسهم إلا إنهم ينسوا الفلوس سنة أو ستين، لغاية الأمور ما ترجع لحالها

■ ستين!! طب وحتعمل إيه؟!!

— عارف أنا لو عندي فلوس، كان زمانى عوضت كل الخسارة وكسبت كمان!!

■ معقول!! لسه عاوز تشتري تانى!! إنت تستاهل الي جرى لك بقى

— الفلوس تجيب فلوس.. كل المستثمرين الكبار الي عندهم سيولة عرفوا يعملوا "تريدة" ويعوضوا ويكسبوا كمان

■ يعملوا إيه؟!!

— "تريدة"، يعنى لو أنا عندي سيولة، والسوق دلوقتي طالع نازل، حتى ولو بنسبة بسيطة، أعمل إيه.. أشتري لما السعر ينزل، وأستنى كام يوم

لغاية ما السعر يزد، أبيع على طول.. وأكسب الفرق.. كل ما يكون
عندى سيولة أكثر، أشتري أسهم أكثر وأكسب أكثر وأكثر

■ بس دى مضاربة !!

— ما هي البورصة استثمار ومضاربة.. أنا لما أشتري أسهم في شركة كبيرة،
ده معناه إني باخد أرباح.. يعنى استثمار.. بأكبر الشركة مع باقى
المستثمرين، فتزيد أعمالها، وتزيد أرباحها، ويزيد دخلى.. المضاربة بقى
حاجة ثانية، بس جزء أساسى فى شغل البورصة، ومش عيب ولا حرام

■ مش عارف.. أنا ماليش فى الحاجات دى

— التريدة هي اللى نمشية السوق دلوقتى عندنا وعند غيرنا.. الأزمة دى فى
العالم كله، وعشان كده حتعدى إنشاء الله.. ما هو مش معقول الدول
الكبيرة حتسب الأمور كده، طبعا حتحلها، ساعتها حتحل عندنا

■ بس أنا قرئت إن الأزمة مش حتأثر علينا

— واللى حاصل ده معناه إيه؟ شوف، إحنا عندنا كام شركة ما يزدوش
عن صوابع الإيد الواحدة ودول بيمثلوا ستين فى المية من مؤشر
السوق.. يعنى هم اللى متحكمين فى السوق، لو طلغوا يقولوا المؤشر
طلع، الناس تشتري، نزلوا، المؤشر ينزل والناس تخاف وتبيع

■ يا سلام !!

— الشركات دى بقى عندها أسهم وشهادات إيداع دولية، يعنى مطروحة
لبيع بره، إزاي بقي يقولوا مش حتأثر؟! !!

■ أنا برضه قلت لازم نتأثر عشان حاجات ثانية كتير

— الى بيحصل إن لما السهم ينزل برة، لازم ينزل هنا، المستثمرين الكبار في الشركات دي عندهم أسهم هناك وأسهم هنا، ولإن عندهم سيولة بيقدروا يلحقوا نفسه

■ إزاي يعنى؟!

— لما يبقى السهم في مصر أرخص من السهم برة، يقوموا يبيعوا الغالى ويشترى الرخيص ويكسبوا الفرق.. وفي نفس الوقت يحتفظوا بعدد الأسهم بتاعتهم

■ يااه.. دي حكاية معقدة قوى

— دول بقى بيسموهم صناع السوق، لإنهم يتحكموا في إيقاع البيع والشرا.. كل تصرف بيعملوه بيأثر على صعود وهبوط السوق

■ مش فاهم!!

— التعريف بتاع صناع السوق إنهم الطرف العكسى للمتداولين.. يدخلوا على الأسهم الرخيصة ويشترىها لغاية ما سعرها يطلع، يقوموا يبيعوا.. ويكسبوا مكاسب رهبة

■ تريد يعنى!!

— شفت أديك فهمت.. الحكاية مش كيميا.. المهم يكون عندك سيولة.. المشكلة بقى إن الأسهم دي سعرها بيزيد من غير مبرر، يعنى مش بيعبر عن نشاط حقيقى للشركة، لكن بيخدم مصالح الكبار دول الى مش بعيد عليهم كمان يطلعوا إشاعات عشان يزودوا مكاسبهم

■ ودول بيعملوا الى عاوزينه كده من غير ما حد يحاسبهم!!

— فيه رقابة عالسوق، وساعات فيه عمليات بتتوقف لو إكتشفوها.. المهم

إن اللى عاوز يدخل السوق لازم يعمل زيهم

▪ يعمل إيه؟ يطلع إشاعات!!!

— لأ، مش قصدى.. أقصد إنى أول ما دخلت البورصة كان هدفى

الإستثمار، لكن لقيت إنى لازم أضارب، زى زى غيرى، وإلا أخسر

▪ وضاربت؟!

— ضاربت

▪ طب ما إنت برضه خسرت أهو

— ما أنكرش.. بس ده بسبب أخطاء عملتها عشان كنت لسه بأبتدى،

كل الناس قالوا لى إشتغل وأول ما تجيب رأس مالك خده وكمّل

بالمكسب.. كنت ناوى أعمل كده بس مالحقتش

▪ لو عاوز رأى.. الحق نفسك، أخرج باللى معاك بدل ما تخسر أكثر..

وربنا يعوض عليك

— إزاي تقول كده؟ ماهو لو كل واحد عمل زى ما إنت بتقول السوق

حقيق أكثر.. وهو ده اللى حاصل دلوقتى، الناس بتمشى ورا بعض زى

القطيع من غير ما يفهموا، يلاقوا الأجانب باعوا أسهمهم يقولوا دول

عارفين حاجات إحنا مش عارفينها ويعملوا زيهم.. لغاية ما بيوتنا

إتخربت

▪ هدى نفسك شوية.. أنا مش قصدى حاجة.. ماتعملش فى نفسك

كده.. حقك عليا.. تعرف، أنا قرّيت إن فيه دلوقتى دكاترة نفسيين

إتخصصوا في علاج ضحايا البورصة.. إيه رأيك تروح لدكتور؟ يمكن
يقدر يساعدك

— ضحايا!! أنا بقيت ضحية؟! الحق عليا إني جيت أفضفض معاك
■ أقعد بس.. معلش، ماتزعلش مني.. أنا عاوز أعمل لك أي حاجة..
قولي بس، حتعمل إيه دلوقتي؟

— أنا مصدق الخبر الكبير اللى قال في التليفزيون إن السوق حيستقر بعد
شوية وكل شئ حيتحسن
■ إنشاء الله.. يعنى قاعد مستنى ده يحصل؟
— حيصصل إنشاء الله.. قول يا رب
■ يا رب

— طب بأقولك إيه.. أنا حأطلب منك طلب وإذا ما وافقتش أنا مش
حأزعل

■ تحت أمرك، لو في إيدي، أنا تحت أمرك
— لو عندك أي سيولة ممكن تديها لي أعمل بيهم كام تريدة، والمكسب
بالنص.. إيه رأيك؟
■ هه.. ماعنديش!!

— المكسب مضمون، وأديك شفت أهو أنا دلوقتي فهمت كل حاجة
■ مش عارف.. أفكر!!

— قول يا رب

■ كله علي الله

٢٨ أكتوبر ٢٠٠٨

تذكرة سبينا

اليوم الأول

- يارب يا كريم، أسترها معانا
- صباح الخير.. إنت طول الليل مانمتش، فيه حاجة ؟
- مافيش.. كنت بأصلي صلاة الإستغاثه
- ليه، خير، عندك مشكله، عملت حاجة فى الشغل ؟
- حأعمل إيه يعنى.. أنا بأدعى لربنا، فيها حاجة دى ؟!!
- لأ مافيش.. بس ماتنساش تدعى لنا معاك
- حاضر.. ياخفى الألفاف نجنا مما نخاف
- إدعى البنت تجيب مجموع
- اللهم إنى لا أسألك رد القضاء ولكنى أسألك اللطف فيه
- ونعم بالله.. بأقولك الثانويه العامه
- جيب العواقب سليمه يارب.. ربنا لا تحمّلنا ما لا طاقة لنا به
- أنا بدأت أخاف.. فيه أيه ؟
- مافيش داعى تعرفى عشان ماتقلقيش
- أنا خلاص حأموت، طمّنى والنبي
- إنشاء الله مافيش حاجة، بس بصراحه.. أضلى قرئت بيان للدكتور
- بطرس غالى من فترة كده، هو يعنى عادى.. بس أنا قلت أدعى ربنا
- أضمن

- فيه إيه البيان ده ؟
- قال إيه حيقدمووا لمجلس الشعب حزمة قوانين اقتصادية جديدة
- أيه (!؟) حزمة تانى ؟! أستر يارب .. العيال فين ؟!
- إهدى، إهدى .. العيال نايمين .. مالك، إيه اللى جرى لك ؟!
- مش فاضل لنا غيرهم ياخويا .. حزمة القرارات اللى فاتت أخذت منا كل حاجة .. مش فاضل لنا غير العيال
- الدكتور غالى بيقول إن الحزمة دى حتحقق معدلات نمو للاقتصاد وتحافظ على الثوابت السياسية والاجتماعية للحكومة، وكمهان توفر فرص عمل، و
- إيه الثوابت السياسية والاجتماعية بتاعة الحكومة دى !! شفت .. مش قلت لك .. أستر يارب
- إنشاء الله خير .. إدعى إنتى بس كل يوم، وصلى زى صلاة الاستغاثه، وربنا معانا .. هو بيقول إنهم حيعدّلوا قانون الضرايب على المبيعات وقانون التأمينات الاجتماعية الموحد، عادى يعنى
- حيعدّلوا .. يبقى أكيد حيزودوا الضرايب وتيجى على دماغنا
- لأ مافيش فى كلامهم إنهم حيزودوا
- ولا إنهم حيقللوا
- سببها على الله .. المهم، قلتى إيه فى حكاية عيد ميلاد البنت، قررتى تجيبى لها هدية إيه ؟
- بص بقى .. البنت جت لى إمبارح، وطلبت منى أقولك على حاجة نفسها فيها

- وماله .. جيبي لها اللي هي عاوزاه
- هي عاوزة تنزل مع أصحابها يروحوا المول الكبير ده اللي في مدينة نصر،
وتشتري لنفسها
- بس ده بعيد قوى، وكم ان بأسمع إن أسعاره نار
- ماهي واحدة صاحبته، أختها الكبيرة حتأخدهم بالعربية، وبعدين
إحنا حنديها الفلوس اللي عاملين حسابنا عليها وبس
- أنا خايف لما تشوف الحاجات الغالية دي، مايعجبهاش المبلغ وتكتتب،
وكل شوية بقى تقول عاوزة أروح تانى
- معلش .. ماتنكدش عليها .. بنتك عاقلة برضه
- مهما كانت عاقلة .. المغريات أكبر من أى عقل
- مش للدرجة دي، وافق عشان خاطرها .. وأنا حاقعد أتكلم معاها
وأوعىها
- طيب .. حتديها كام ؟
- تلتميت جنيه
- مش إحنا كنا قلنا حنجيب لها هدية بميتين
- عشان أصحابها معاها، وإحنا كده كده كنا حنجيب لها هدوم للشتا
- شفتي .. من أولها أهو .. بأقولك بلاش المول ده
- دي مرة وحتعدى .. وبعدين أنا حأستغل الحكاية دي عشان أخليها
تذاكر أكثر .. وماتخافش بعد شوية هي حتنسى المول ده خالص
- زى بعضه، خليها تفرح أحسن أنا وإنتي عاملين كآبة في البيت، وهي
ملهاش ذنب

اليوم الثاني

- تعالى يا حبيبتى، كل سنة وانتى طيبة.. اتبسطنى
- قوى قوى يا بابا
- طب ورنى إشتريتى إيه من المول
- ما اشتريتش حاجة، أصلنا دخلنا السينما
- وليه ما إشتريتش بعد السينما؟ خفتى تتأخرى؟ ولا يهملك، إدى الفلوس لماما وقولى لها الى عاوزاه، وهى تشتريهولك
- الفلوس خلصت
- خلصت إزاي؟! إوعى تكونى إتسرقتى!!
- لأ يا بابا، الفلوس خلصت فى السينما
- مش فاهم
- أصل السينما دى الى يوصل الأول من حقه يختار الفيلم الى عاوز يشوفه، عشان كده رحنا بدرى
- يا سلام!! دى مصر إتقدمت قوى.. المهم الفلوس راحت فىن؟
- ما أنا حاقولك أهو.. دخلنا السينما يا بابا، إيه الفخامة دى!! كأنك داخل فندق سبع نجوم، قطعنا التذاكر وقعدنا نستنى فى القاعة الى بره، حاجة آخر شياكة.. وعلى اليمين كده بار عشان نقعد نشرب
- حاجة
- بار!! بار!! يانهار أسود!!

.. طيار طار طار .. طيار طار طار .. طيار طار طار ..

— إيه يا بابا، مالك، بار نطلب حاجة ساقعة أو شاى أو قهوة.. أنا طلبت كابيتشينو

▪ آآآه.. وما فيش سحلب وطاولة؟!

— إيه ده، هو إحنا قاعدين على قهوة! بأقولك حاجة آخر شياكة

▪ طب كمل، وبعدين

— بعد كده دخلنا القاعة اللى حيتعرض فيها الفيلم، وقعدنا على الليزى بوى و....

▪ بوى !!! بوى مين ده يابنت

— إيه يا بابا، على مهلك شوية.. مش عارف الليزى بوى؟! مش مصدقة والله!!

▪ هو ده حاجة معروفة قوى كده؟ عمرى ما سمعت عنه

— الليزى بوى ده كرسى

▪ كرسى !!! يا سلام!!

— كرسى فخم قوى، أقعد أغوص فيه، أفتحه وأمد رجلى.. وبين كل

صف وصف يجى إثنين متر.. كأنى قاعدة فى البيت

▪ بيت إيه بقى، هو إحنا عندنا كرسى زى ده!! وسموه ليزى بقى عشان

يعلموكوا الكسل!! كمل كمل

— قبل الفيلم ما يبدأ، جه الجرسون يشوف طلباتنا

▪ تانى!! ما إنتى لسه شاربة الكابيتشينو

— لأ.. ده بقى بتاع مطعم، مطعم كبير ومشهور

▪ أكل فى السينما!! اللى أعرفه إن ده ممنوع

- مش فى السينما دى
- وطلبتى ايه إنشاء الله ؟
- من غير زعل يا بابا.. أنا ما كنتش ناوية أطلب لإنى شبعانة، بس أصحابى طلبوا شركسية، طلبت زيمهم.. من ناحية أعرف ايه الشركسية دى، ومن ناحية تانية، مش معقول حاقعد أتفرج عليهم وهم بياكلوا
- وتتفرجى عليهم ليه؟! ما إنتى حتتفرجى عالفيلم
- فيلم ايه يا بابا.. المكان ده المهم فيه القعدة الحلوة.. الفيلم ده آخر حاجة نفكر فيها
- يعنى ايه، الفيلم ما عجبكيش ؟
- مش واخدة بالى.. بس أنا فرحانة وإتبسطت قوى.. أحلى عيد ميلاد فى حياتى
- طب عال.. المهم، فىن باقى الفلوس ؟
- خلاص كده يا بابا
- خلاص ايه يا حبيبتى ؟!
- الأكل والشرب، والتذكرة أم ميت جنيه
- نعم!! نعم!! تذكرة السينما بميت جنيه، وكابيتشينو وشركسية بميتين
- !!!!
- لأ يا بابا، ما أنا خليت خمسة جنيه، عشان قسمنا علينا فلوس الجراج
- خمسة جنيه نصيبك لوحدك فى الجراج!! ليه ؟!
- عشان عاملين تخفيض للى دخلوا السينما

■ كمان تخفيض !! معقول يا بنتي، تروحي السينما بتلتميت جنيه في الزمن
الأغبر اللي إحنا فيه ده !!

— لو سمحت يا بابا، ده عيد ميلادي، ودي هديتي، وأنا مبسوطة.. عشان
خاطري ما تقولش حاجة تضايقني

■ مش قصدي يا حبيبتى.. إنتي عارفة وأنا في سنك كده كنت بأروح
السينما بكام ؟! بنص أفرانك

— إيه ده !! هي مصر زمان كانت بتتعامل بالفرانك مش الجنيه !! أول مرة
أعرف

■ طب إسكتي إسكتي يا بتاعة الثانوية العامة.. بيعلموكوا إيه في المدارس
!! فرانك إيه !! نص أفرانك، يعني قرشين صاغ

— ياه، معقولة !!

■ آه والله.. وكانت سينما مزاج كده زى الليزي بوى بتاعك.. إسمها
سينما ابن البلد.. الفيلم يبقى شغال، ولما يجي واحد مهم في الحته،
يوقفوا العرض ويتدوه من الأول عشان خاطره

— طب زعلان ليه بقي ؟

■ مش زعلان يا حبيبتى.. الظروف...بس إنتي مالتيش دعوة.. أنا اللي
بأقوله إن فيه ناس بتعيش على المبلغ ده شهر وأكثر

— يا بابا... ليه قلت كده.. أنا حأعيط

■ حقك عليا.. مش قصدي.. أنا قصدي إن المبلغ ده كان يجيب لنا في
البيت إثنين كيلو لحمه وتلات فرخات و....

— تاني يا بابا !!

.. طيار طار طاه .. طيار طار طاه .. طيار طار طاه ..

■ لأ.. ماتز عيش.. النهاردة عيد ميلادك، أنا بس فكرت إن كان ممكن بالفلوس دى نروح سينما عادية إحنا الأربعة مع بعض، وناكل فشار، وكمّان يفضل منهم

— أنا بجد اللى مزعلنى إني ماكتتش معاكوا، إعمل حسابك، عيد ميلادى السنة الجاية نروح كلنا الليزى بوى مع بعض.. أنا متأكدة إنكوا حتبسطوا قوى زىي
■ إن عشنا وكان لنا عمر

٦ يناير ٢٠٠٩

رقمي مہینز .. کلمني شکرًا!!!!

- تعالیٰ .. إتفضل .. الورقة خلصت خلاص
- صباح الخير حضرتك .. ربنا يجازيك كل خير .. ألف شكر
- مافيش حاجة .. روح بقى إختمها من شئون الأفراد
- حضرتك أحسن مدير عندنا .. ماحدثش غيرك وقف معايا .. الأربعة جنيه دول حيفرقوا معايا كتير ..
- ده حقك يا إبنی وأنا ماعملتش غير شغلي
- متشكر قوى حضرتك.....
- مالك طيب، عاوز حاجة تاني؟
- كتر خيرك .. أصلي قصدي، أنا بعث لحضرتك رسالة إمبارح عالموبايل ثلاث مرات
- إمتي ده ؟! مافيش رسايل جت لي منك خالص .. كنت عاوز حاجة ؟
- لا أبدا .. كنت عاوز أعرف أخبار الورقة
- غريبة قوى، ماوصلنيش رسايل، مع إني مسجل نمرتك، حتي الموبايل أهو، خد شوف
- آآه .. آسف حضرتك .. أصلي غيرت رقمي ونسيت أدى لحضرتك الرقم الجديد
- برضه مافيش رسايل جت بتسأل على الورقة، وإلا كنت فهمت على طول إنها منك

- ما أنا بعت "كلمنى شكرًا"
- آه فعلا جت لى .. طب كنت كلمنى أرخص من التلات رسايل
- لأ ما هو "كلمنى شكرًا" دى ببلاش
- حصل خير
- أنا قلت يمكن حضرتك زىي - آسف يعنى - ما عندكش رصيد
- نعم !! طيب !! عاوز حاجة تانى
- كتر خير حضرتك
- فيه إيه يا إبنى !! ماتقول اللى عاوزه بدل تضيع الوقت ده
- مافيش والله .. إيه رأى حضرتك فى الرقم ؟
- رقم إيه ؟
- رقمى الجديد
- مش فاهم .. وضع كلامك
- رقم الموبايل الجديد بتاعى .. شوف حضرتك .. حلو، مش كده ؟
- آه .. حلو قوى
- أنا إشتريته إمبراح .. وأول واحد أبعث له كان حضرتك
- طيب يا سيدى، مبروك عليك
- الله يبارك فى حضرتك .. رقم حلو قوى
- أيوة ياسيدى، مبروك .. روح بقى عشان تلحق تختتم الورقة
- ده مميز

- مميز !! يعنى إيه ؟!
- رقم مميز .. إشتريته بألف جنيه
- إيه !! إزاي ؟! ألف جنيه !!
- ده مميز حضرتك
- وماله يا إبني .. ده إنت بقالك شهور بتسعى عشان الأربعة جنيه الى ناقصين فى مرتبك
- وإيه علاقة الرقم المميز بالمرتب ؟!
- حد يعمل كده !! إزاي ترمي ألف جنيه فى حاجة هايفة زى دى وإنت محتاج الأربعة جنيه
- الأربعة جنيه دول حقى والإدارة كانت رافضة ترجعولي، لولا حضرتك، كتر خيرك.. لكن الرقم المميز ده حاجة تانية خالص
- ولادك أولى بالفلوس دى
- بأقول ل حضرتك الرقم بألف جنيه بس
- وإنت شايف إن ده مبلغ بسيط !!
- لأ.. بس بالنسبة لرقم زى ده، يعتبر رخيص.. أصلى إشتريته من واحد صاحبي.. عارف حضرتك لو رحت لواحد تانى، كان باعه مش أقل من خمس تلاف جنيه
- إيه !! نعم !! ليه ؟!!
- شوفه تانى حضرتك.. ده فيه رقم متكرر ثلاث مرات
- يا سلام.. وفيها إيه ؟!

— كل ما الأرقام تتكرر، السعر يزيد

■ حاجة غريبة قوى

— أنا أشرح لحضرتك.. أحسن رقم اللي يتكرر فيه الرقم سبع مرات، وده

مش موجود أصلاً لأن الشركات في العادة بتستخدمه لخدمة العملاء..

يبجي بعده التكرار ست مرات، ده رقم سعره من خمستاشر ألف لغاية

عشرين ألف

■ إنت أكيد بتهزر.. مين المجنون اللي يدفع عشرين ألف جنيه عشان رقم

موبايل !!

— مجنون ليه ؟ كل الناس دلوقتي بتدور على الأرقام المميزة، اللي يلاقى

تكرار خمس مرات مش حيدفع غير عشر تلاف، وكل ما التكرار يقل

السعر يقل

■ مين يعنى اللي بيع الأرقام دى، الشركات ؟!!

— الشركات بتبيع، بس مش غالية قوى لأن الأرقام اللي عندها خلصت

■ خلصت إزاي ؟ والله ما أنا فاهم حاجة !!

— يعنى باعت الأرقام المميزة من زمان. دلوقتي أحسن رقم عند

الشركات، اللي فيه رقم يتكرر ثلاث مرات، ورقم تانى مرتين.. ده

سعره في الشركة ستمية وخمسين جنيه، لكن عند التاجر ممكن يوصل

برضه لعشر تلاف

■ يعنى أنا لو عاوز رقم أعمل إيه ؟ أروح لمين ؟

— أحسن حاجة تدخل عالنت، الإعلانات كتير.. بس بلاش تطلب رقم

فيه أصفار كتير، لأن سعره حيبقى في العلالى قوى

- يا خسارة.. كان نفسى فى زيرو، صفرين، سبع زيرو هات!!
- سكر حضرتك والله
- طب والتاجر بيعيب الأرقام دى كلها إزاي؟
- عادى.. يشتريها من الشركات، أو حتى من أصحابها، وبعدين يبيعها ويكسب.. والله لو الواحد معاه فلوس كان يبقى مشروع هایل
- خلاص بيع رقمك أبو ألف ده وإكسب فيه
- ممكن.. بس أنا محتاجه
- محتاجه فى إيه إنشاء الله؟!!!
- برستيچ.. هو حضرتك فاکر الناس بتشتري الأرقام المميزة ليه؟
- عبط.. ماتزعلش منى
- مش عبط، دى شطارة.. عارف إيه الى مرخص رقمى كده؟ إنه مستعمل، لكن لو كان جديد كانت تفرق جامد
- مستعمل، آآآه.. وأنا کمان بأقول رخيص ليه كده، مع إنه تکرار ثلاث مرات!!
- أنا عاوز أفهم حضرتك إن التکرار مش هو بس الى بيغلى السعر، فيه حاجات تانية کثير
- زى إيه؟
- إن واحد مثلا يطلب رقم معين.. دى بتبقى صعبة عشان كده السعر يزد
- وليه أصلا واحد يطلب رقم معين؟!

— مثلاً لو حضرتك عاوز تجيب هدية للمدام فى عيد ميلادها، تدخل عالنت، وتطلب من التاجر رقم عبارة عن تاريخ ميلادها.. هو يدور ويحييه.. شفت بقى حاجة مهمة إزاي؟

■ فعلاً.. مهمة قوى.. طب وحيييه إزاي؟

— يسأل فى الشركة، لو لاقاه تبقى باضت له فى القفص لأنه حيشتره أرخص كثير.. لكن لو مالا قاهوش، يجرب. يطلب الرقم على التلات شركات، واللى يرد عليه يشتره منه، وهو شطارته.. أما بقى لو جاله أكثر من طلب على نفس الرقم.... يا سلام!!!

■ يعمل إيه؟

— مزاد

■ برافو.. رزق الهبل عالمجانين

— البرستيج بقى حاجة مهمة قوى فى حياتنا.. أى واحد يعمل مشروع جديد أول حاجة يفكر فيها إن يبقى عنده رقم مميز، سهل الناس تحفظه.. لو حضرتك واحد طلبك ولقيت نمرة حلوة وكلها أصفار، مش برضه حتقول إنه شخص مهم؟!

■ ممكن.. بس مش لدرجة الأسعار اللى بتقول عليها

— لما الطلب يزيد الأسعار بتزيد.. دى نظرية معروفة

■ ما هو ده اللى يجنن.. إزاي فى الأحوال الزفت اللى إحنا فيها دى، الطلب يزيد على رقم موبايل؟!!

— الموبايل دلوقتى بقى أساسى فى حياتنا.. نغمات ورسايل، موديلات وإمكانيات، إنترنت وكاميرا، فيديو وتليفزيون.. كل حاجة ممكن الواحد يعملها دلوقتى عالموبايل

■ عندك حق.. إذا كانت أم سيد باعت أنبوبة البوتاجاز عشان تجيب لابنها موبايل بالكاميرا!!

— شفت.. أهى أم سيد دى ممكن تشتري رقم مميز بميتين تلتमित جنيه

■ طب وصاحبك ده، بيكسب كام من التجارة دى؟

— أكيد كثير، بس بيخبي، ودأبما يقول إنه بيشتري أرقام وتترك عنده كثير لغاية ما حد يطلبها.. يعنى فيه مخاطر برضه

■ ربنا يكون فى عونہ !!

— تحب حضرتك أسأله عن رقم معين يجيبهولك، وحأوصيه يكرمك فى السعر

■ وماله.. سيبنى أفكر يومين

— قول لى من دلوقتى عشان لسه على ما يدور

■ وهى دى حاجة سهلة؟ لازم أفكر فى رقم يستاهل.. هو الواحد حيجيب رقم مميز كام مرة فى حياته!

— خد وقتك.. حضرتك تستاهل كل خير

■ طب ماتخليه يشوف رقمى ده يساوى كام

— ماتزعلش منى حضرتك.. ده يادوب تديه هدية لأم سيد

■ كتر خيرك

٢٨ ابريل ٢٠٠٩

عيد الأم

- بتقفلى الباب ليه؟؟!!
- مش عاوزة البنت تسمع
- خير.. اللهم إجعله خير
- عيد الأم قرب
- وبعدين؟
- حنجيب إيه لأمى وأمك؟
- بصر احة مافكرتش فى الموضوع ده.. شوفى إنتى
- عاوزة أعرف عامل حسابك على كام
- أنا مش عامل حسابى على حاجة، إحنا آخر الشهر.. المقرروض إنتى
- اللى كنتى تعملي حسابك
- ما أنا كنت شايلة مبلغ، بس إضطريت أديه للبنت عشان نزل كتاب
- جديد فيه إمتحانات الثانوية العامة بتاعة العشر سنين اللى فاتوا
- يعنى رأيك نعمل إيه؟
- أنا من إمبراح بأفكر مش لاقية حل.. قلت يمكن إنت معاك فلوس
- وجتلك الفكرة البايخة دى منين إنشاء الله؟؟!!
- أصلى يعنى شايفاك بقالك أسبوعين وأكثر مابتزلش تقعد عالقهوة..
- قلت يمكن بتوفر الفلوس
- مابتزلش عشان مافيش معايا فلوس
- مشكلة كبيرة

- ولا مشكلة ولا حاجة.. مش لازم هدية السنة دى
- ما ينفعش.. وماتزعلش منى، إنت عارف إن مامتك ممكن تزعل
- إسمعنى ماما يعنى اللى بتقولى عليها كده!!؟
- إنت عارفها.. حتفتكر إننا جبنا لماما وطنشناها
- خلاص، أنا ممكن أروح الشغل مشى، وبفلوس المواصلات نجيب لها
- أى حاجة
- يا سلام!! وليه ماتقولش إنها كده كده حتزعل، وماتعجبهاش الهدية،
- يبقى نجيب لأمى، الست العاقلة الطيبة
- ما تخلى بالك من كلامك.. عاوزة تقولى إن أمى مش عاقلة ولا طيبة!!
- لا.. بس بأقول ما ينفعش إن عشان ماما مش بتعمل مشاكل نقوم
- نيجى عليها
- خلاص، إنتى كمان روحى شغلك مشى، ونجيب لهم هم الإثنين
- أنا ما أقدرش أمشى المسافة دى كلها.. وبعدين كام يعنى حنوفرهم فى
- أسبوع من المواصلات!!؟
- مش أقل من أربعين جنيه
- يعنى كل هدية تبقى بعشرين جنيه، هدية إيه دى!!؟
- الهدية مجرد رمز، مش لازم تكون غالية.. المهم إننا نحسهم إننا
- بنحبهم ومقدرين اللى عملوه معانا
- بس إحنا طول عمرنا كنا بنجيب لهم هدايا حلوة وماتفكرش فى تمنها..
- بالعكس، كنا بنشوف إيه اللى نفسهم فيه ومش قادرين يشتروه عشان
- غالى، ونفرحهم بيه يوم عيد الأم

— شفت.. يا عيني عالطيين في الزمن ده !!

- بلاش الكلام اللي مالوش لازمة.. إنتى عارفة كويس إن الخلاط ده مهم لماما، وإنها بتضرب الأكل كله فيه عشان ماعندهاش سنان.. خليكى طيبة زى مامتك، وفكرى معايا حنجيب الفلوس منين

— مش عارفة

- بلاش تحكمى رأيك، والله أول ما الحالة تتصلح حأجيب لىماتى أحلى هدية.. إنتى تشاورى وأنا أجيب على طول

— الأحوال تتصلح إزاي؟! دى كل شوية بتسوء أكثر وأكثر

- ربنا كبير.. إعملى الطيب، وإنتى تشوقى

— والله مش عارفة.. لو كنا أول الشهر كنت قلت نجيبه ونوفر فى مصروف البيت، بس دلوقتى أعمل إيه، الفلوس الى معايا ماتكفيش، ومش معقول نسيب البيت من غير ولا مليم

- يا حبيبتى يا أمى.. تلاقيها دلوقتى قاعدة من غير أكل، وكمات بتقولى بقالها يومين !! أعمل إيه بس يا ربى؟! !! ليه ماقلتليش من ساعتها؟

— هدى نفسك.. أنا بجد ماكنتش واخدة بالى من الموضوع بتاع سنانها ده

- طب والحل

— حقك عليا.. طب إسمع، أنا عندى فكرة

- قولى بسرعة

— إحنا نديها الخلاط بتاعنا، وأول الشهر، لما نقبض نشترى واحد جديد

- بجد !! ربنا يخليكى.. طب ياللا نروح دلوقتى

— لأ روح إنت.. أصل المدرس جاى ومش معقول نسيب البنت لوحدها معاه، بس عاوزة أطلب منك حاجة، إحنا يوم عيد الأم نروح نזור ماما ونقول لها كل سنة وإنتى طيبة

▪ طبعاً حنروح.. ونجيب لها هدية صغيرة بتمن مواصلاتى، وبعدين نروح لماما.. والولاد كمان لازم ييجوا معانا يعيدوا على جدادتهم

— إزاي بس.. ماهو كده لازم ناخد العربية

▪ طبعاً لازم ناخذها، مش حنروح من الهرم للمعادى !!

— يعنى لازم نحط بنزين

▪ آاه صحيح.. طب خلىنا نفكر فى الموضوع ده لما أرجع

— إستنى بس.. فيه موضوع تانى

▪ خير

— أصل البنت حتيجى تطلب منك فلوس عشان عاوزة تشتري هدية للمدرسة بتاعتها

▪ بمناسبة إيه؟!

— إيه اللى بمناسبة إيه.. عيد الأم طبعاً

▪ إنتى أكيد بتهرجى، مش عارفين نجيب لأمهاتنا، وحنجيب للمدرسات !!!

— بس كده البنت تتقهر

▪ ليه !! إيه المدرسين دول.. إزاي الوزارة ساكتة على الحكاية دى؟

— بصراحة، الموضوع مش زى ما إنت فاهم.. البنت بتحب المدرسة دى قوى.. وهى فعلاً كويسة، مش زى المدرسات اللى بيحبوا العيال يجيوا لهم هدايا.. البنت هى اللى عاوزة

■ أنا حائفهما

— إوعى تقوها إن معندناش فلوس !!

■ وفيها إيه؟ بس أنا مش حاقولها كده، أنا حأفهمها إن الهدية عشان يبقى

معناها جلوا، يبقى تحجبها آخر السنة.. لأن دلوقتي شكلها وحش

ط... ..

■ إيه؟

— طب... طب وأنا!!!

■ انتی ایہ کہاں؟

— ماهى البنت عاوزة تجيب لى هدية، وأكيد الولد كمان، بس حيتكسف

يطلب منك فلوس.. ولا إنت مستخسر فيا الهدية مش أنا أم.. مش

المفروض ولادی یعبرو الی عن حبهم برضه.. إشمعنی أنا !!

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

— ما بتردش ليه؟ هو أنا مجنونة!! عاوز تقول إنى مش مقدرة

الظروف..عاوز تقول زى اللى بيقولوا يلغوا عيد الأم لما جت لغاية

عندی !!

■ أبدا والله.. أنا زعلان من نفسي، طول عمري بأحب عيد الأم وشم

النسيم ومولد النبي وكل الأعياد، كانت مناسبات بتجمعنا وبتقربنا من

بعض، أنا زعلان بشأن ما فكرتش، كان لازم أنا اللي أفكر الولاد..

لكن الظروف نستني، زي ما خلتنى ما أقدرش أجيب حلاوة المولد

— عموما خلاص، کلمتین قلتہم وھدیت.. بس تعرف کل دہ من

الدكتور بطرس غالى.. حيعمل فينا إيه تانى !!

▪ الحكومة كلها مسئولة عن اللى إحنا فيه.. سخفوا الأعياد وخلوها
عبء علينا، بدل ما نفرح بيها زى زمان، نتأكد ونشيل الهم. بس أنا
حاستلف ولازم أجيب لك هدية.. عاوزة إيه؟

— يا أخي خلاص

▪ لازم تقولى

— طيب.. بصراحة.. عاوزة... عاوزة تورته

▪ يا مفعوجة !! كل الهيصه دى عشان التورته.. بس دى غالية قوى

— بقالنا كثير بيتنا مادخلهوش حاجة حلوة

١٧ مارس ٢٠٠٩

في السوبر ماركت

اليوم الأول

- إيه الزحمة دي كلها.. كأن المصريين كلهم في السوبر ماركت
- طول عمره المحل ده كده - من ساعة ما فتح - عشان أسعاره أرخص شوية
- ما إنتى قلتى لى الكلام ده إمبراح عشان تقنعينى نيجى، بس الواحد مش عارف يبدأ منين
- أنا قلت لك إمبراح إن الأسعار كل يوم بتزيد، وإنت كنت رافض تجيب حاجة الشهر كلها مرة واحدة، يعنى لو كنا جينا من كام يوم كنا وفرنا كتير
- طول عمرى أعرف إن الأسعار بتزيد أول رمضان يوم أو إثنين وبعدين ترجع، لكن اللى حصل السنة دي مش قادر أصدقه.. كل يوم زيادة، كل يوم زيادة
- بص. تعالى الناحية دي . هنا بيعطوا العروض.. كل السلع اللى فى الحته دي عليها تخفيض
- إيه الكلام الفاضى ده.. عشان آخد بالتخفيض لازم أشتري كمية كبيرة قوى!! ليه أشتري سبعة كيلو رز؟! لأ، مش عاوز كل ده
- ما إنت كده حتشتري خمسة كيلو بس والإثنين دول مجاناً.. هات الشاى ده كمان، وورق الفويل

■ لأ.. حتعملى إيه بتلاتة رول فويل؟! عشان واحدة ببلاش!! ما إنتى كده برضه دفعتى ثمن رول مش عاوزاه، وكل دى مصاريف مالهاش لازمة

— ماهى الكمية حتقعد عندنا فترة

■ وحنحط كل الحاجات دى فى!! هو المطبخ فيه مكان لده كله!

— مالكش دعوة.. أنا حأتصرف.. بس مش معقول يبقى كيلو الزيت فى كل حته بتلاتاشر جنيه وهنا بحداشر ونص وماإشتريش

■ إحنا لسه جايين قرازة من كام يوم، ودلوقتى حتشترى إثنين كل واحدة تلاتة لتر عشان تاخدى التخفيض!! يعنى حأدفع سبعة وستين جنيه ونص فى الزيت لوحد

— ما إنت كده وفرت تسعة جنيه بحالهم

■ خلصينى عاوزة إيه تانى؟

— لأ.. بالراحة، الدنيا زحمة، والحاجات كتير.. إعتبر إننا بتتفصح.. تعالى نشوف اللحمه والفراخ

■ إيه.. إيه.. إيه!! بكام؟! فى النضارة بتاعتى؟ تعالى شوفى مكتوب كام

— ورينى كده.. مية وسبعناشر جنيه، بس دول إثنين كيلو

■ يعنى كيلو الكندوز قرب على ستين جنيه!!!

— إزاي كده!! ده طول عمره المحل هنا أرخص من بره!! حتى الفراخ الكيلو بسبعناشر جنيه، والصدور بأربعين.. ده أنا مارضيتش أشتريها من بتاع الفراخ لما قال لى خمسة وتلاتين!!!!

- تعالى تعالى، خلىنا فى البقالة، شوفى بس طلباتك.. مالك عاملة كده ليه؟؟!!
- مصدومة.. كان عندى أمل كبير ألاقى اللحمه والفراخ هنا أرخص
- روقى، ولا يهملك.. تعالى بس.. إيه الحاجات الغريبة دى؟! وإيه الأسعار الرخيصة المكتوبة دى؟ معقولة لوز وعين جمل وحاجات تانية غريبة، بسبعة وثمانية وتسعة جنيه!!! وإيه اللى فى العلبة دى؟؟!!
- مانجة.. وده أناناس.. وموز.. فاكهة مجففة يعنى.. والأسعار المكتوبة دى سعر الميت جرام.. إزاي إفتكرت إنها سعر الكيلو!!
- ومن إمتى إحنا فى مصر بنحط سعر الجرام؟؟! هو أنا بأشترى ذهب!!
- طب تعالى والنبي نجرب أى صنف.. إيه يعنى تسعة جنيه، حاجيب مانجة
- والله إنك عيلة.. ماتا كليهوش كله، خلى شوية للعيال
- يااه.. الطابور طويل قوى، ده فيها ساعة أقله على ماييجى دورنا ندفع
- أنا اللى محيرنى إن الناس معاها فلوس أهو، كل واحد مالى العربية على آخرها بضاعة.. منين ده كله؟؟!!
- زينا.. ماهو اللى يشوفنا شارين الحاجات دى كلها حيقول ياما هنا ياما هناك
- إنتى السبب.. أنا كنت رافض من الأول
- إنشاء الله اللى إشتريناه ده حيكفينا وقت طويل، والشهر الجاى مش حنحتاج غير حاجات بسيطة
- خمسمية وكام؟؟! ليه؟! وإزاي!!

- إدفع بقى بلاش فضايح .. ماقلت لك الحاجات حتقعد شهرين
- اللي معايا مش حيكفى .. إنتى معاكى كام !!؟
- إدفع بالكارت
- كارت !! من إمتى بأستعمل الكارت
- إسمع كلامى .. بصراحة أنا جيت هنا من الأول عشان أشتري الى أنا عاوزاه بالكارت، والفلوس تفضل معانا للظروف .. بس يا خسارة ما عرفتش أشتري لحمه وفراخ
- حسابى معاكى بعدين، لما نروح

اليوم الثاني

- أومال إنت عامل الكارت ليه من الأول ؟
- ما إنتى عارفة، كان عرض إتعمل فى الشغل، ولا طلبوا متنا فلوس ولا وديعة، كل الموظفين عملوه، كبار وصغيرين .. حتى السعاه
- طب خلاص، يعنى حاجة عادية، كل الناس دلوقتى معاها كارت وبتشترى بيه الى عاوزاه وتسدد بعدين .. ولا فوايد ولا يحزنون
- إنتى بيتهيا لك .. أنا الى شايف زمايلي عاملين إيه بالكارت، ده خرب بيوتهم .. عشان كده كنت معاهد نفسى ماأستعملهوش إلا فى الشديد القوى
- ما إحنا كنا فى الشديد القوى .. الراجل بعد ما حسب وسجل على الماكينة، كنا حنعمل إيه؟

- شوفي، أنا كل يوم بيجيلي إتصالات من موظفين في بنوك يعرضوا يعملوا لي كروت جديدة، وكل بنك يقدم تسهيلات أكثر — وده معناه إيه ؟!
- مش الفكرة.. أنا بأقول إننا في أزمة.. الأسعار بتزيد، والدخل مش مكفى، أعمل إيه ؟! — إيه ؟!
- أمشى على قدى، أحاول أوفر.. الكارت اللى عاجبك ده بقى، بيعمل إيه ؟!! — إيه ؟!
- يشجعنى أصرف. أجيب أى حاجة، ما أنا مش حادفع دلوقتى، لكن لما ييجى ميعاد السداد بتاع الكارت، حأعمل إيه ؟! — إيه ؟!
- مش حألاقى أدفع، تقوم الفوايد تزيد، شوية شوية، أروح في حديد — بلاش مبالغة !!
- إنتى مش مصدقانى ؟ طب أنا حأقولك اللى بيحصل.. زمايلي دول مش بيشتروا بالكارت بس، لأ، دول كمان بيسحبوا بيه فلوس من البنك، ويدفعوا عمولة — ودى عادى يعنى ؟!
- إسمعى للآخر.. المشكلة إنهم لما ييجوا يسددوا ومايلاقوش معاهم المبلغ، يقوموا يروحوا البنك، وبالكارت برضه يسحبوا المبلغ اللى عليهم، ويسددوه للبنك تانى

— كويس .. يعنى سددوا أهو

■ إيه اللي كويس !! إنتى مش فاهمة حاجة .. مثلاً، الخمسميت جنيهه الى إشترينا بيها إمبراح دى، لما ييجى ميعاد السداد وأنا مش معايا، أروح البنك، أحط الكارت فى الماكينة وآخذهم، وأدخل أدفعهم جوه البنك .. يبقى أنا عملت إيه ؟!

— إيه ؟!

■ ولا حاجة .. أبقى لسه مديون للبنك بالخمسميت جنيهه زائد العمولة بتاعة السحب .. آجى الشهر الى بعده، أسحب فلوس بالكارت وأدخل أسدد .. ويفضل الدين هو هو بس زاد عليه عمولة تانية

— لأ .. إحنا مش حنعمل كده، بس ممكن نقسط المبلغ

■ ممكن، لكن حيبقى فيه فوايد .. بس إنتى بتتكلمى فى مشكلة صغيرة، وأنا بأقصد المشكلة الكبيرة .. المشكلة اللي العالم كله خايف منها، وبيقولوا إنها ممكن تهد النظام البنكى، وتهدد اقتصاد أى بلد .. المشكلة اللي خلتنى أرفض أستعمل الكارت، وناوى إنشاء الله أرجعه آخر السنة للبنك

— مشكلة إيه ؟!

■ مشكلة زمايل فى الشغل، وزيهم كثير قوى فى البلد .. وتلاقى اللي كانوا فى السوبر ماركت إمبراح عندهم نفس المشكلة

— قصدك إيه .. طمنى

■ الكارت ده أكبر مشكلة .. واحد عندنا فى الشغل، شاب صغير متجوز من خمس سنين وعنده ولدين صغيرين، أول ما خد باله من حكاية

الكارت دى، إنطلق..بقى يجيب كل حاجة وكل طلبات بيته، المهم واللى مش مهم.. وكله بالكارت.. ودخل فى دوامة السلفة المستديمة دى، يشتري ويسحب من البنك ويسدد.. وماكانش واخد باله إن كل مرة الدين بيزيد، لغاية ما وصل للحد الأقصى للكار، ماعرفش لا يسحب ولا يسدد

— يا خبر.. وعمل إيه؟!

■ عمل كارت جديد فى بنك تانى، وبقى ياخد من هنا يسد هنا.. ودلوقتى سمعت إنه حيعمل كارت تالت

— يا عيني.. دى مشكلة صعبة قوى.. إوعى تعمل زيه

■ أنا برضه!!!

— أنا بس عاوزه أقول لك إنى عرفت سوپر ماركت تانى.. أرخص من بتاع إمبارح... إيه ده، إنت نمت ولا إيه!!

٩ سبتمبر ٢٠٠٨

ودّعنا الفقر!!

- عاوز أتكلم معاكى فى موضوع مهم، بس نتفق الأول — نتفق على إيه؟
- إنك ما تنكديش عليا زى عوايدك — أنا، بأنكد عليك!! مش فاهمة، هو إيه الموضوع؟
- هو إنتى قرىتى الأرقام بتاعة الجهاز المركزي للتنظيم والإدارة؟ — قصدك مؤشرات بحث الدخل والإنفاق والاستهلاك؟ أيوه قرىتها، حلوة قوى، بيقولوا مستوانا إرتفع يعنى مش حأنكد عليك ولا حاجة
- كويس، الحمد لله، اللى عاوز أعرفه هم ليه بيعملوا البحث ده؟ — إيه السؤال الغريب ده!! عشان يعرفوا وصلنا لإيه، البحث ده معمول
- عشان يشوفوا الفقرا حالهم إتحسن ولا لا، وطلع إتحسن الحمد لله
- ما هو ده اللي محيرنى، شوفى أنا معترض من أولها على الطريقة اللى بيعسبوا بيها — مش فاهمة
- يعنى هم بيقولوا عملوا البحث على ميتين ألف واحد، وأخدوا المتوسط بتاع دخلهم وإنفاقهم واستهلاكهم، أنا معترض على حكاية المتوسط دى، إنتى إيه رأيك؟
- فهمت قصدك، إفتكرت المثل بتاع أنا ورئيس مجلس الإدارة مرتبنا مليون جنيه، صح؟!

■ عليكي نور، الحساب بتاع المتوسط ده مابقاش ينفع عندنا في مصر لإن الفروق بقت كبيرة قوى، لما يقولوا متوسط نصيب الفرد من الإنفاق ثلاث تلاف وسبعميت جنيه في السنة يعنى بتاع تلتميت جنيه في الشهر حتلاقي الرقم ده إتحسب إزاي؟

— بالمتوسط، جمعوا الميتين ألف واحد دول صرفوا كام في السنة وقسموها على ميتين ألف يطلع المتوسط

■ طب لما يبقى أكثر من نصهم بيصرفوا مثلاً ألف جنيه بس أو حتى أقل والباقي بيصرفوا عشرة وعشرين ألف، مش يبقى الحساب بالمتوسط ده يطلع نتايج مش مضبوطة

— طبعاً، وهى دى فعلاً الحقيقة، بس حتى بالحساب بتاعهم عارف النتيجة دى معناها إيه، إن الواحد من دول بيصرف عشرة جنيه في اليوم ما بين أكل وشرب ومواصلات وعلاج ومصاريف مدارس وهدوم وفواتير كهرباء وتليفون

■ آه، طب ليه بيعملوا كده؟

— وأنت عاوزهم يعملوا إيه؟ كل الدنيا ماشيه كده في دراساتها وأبحاثها

■ بس ممكن يعملوا حاجة ثانية

— أيوااا.. يعملوا إيه بقى؟

■ يعملوا متوسط كل شريحة لوحدها، يعنى يقولوا لنا الفقرا كام ومتوسطهم كام والأغنيا أد إيه وبيصرفوا أد إيه، ساعتها حنفهم أكثر إحنا ماشيين إزاي لكن طبعاً هم مش عاوزينا نفهم

— عملوا كده، في بعض حاجات، يعنى مثلا بيقولك إنه مش صحيح إن الفقرا زادوا فقر ولا الأغنيا زادوا غنى

▪ ده كلام الوزير عثمان محمد عثمان مش كده؟!!

— آه، من البحث.. عنده أرقام إن نصيب الفقرا زاد ونصيب الأغنيا قل

— ياسلام، بالذمة!!

— بجد الجرنال معايا أهو خد شوفه

▪ مش مهم، أصل حكاية الأغنيا دى عند الحكومة بتاعتنا غير عندنا خالص؟

— صح، بس هو قال إنه بيتكلم عن الأكثر غنى

▪ ماشى، إذا كان نصيبهم يتأثر فده عشان هم رجال أعمال كبار يتأثروا بالأزمة العالمية مش عشان لا قدر الله إنهم بيحاولوا يعملوا عدالة في التوزيع، بتدورى على إيه في الجرنال؟

— أهى.. شوف الأرقام بتاعتهم، بيقولوا الفقرا استهلاكهم زاد نص في المية، والأغنيا قل أكثر من ربع في المية بحاجة صغيرة

▪ طب وليه ما يشتغلوش عشان الاتنين يزدوا؟!!

— عموما المهم أنه فرحان عشان الفقرا استهلاكهم زاد، حتى لو نص في المية، وده معناه إن دخلهم أكيد زاد

▪ ما هي دى اللي عاوز أتكلم فيها، إשמعنى قال إن الدخل زاد وما قالش إن الأسعار إرتفعت

— عشان ده معناه إن رغم الزيادة اللى حصلت فى الدخل مستوى الناس قل بسبب إرتفاع الأسعار والبحث معمول عشان يثبت إن مستواهم إرتفع، قاموا عملوا إيه، ماجابوش خالص سيرة الأسعار دى

■ يبقى كل الى عملوه ماينفعش، مش حنعرف منه حاجة

— ولا يهمك، الأبحاث كثير، عاوز تعرف إيه؟

■ عاوز أعرف فلوسنا بتروح فين

— شوف ياسيدي، الدراسات قالت إن الأكل والشرب بياخد نص دخل المصريين

■ بیتھیالی بیاخذ اکثر

— مش مهم، المهم بحث جديد لانج، بيقول إن أسعار الطعام والشراب زادت في سبتمبر السنة دى عن سبتمبر السنة اللى فاتت خمستاشر ونص في المية

■ يادى الحوسبة

— خذ عندك بقى من غير أبحاث ولا دراسات، مش قالوا بعظمة لسانهم
الكهربا زادت خمسة فى المية، والأدوية ربعمية فى المية، بلاش دى، إنت
مش دلوقتى بتضطر تركب ثلاثة ميكرو باص عشان توصل شغلك بعد
ما كنت بتركب مرة واحدة

■ آه، كل الناس بتقول إن سواقين الميكروباص عملوا كده بعد ما
الأتوبيسات عددها قل قوى، فإستغلوا الموقف

- يعني نقدر نقول المواصلات زادت تلتمية في المية
- لأ، مانقدرش
- ليه؟
- لازم يعملوا بحث، الحكاية مش بالبساطة دي
- ولو عملوا البحث وطلعوا متوسط إن المواصلات مازادتش ولا حاجة؟!
- عادى، حتلاقى المصريين اللى بيركبوا عربياتهم وما يحتاجوش للمواصلات زاد، مش ربع مليون مصرى إشتروا عربيات جديدة السنة اللى فاتت
- آآه !!
- مع إنى بعت عربيتى عشان ناكل بتمنها
- بس دخلك زاد، حتنكر، مش مرتباتنا زادت؟
- زادت وإنفاقنا زاد واستهلاكنا زاد زى البحث ما قال بالضبط بس مستوايا لأ، لازم يفهموا كده كويس
- حيفهموها إزاي دي بقى
- لما واحد كان بياكل لحمه مرة فى الأسبوع وبعد ما زاد بقى ياكلها مرتين يبقى مستواه إرتفع، لما واحد ماكانش مرتبه بيكفيه ودلوقتى يقدر يحوّل منه يبقى مستواه إرتفع.. هو إحنا لما من خمس ست سنين إشترينا العربية كان ده إزاي؟
- بالتقسيط
- ودفعنا الأقساط منين؟

- من مرتباتنا
- طب لو أنا جيت دلوقتى وقلت لك حأشترى عربية بالتقسيط وندفع القسط من مرتباتنا حتقولى إيه؟
- حأقول إنك اتجننت، ده إحنا كل شهر نشوف إيه اللى ممكن نستغنى عنه
- عشان المرتبات تكفى
- يبقى مايقولش إن مستوانا ارتفع، لأ، ماينفعش وإذا فضل يقول كده
- يبقى عمر مرتبى ما حيكفى وعمر مستوايا ما حيرتفع
- ليه بتقول كده؟
- عشان لما يقول كده يبقى شايف نفسه ماشى صح، ولما حالى يوصل
- لكده يبقى ماشى غلط، مين بقى اللى حيحكم بينا؟
- يجيبوا حكم من بره
- إنتى بتقوليهما هزار بس واضح إن مافيش حل تانى
- أنا بس عاوزاك تهذا شوية وتحمد ربنا، ده فيه فى البحث نفسه رقم يجنن
- بلد، بيقولك فيه ناس عايشه بتلاتة وثمانين جنيه فى الشهر، صحيح هو
- فرحان إن عددهم نزل من أربعة ونص فى المية لأربعة فى المية بس، لكن
- أهو إحنا فى نعمة.. مش كده؟!
- الحمد لله، بس برضه مايقولش مستوانا ارتفع
- ما هو بيقول إن الناس هى السبب إن مستواها ما بيرتفعش
- إزاي الكلام ده؟
- بيقول بيصرفوا على بنود مش أساسية

■ أه افتكرت، كل ده عشان الموبايل، بيقول بيصرفوا فلوسهم على المحمول، تفتكرى الوزير من دول معاه كام موبايل!
— وإحنا مالنا وماههم، طب هم ناس شغلهم كتير عاوز تجيب نفسك زيههم

■ أصل أنا حولت للكرات بتاع صلاحية مدى الحياة، ومش مطلوب منى غير مكاملة واحدة كل ثلاث شهور

— إيه اللخبطة دى، إحنا بتتكلم فى إيه دلوقتى!!

■ يعنى أنا معايا موبايل أهو مش حيكلفنى إلا بكتيره عشرة جنيه كل ثلاث شهور، يبقى أنا بأصرف على بنود غير أساسية؟!!!

— ياسلام عليك لما تقف له عالواحدة، مش قصده، كلمة وقالها، عديها أعدى إيه ولا إيه؟

— وفر مجهودك فى الكلام للسنة الجاية

■ إשמعنى السنة الجاية؟!

— أصل من كتر البحث ده ما عجب الوزير طلب إنه يتعمل كل سنة بدل سنتين

24 نوفمبر ٢٠٠٩

مضاد حيوي مصري

اليوم الأول

- عملتوا إيه ؟
- الدكتور قال نكرر الدوا
- كله ؟ !
- لأ.. المضاد بس.. قالى أنا قلت لك من الأول تجيبى المضاد من بره
- يعنى كنا حنجيبه من بره إزاي ؟ المهم البنت عاملة إيه دلوقتى ؟
- يقول لما تخلص العلبة الثانية من المضاد حتتحسن كثير
- طب وليه يعنى المضاد مش جايب نتيجة ؟ وكتبه ليه لما هو مش كويس ؟
- مش كده بالضبط.. المضاد ده مصرى، والدكتور قال إن المادة الفعالة فيه، أقل من المستورد.. عشان كده لازم تاخد علبتين
- لو كان فھمنا كده من الأول كنا حاولنا نجيبه بأى طريقة
- إنت عارف المستورد بكام
- يعنى إحنا حنستخسر فى صحة البنت !! أيہ اللى بتقوليه ده !!
- مش مسألة إستخسار.. بس ما كناش حنقدر على سعره.. إذا كان المصرى بثمانية وخمسين جنيه !
- مهما كان.. فيه حاجات كثير ممكن نستغنى عنها ونجيب للبنت الدوا
- زى إيه ؟

- زى.. زى الدوا بتاعى مثلا
- وده كلام !!
- آه كلام.. يعنى حيحصل إيه لو بطلت الدوا شهر!! وأهو آخذ بالى فى الأكل.. بس المشكلة مين اللى حيحب لنا الدوا من بره بسرعة
- فيه أجزخانات كتير فى مصر بتبيع الدوا المستورد
- ولما إنتى عارفة كده، ليه ماقلتيش ؟!
- ما أنا ماكنتش فاكرة الحكاية حتطول كده.. تصدق الدكتور أخذ فلوس فى الاستشارة !!
- دكاترة كتير بقوا يعملوا كده دلوقتى.. خلىنا فى الدوا، أنا مستغرب قوى إن الدوا المصرى تبقى فاعليته مش عالمستوى.. ليه مايراعوش ربنا فى شغلهم ؟!
- قصدك مين؟
- شركات الأدوية، تصدقى واحد صاحبي بياخد دوا عشان السيولة، مرة واحدة كده التحاليل بتاعته إندهورت ومش عارفين ليه، إكتشفوا إن المستورد إختفى من السوق، فجاب المصرى
- من نفسه كده ! ماهو غلطان، كان يسأل الدكتور
- اللى فهمته إن مكتوب فى الوصفة بتاعة الدوا المصرى إن كمية المادة الفعالة هى اللى فى المستورد، بس بعد كده إكتشفوا إنها أقل.. لما صاحبي ضاعف الجرعة، حالته إتحسنت
- غش يعنى !!

- مش لازم .. يقولوا إن ممكن تحصل تفاعلات فى التصنيع أو أخطاء تقلل كفاءة المادة الفعالة .. المهم جبتى اللعبة الثانية ؟
- الأجزخانة كانت قافلة، بس لسه فيه قرص فى القديمة حتاخده النهاردة
- طب هاتى الروشته وأنا حأجيه الصبح أول ما أصحى

اليوم الثانى

- صباح الخير يادكتور، لو سمحت عاوز المضاد اللى فى الروشته دى
- طب وباقى الأدوية ؟
- لأ الدكتور قال نكرر المضاد بس، تصور كان عاوزنا نجيب المستورد، وإحنا ماغندناش حد بره يجيبه
- المستورد موجود عندى، بس بثلمية وسبعين جنيه .. عموما ماتخافش، لما تاخد اللعبة الثانية حتبقى زى الفل
- مش أنا اللى عيان دى بنتى .. طب إيه رأيك، آخذ لها المستورد ؟
- لأ .. مادام بدأت لازم تكمل، وأنا متأكد إن اللعبة الثانية حتجيب نتيجة
- معقولة مش عارفين نعمل دوا !! هى مصر وصلت للدرجة دى !!
- لأ يا أستاذ، إوعى تقول كده .. مصر على أعلى مستوى فى صناعة الأدوية .. ده إحنا بنصدر لدول كتير، ومافیش حد فى المنطقة عنده صناعة زينا

■ إذا كان قدامك، أهو المصرى ماجابش نتيجة، والعلاج طوّل .. والبنت
لسه تعبانه

— بص حضرتك .. شركات الأدوية بتستورد المادة الخام من بره، ودى
بقى درجات من ناحية النقاوة ومدة الصلاحية .. إحنا بقى بنستورد
أرخص الأنواع، عشان كده المادة الفعالة أقل شوية

■ ماينفعش يا دكتور، كله إلا الدوا .. ليه بيعملوا كده ؟ عشان يكسبوا
يقوموا يتاجروا بصحة الناس ؟!!

— مش مسألة مكسب بس، لكن شركات الأدوية العالمية بتحتفظ لنفسها
بأحسن أنواع المواد الخام عشان تفضل هى الأعلى مستوى، المشكلة إن
فيه دلوقتى مواد خام بتيجى من الهند والصين، دى درجة نقائها
ضعيفة .. لكن الشركات عندنا بتحاول

■ وإحنا فى مصر مش عارفين نصنع المادة الخام دى، زى الهند والصين ؟!
— مش عارفين .. ده كمان كان عندنا شركة بتصنع المادة الخام دى فى
الستينات، دلوقتى خلاص، يادوب بتصنع المادة الخام بتاعة الأسبرين
■ هو فيه حد بياخد الأسبرين ويرتاح دلوقتى ؟!

— فيه .. بس مش كثير

■ يعنى النتيجة النهائية إن فاعلية الدوا المصرى أقل من المستورد .. ماهو
ده اللى بأقوله

— الدوا حاله زى حال أى حاجة تانية فى مصر .. لما يبقى مافيش ضمير،
وفيه فساد، كل حاجة ممكن تبوظ .. وإحنا كمان عندنا مشكلة

— تعرف حضرتك إن فيه شركات بتسجل الأدوية بتاعتها على إنها أغذية طبية

■ وده معناه إيه ؟

— الأدوية بتخضع للتسعير، فيه هيئة فى وزارة الصحة بتسعرها.. لكن لما يبقى مكمل غذائى، الشركة تحدد السعر اللى عاوزه

■ كل ده وفى الآخر يطلع مش زى المستورد

— أنا عندى صديق شغال فى شركة أدوية، قال لى إن إحنا معندناش وسيلة نقيس بيها تركيز المادة الفعالة فى المنتج النهائى، يعنى وقت التصنيع بيحطوا الكمية السليمة، لكن ممكن تحصل مشاكل إنتاجية تضعف تركيز المادة الفعالة، وما يعرفوش.. قال لى كمان إن فيه شركات مش بتقوم بحاجة إسمها تنشيط المادة الفعالة، وده بيسبب هبوط فى فاعلية الدوا لعشرين فى المية

■ ولسه بتقول الدوا المصرى بخير

— بخير طبعا.. لكن ممكن يكون أحسن.. المشكلة الحقيقية هى الأدوية المغشوشة، مش قرئت حضرتك إن مصر فيها أكثر من مية وعشرين دوا مغشوش !!

■ لأ.. إمتى ده ؟!

— من فترة صغيرة، بيقولوا فيه مصانع بيسموها بير السلم بتاخذ الأدوية المنتهية الصلاحية وتعيد تعبئتها وبيعها بعد ما يغيروا التاريخ

■ والأدوية دى بتوصل لهم إزاي ؟!!

— شركات الأدوية زمان كانت بتاخذ من الصيدليات نسبة عشرة في المية مرتجع للأدوية دى وتعدمها، دلوقتى عشان الطلبات قلت، الشركات بطلت تاخذ مرتجع خالص، الصيدلى بيتحمّل تمناها، لكن طبعا فيه كميات بتتسرب

▪ وفين الرقابة؟!

— موجودة.. المهم الضمير

▪ والحل؟!

— الحل إننا نصنّع المادة الخام.. تعرف إن من شروط الموافقة على إنشاء شركات أدوية أجنبية فى مصر، إنها تصنّع المادة الخام.. لكن دى حاجة إنتهت خالص من أكثر من عشر سنين.. الشركات بتستورد وما حدش بيعاسبها

▪ ولا حد حيحاسبها.. الغلابة ليهم ربنا.. هات الدوا خلىنى ألحق البنت

١٧ فبراير ٢٠٠٩

وزير التمويل الذاتي

- مافيش فايذة.. برضه مش نافعة
- مش حتقولى بتعمل إيه.. عمال تكتب وتقطع فى الورق.. مش يمكن أقدر أساعدك!!
- بأدور على طريقة أجيب بيها موارد ذاتية
- نعم!! تجيب إيه؟!
- إنتى مش واخده بالك إن دى السياسة الجديدة بتاعة الحكومة؟!
- سياسة إيه؟ ماتفهمنى
- مش الدكتور يوسف بطرس غالى كل ما تحصل مشكلة يقول إن كل واحد لازم يدور على موارد ذاتية عشان يمول نفسه تمويل ذاتى ويبقى عنده اكتفاء ذاتى ويبطل يطلب حاجة من الحكومة!!
- هو قال كده؟!! طيب.. وإنت وصلت لإيه؟
- لسه ما وصلتتش لحاجة.. بس أنا دلوقتى بأفكر نزرع فى البلكونة ومش عارف أزرع إيه.. بأقول قوطة وخيار وأى نوع فاكهة، إيه رأيك؟
- بقى البلكونة المتر فى مترين حنزرع فيها ده كله!! دى يا دوب شوية نعناع أو بقدونس
- لا يا شيخة!! طب والحل؟

— كل الورق والشخبطة دول وفي الآخر على مافيش .. لو كنت سألتني من الأول كنت أقول لك

▪ ما تقولى على طول من غير الشويتين بتوعك

— السطوح

▪ يا سلام .. كانت غايبة عنى إزاي ؟ ده إحنا كده مش بس نزرع قوطة وخيار، لكن ممكن كمان نزرع كوسة .. مش كده؟

— الناس بتقول إن الجو بتاعنا بتطلع فيه الكوسة شيطاني .. بس إحنا ما بنحبش الكوسة

▪ ما إحنا حنبيعها، دى عليها طلب جامد

— بس أنا بأقول إن ممكن السكان يرفضوا

▪ يرفضوا ليه ؟ ده إحنا بنفذ سياسة الحكومة

— طب وهم !! مش برضه عاوزين ينفذوا سياسة الحكومة !!

▪ عندك حق .. بس لو قلنا نشترك كلنا مش حينوب كل شقة إلا عودين جرجير .. شفتي الحكاية صعبة إزاي

— أنا بس عاوزة أسأل، إمتى الدكتور بطرس غالى قال عالتاع الذاتى ده؟

▪ كل شوية يقوها .. مش واخدة بالك ولا إيه .. هو القانون اللى كانوا

عاوزين يعملوه بتاع الرسوم القضائية، مش عشان المحاكم يبقى عندها

تمويل ذاتى ؟ ودلوقتى، مش قال إنه مش حيدفع ولا ملين لأساتذة

الجامعة، بعدما إتفق معاهم عالزيادة، مش إداهم الدفعة الأولى ولما جه

معاد الدفعة الثانية قال الجامعة تدفع من عندها !!

- الأهم هو إزاي الدكتور غالى ياخذ القرار ده لوحده ؟
 - أنهو قرار، بتاع الأساتذة ؟!!
- لأ يا فالحة، بتاع المصاريف.. يعنى هو كده قرر يلغى مجانية التعليم!!
والحكومة ساكتة !!
 - أكيد هو واخذ ضوء أخضر من الدكتور نظيف
- طبعا.. بس برضه نفسى أفهم ليه هو يقبل باللى بيحصل له ده !!
 - الدكتور نظيف ؟!!
- لأ الدكتور بطرس غالى
 - قصدك يقبل إيه ؟
- يقبل إن أى قرار الحكومة عارفة إنه حيزّ عل الناس ويسود عيشتها أكثر ماهى سودا، يخلوا الدكتور غالى هو اللى يقوله ويتحط في وش المدفع ؟!
 - أنا عارفة ليه
- عارفة !!
 - عشان هو الوحيد في الوزارة اللى ضامن يقعد لسه ثلاث سنين على الأقل، بعد ما اختاروه في صندوق النقد الدولى
- يمكن !!
 - طب وبعد ما كل حته في البلد تبقى ذاتى كده، الحكومة حتعمل إيه بالفلوس اللى بتأخذها مننا دى كلها ؟!
- طب بس تكفيهم.. الحكومة عندنا مصاريفها كتير قوى.. إنتى عارفة الشاى والقهوة بيكلفوا الحكومة كام؟

— عاوزة أعرف

■ مع إن الدكتور محمود محيي الدين عنده أربعة

— براحتة .. المهم، السكرتارية دول كلهم مرتباتهم كام ؟

■ كتييير .. بس اللى أكثر منهم بقى المستشارين .. الحكومة بتاعتنا ماشاء

الله عندها ستة وعشرين ألف مستشار، يعنى كل وزارة فيها تمنميت

مستشار .. دول بقى مرتباتهم

— مش عاوزة أعرف .. الله يخليك ما تقول

■ مليار وميتين مليون جنيه !!!

— يا ساتر يا رب .. ناولنى كباية المية .. إلا دول يعتبروا موظفين زينا ؟!

■ زينا إيه !! يا بنتى ده "مستساااار" زى ما وحيد سيف كان بيقول فى

مسلسل .. بس عارفة، أنا نفسى أعرف حاجة تانية خالص، المواكب

بتاعة الوزراء، العربيات والموتوسيكلات، تفتكرى بيتكلفوا بنزين كام

!؟

— تمانين ولا تسعين ؟!

■ وده سؤال .. إثنين وتسعين على الأقل، ده إذا ماكانش خمسة وتسعين

أبو ثلاثة جنيه إلا ربع

— أسمع بقى .. أنا متأكدة إنى قرئت إن الدكتور نظيف قرر يحصل

ترشيد، ده حتى قال مافيش أى وزير حيشترى عربية جديدة ولا يجدد

مكتبه، وأكيد كمان حيقبل شرب الشاى والقهوة

■ بعد إيه !! هو اللى عندهم شوية ؟!

■ من إيه ؟!

— ليفتكرونا إحنا اللى أخذناه، والدكتور غالى يطلع قرار جديد بشأن
يستردهوا الفلوس منا

■ عشان كده لازم نشوف طريقة، نجيب بيها موارد ذاتية، ونعمل لنفسنا
اكتفاء ذاتي، ونبعد عن سكتهم خالص

— عندك حق.. هم في حالهم، إحنا في حالنا.. هات الورق لما نفكر مع
بعض

١٠ مارس ٢٠٠٩

مين بد فع ملين؟!

- لسه قاعدة قدام التليفزيون؟
- هانت، كلها كام يوم.
- آه فعلاً.. الشهر عدى هوا
- طب تعالى عاوزة أتكلم معاك فى حاجة مهمة
- خير.!!
- أصلى مختارة.. الناس صعبانين على قوى، ومش عارفة أساعد مين ولا مين
- مش فاهم
- ما المشكلة كمان إن العين بصيرة والإيد قصيرة، حنجيب مين، ده إحنا يا دوب، والخارج قد اللى داخل
- حتقولى فيه إيه ولا أمشى؟
- ما أنا بأقول لك، نفسى أساعد الناس دى بأى حاجة، قلت أوزع الهدوم القديمة بس لقيتها حتة أو إثنين، قلت أبعث أكل لبنك الطعام أتاريهم بياخدوا فلوس
- طب سلامو عليكم بقى، أصل الجنان ده بيتنقل بالعدوى وأنا مش ناقص
- يا ساتر عليك، لو قعدت جنبى قصاد التليفزيون دقيقة واحدة حتفهم، أهو شوف الإعلان ده بالذات بيقطع قلبى، نفسى أمد إيدى جوه التليفزيون وأشد الغلاظة دول معاهم عشان أخرجهم من تحت خط الفقر

- إيه ده؟! وإيه القش اللي على وشهم وهدومهم ده؟! — من الفقر
- يا سلام، أول مرة أشوف قش نضيف كده.. المهم.. يعنى إنتى لما بتشوفى الإعلان ده بيصعبوا عليكى وعاوزة تساعديهم.!!؟ — آه، مش الإعلان ده بس، فيه إعلانات كتير.. العيال اللي هدومها مقطعة ونفسها تلبس هدوم جديدة، والأيتام الغلابة اللي بيعوزوهم، والجعانين والعطشانين والعيانين والبردانين و.....
- بس، بس، كل دول بيطلعوا فى إعلانات فى التليفزيون؟ — طول الوقت لما الواحد قلبه وجعه
- على أي قناة؟ — على كل القنوات، إيه السؤال الغريب ده
- أبدا بأشوف يعنى الفضايح دى كلها على الفضائيات كمان ولا الأرضى بس
- كله، وبعدين مافيش فضايح ولا حاجة، ليه بتقول كده
- يعنى الفقر مش مشكلة ولا فضيحة، لكن الشحاة حاجة تانية
- مش شحاة يا أخى، تكافل اجتماعى، أهو مكتوب قدامك فى الإعلان، تكافل اجتماعى
- يعنى إيه؟ — يعنى نساعد بعض، اللي معاه يدى اللي ما معاهوش، المليون يصب عالفاضى
- ماشى، عندك حق، طب والحكومة فين؟

— كنت عارفة أنك حتقول كده، الحكومة مالهش دعوة بالموضوع ده
أبدأ، دى جمعيات خيرية هدفها مساعدة الناس وبعيد عن الحكومة،
ريح نفسك

▪ الراحة تيجي منين، حد يقول إن المصريين كلهم يتحولوا لشحاتين
بالشكل ده، مش حرام عليهم يطلعوا الناس فى التلفزيون يقفوا يمدوا
أيدهم!!

— دول ممثلين، أكيد ممثلين، مش كده؟!
▪ الله أعلم مش فارقة كثير، طب إيه رأيك فى الإعلان بتاع الأطفال الى
عيانين وشعرهم واقع بسبب العلاج
— حاجة تقطع القلب

▪ أظن دول بقى مش ممثلين
— لأ طبعاً، تصدق إمبراح وأنا راجعة من الشغل لقيت واحدة شايلة
إبنها، مالوش شعر وشكله تعبان، وكانت بتعيط عشان راجعة من
جلسة العلاج ومافيش معاها فلوس للمواصلات، أول ماشفتها
إفكرت الإعلان بتاع المستشفى .. إديتها الى فيه النصيب

▪ إنتى جيتيها من الآخر، التبرع للمستشفى ده شيء كويس جداً
ومطلوب، لكن الطريقة الى بيعملوها بتفكرنى بالسبب الشحاتة الى
شفتيها، جابت عيل وحلقت له ظبطه، ومنعت عنه الأكل يوم بحاله
ونزلت بيه عالشغل

— إنت بتقول إيه؟ قصدك إنها ضحكت عليا؟! بأقولك أيه، هو أيه الي
مزعلك بالظبط؟

■ مش زعلان، لكن الإعلانات دي بتستفزني، وكتر عرضها بالطريقة دي بتخلي الشحاتة حاجة عادية، يعني الشحاتين مالين الشوارع، حد دلوقتي يقدر يتقدّمهم أو يلمهم؟! إشمعني بقى، ما هم بيطلعوا في التليفزيون عادى

— عاوز الصراحة أنا بيستفزني إن بعد الإعلانات دي تيجي بقى إعلانات القصور والعربيات الفخمة

■ ما هو المفروض إن بتوع القصور والعربيات هم اللي حيساعدوا الغلابة دول.. لكن ياترى مين اللي بيدفع ثمن الإعلانات دي؟!

— بيكتبوا أساميهم في آخر الإعلان، أهو شوف؟ رجال أعمال

■ برافو عليهم بجد، ضربوا كذا عصفور بحجر واحد، أولاً عمل إعلان عن نفسه، ثانياً الناس حتقول عليه إنه راجل بيعمل خير وبيتبرع للغلابة، ثالثاً يستفيد من التخفيض الكبير على الإعلانات دي، وكرمان الفلوس اللي حيدفعها ثمن الإعلان حتتخط في مصاريفه وتنشال من الضرائب

— يعنى يعمل إيه، ما هو لازم يكتب اسمه

■ ماشى يا ستى مش مختلف معاكى، أنا بس عاوز أوضح لك أنه مستفيد، في حين بقى الواحد لما بيعمل خير المفروض يبقى في السر، لكن مش مشكلة ممكن ده يشجع ناس تانية إنها تعمل زيه

— إيه التناقض اللي أنت فيه ده، بتقول الرأى وعكسه في نفس الوقت

■ عندك حق، أصل الحكاية باخت قوى، والحكومة بتاعتنا عاوزة تشيل إيديها من كل حاجة وبالتدريج، شوية.. شوية

— حترجع تانى تقول الحكومة!!

■ عشان تبقى عارفة، مافيش حد يجمع تبرعات إلا بعد موافقة الحكومة، ولازم كمان الحكومة تشرف على توزيع الفلوس دى، الحكاية مش سايبه، قصدى يعنى المفروض أنها مش سايبه

— المفروض يعنى إيه؟

▪ یعنی فيه ناس کویسین و بیراعوا ربنا، لكن فيه برضه حرامیه، زی کل حاجة فيها الکویس والوحش

— یعنی أنت عاوز الحكومة تمنع خالص حكاية التكافل الاجتماعى !!

■ إزاي، لأ طبعاً، بس اللى بيحصل فى إعلانات التليفزيون ده شحاتة مش تكافل، الحكومة سايبة الناس تتبهدل فى المستشفيات من غير ما تقدم لهم الخدمة اللى لازم ياخدوها، وبعدين تطلب متنا - عشان التكافل - نساعدهم فى العلاج، الحكومة تسبب الشاب عاطل وتقول لنا إدوهم هدومكو القديمة، الحكومة تدى الناس مرتبات ما تكفيش العيش الخاف وبعدين تعمل بنك الطعام عشان ياكلوا شحاتة.. حد يقول كده؟! ■

— آه صحيح... أنا ماكتش واخده بالى خالص، يعنى بتبوع التكافل الاجتماعى دول عاوزينا إحنا الى نأكل الناس ونلبسهم ونعلمهم ونعالجهم وكم ان نجوزهم، يبقى الحكومة لازمتها إيه؟!

■ أدیکی قلتیها بنفسک.. فيه حاجة تانية کمان أنت مش واخدة بالك منها

— ایہ؟

■ الحاجات اللى بتطلع في إعلانات الشحاتة دى ماتجيش واحد في المليون من الأماكن اللى محتاجة مساعدة
— عاوز تقول إيه؟

■ يعنى اللى بيقدر يعمل إعلان بيكسب من كله، لأن الناس تنزل تروح على المكان اللى طلع في الإعلان ويتصوروا، وهم بيتبرعوا وصورهم تطلع في الجرايد، وماحدث يفكر خالص الأماكن التانية
— يعنى عاوزهم يكتروا الإعلانات؟!

■ مهما كتروا، الحكاية كبيرة أكبر من أى إعلانات وماينفعش فيها الشحاتة

— أومال عاوزهم بيعملوا إيه؟

■ يعملوا مشروع، مشروع كبير، وناس موثوق فيهم يلفوا البلد ويعرفوا المحتاجين ويعملوا لهم مشاريع صغيرة، يشغلوهم عشان يكسبوا ويبطلوا شحاتة، ويبنوا لهم المدارس والمستشفيات
— كلام كبير قوى.

■ أنا مش عارف بالضبط، بس الناس في كل الدنيا بيعملوا إيه، أنتى فاكدة إن التكافل الاجتماعى ده في مصر بس؟

— لأ، لكن إحنا عندنا الشحاتين كتير قوى قوى

■ آه، لكن في كل بلد فيه جمعيات خيرية.. بتساعد الناس من غير ما تشحت أو تعلمهم الشحاتة، فيه طرق كتيرة معروفة، لكن إحنا بنستسهل.. والحكومة بتاعتنا.....

— تانى الحكومة.!!!

▪ آه الحكومة فرحانة بالإعلانات دى ليه بقى؟

— ليه يا أخويا؟

▪ عشان بتحقق السياسة بتاعتها .

— مش فاهمة.

▪ الحكومة بتاعتنا مقتنعة تماماً إن الفقراء محتاجين مساعدة.

— كويس.

▪ يعنى لازم يشحتوا.

— ماشى.

▪ يبقى لازم الأغنيا يقوموا بدورهم في المجتمع

— صح.

▪ يبقى لازم فلوسهم تزيد.

— نعم!! يعنى إيه؟!

▪ يعنى كل ما الفقرا يزيدوا ويشحتوا أكثر، يبقى لازم الحكومة تزود

فلوس الأغنياء عشان يساعدهم وبكده يتحقق التكافل الاجتماعى

١٥ سبتمبر ٢٠٠٩

أزمة العمر الطويل

- ماينفعش اللى بيحصل ده، كده كثير
- نعم!!
- كل شوية وزير لسانه يزل ويقول كلام مايصحش، ولا حد بيعاسبه..
- المفروض كل وزير له ثلاث زلات بس!!
- وبعدين يعملوا معاه إيه يعنى!!؟
- أى حاجة، أقله يمنعوه من الكلام لمدة شهر مثلا، ولو كررها بعد الشهر يمنعوه سنة.. المهم يبقى فيه وقفة
- وإنت بتقول على أنهى وزير، وأنهو كلام؟
- صاحبك الدكتور بطرس غالى
- آآه.. أكيد قصدك على كلامه بتاع المعاشات
- يعنى إنتى معايا وشايقة إن عندى حق!!؟
- طبعا.. أنا بجد إتنكدت قوى من كلامه، وقلت الواحد لما يطلع معاش يموت أحسن
- هو إنتى قرىتى اللى قاله ولا زى حد قال لك عليه؟
- قرىته
- طب قولى لى قال إيه بالضبط، صحيح قال إنه عامل حسابه إن بتوع المعاشات يموتوا لما يوصلوا أربعة وسبعين سنة!!؟

— لأ، حرام.. هو قال إن المتوقع للموظف إنه يعيش بعد المعاش أربعين سنة ونص

■ ياسلام، ماهو نفس المعنى

— شوف الكلام مشى إزاي.. يقول إن الموظف بيدفع التأمينات طول فترة شغله، والمفروض لما يطلع معاش المبلغ ده يكفيه لحد ما ربنا يفتكره!!

■ قال كده، لما ربنا يفتكره!!؟

— أيوة، وكمل إن ربنا يفتكره لها حسابات، وإن فيه ناس ربنا بيكرمها وتعيش تسعين سنة، ودى مشكلة

■ مشكلة!! لمن!!؟

— ليه هو.. للوزارة

■ يعنى اللى عندهم تسعين سنة لما يقرأوا الكلام ده يبقى إحساسهم إيه!!

— ماهو رجوع وقال إن فيه ناس "بتتكل" عند سن إثنين وستين، وده بيشيل ده

■ كتر خيره.. يعنى هو عاوز الموظفين يتكلوا بدرى عشان ما يدفعش معاشهم!!

— لأ مش عاوز.. هو بيتمنى بس

■ والله الواحد بالعند بقى يطلع معاش مبكر وخليه يدفع أكثر

— إوعى.. ده كل الكلام كان عشان بتوع المعاش المبكر.. قال إيه، الحكومة اللي أخذت القرار بتاع السماح بالمعاش المبكر غلطت، وإنه ماكانش وزير ساعتها

■ دلو قتی بیقول القرار غلط!! خلاص، بعد ما خصخصصوا وباعوا.. مش ساعتها كان العمال والموظفين هم العائق قدامهم، قالوا يخرجوهم معاش عشان يرضوا المستثمرين الى حيشثروا!!

— أنت عارف إنه قال ماينفعش واحد يخرج معاش وعمره ثمانية وتلاتين سنة ويبلطج وينام ويرفع رجله!!؟

■ أنا سمعت إنه أنكر الكلام ده

— ينكر زى ماهو عاوز، أنا قرير الحكاية فى كل الجرايد.. مش جرنال أو
إثنين

■ أنا مش فاهم كان يقصد إيه!!

— يقصد - حسب كلامه - إنه مش حيساوى بين اللى طلّع معاش مبكر وبين اللى إشتغل طول عمره.. يعنى ممكن بعد شوية نلاقيهم عملوا قانون يقللوا فيه العلاوة بتاعة المعاش المبكر، مع إن معاشهم أصلاً مخصص منه خمسة فى المية من أساسى المعاش عن كل خمس سنين قبل ما يوصل للستين.. وخمسة فى المية برضه من الأجر المتغير عن كل سنة قبل سن المعاش

تعرفى الحوسة الى الحكومة فيها دى سيبها فلوس التأمينات الى
خدوها وضاربوا بيها فى البورصة وخسروها، وفى الآخر مش لاقين
غير بتوع المعاشات عشان يحملوهم أخطاءهم.. عاداتهم ولا
حيشTROها!!

— مش زمان المعاشات دى كانت تبع وزارة التأمينات الاجتماعية!! إيه
الى خلاها راحت للدكتور بطرس غالى؟

■ ماهى الوزارة إتلغت.. بس من قبلها كانوا قرروا ياخدوا فلوس صناديق المعاشات يفكوا بيها زنقة الحكومة.. الى معترفين بيه لغاية دلوقتى إنهم استثمروا في البورصة إثنين مليار جنيه، خسروا ستين في المية منهم، يعنى مليار وميتين مليون جنيه

— مش قالوا حطوهم في البنك!!

■ أهى دى حكاية تانية.. عملوا بنك الإستثمار القومى مخصوص عشان يخطوا فيه فلوس المعاشات، وكانوا بيدفعوا عليهم فوايد قليلة قوى، ستة في المية، لما خسروا في البورصة قرروا يمولوا مشاريع الحكومة من الفلوس دى.. تعرفى إن نائب رئيس البنك بنفسه قال إنه مش مسئول لو مشروع إتعثر أو حصل فيه فساد؟!!

— ياسلام!! يعنى تبقى مسئولية مين!! وإيه المشاريع دى؟

■ الدكتور عاطف عبيد كان قال إن هيئة المجتمعات العمرانية وهيئة التنمية الزراعية وهيئة الطيران المدنى، أخذوا قروض من بنك الإستثمار، لا سددها ولا سددها فوايدها

— ياخبر، إزاي؟!!

■ غارفة كام!! مية خمسة وسبعين مليار!!!!!!

— الفلوس دى لازم ترجع، وفوايدها كمان، بأى طريقة لازم ترجع

■ تقولى لمن، إذا كانوا بيدفعوا معاش الضمان الاجتماعى ومعاش السادات من صندوق المعاشات

— طب وفيها إيه؟

- دى معاشات عاملاها البلد للمحتاجين الى ما عندهو مش تأمينات،
المفروض تدفع لهم من الموازنة، مش من فلوس الناس
- الواحد إتلعبط، مش عارفة الصبح من الغلط
- إنتى عارفة كل ده بيعحصل ليه، وإشمعنى دلوقتى؟
- ياريت أعرف
- عشان الدكتور بطرس غالى عاوز يعمل زى البنك الدولى ما بيقول،
إنهم يخلوا شركات التأمين الخاصة هى الى تحصل الإشتراكات
التأمينية، والحكومة تشيل إيدها خالص
- وده كويس ولا وحش!!؟
- لو كان كويس كانوا أعلنوه من الأول، عادى، لكن الشركات الخاصة
أكيد هدفها الوحيد هو الربح، حقها، بس ساعتها حنلاقى نفسنا
بندفع اشتراك كبير قوى، يا إما المعاش يبقى ملاليم
- ماهو دلوقتى ملاليم برضه
- يعنى إنتى موافقة إن الحكومة ببساطة كده تتخلي عن الناس الى خدموا
البلد طول عمرهم!!؟
- لأ طبعا.. تعرف إن الحكومة بتاعتنا دى مش بتعرف تفكر كويس، مع
إن الحل قدامها
- حل إيه؟
- يعينوا الشباب العاطل ده كله.. وساعتها حيدفعوا تأمينات
وإشتراكات، ويدخل لهم فلوس كتير ويحلوا الأزمة
- وحيجيبوا لهم مرتبات منين يا فالحه؟

— يفكروا هم بقى، أنا حلّيت لهم نص المشكلة، يحلّوا النص التانى..
أومال قاعدين يعملوا إيه!!

▪ المهّم يستثمروا الفلوس دى كويس، مش يضيعوها زى اللى قبلها
— يستثمروها تانى!! يعنى برضه عاوز الدكتور بطرس غالى ياخد فلوس
المعاشات ويدخلها الموازنة بتاعتهم

▪ الواحد مش عارف يفكر، تعرفى إن اللى حاصل دلوقتى بيّفكرنى بتتوع
توظيف الأموال، إيه الفرق بين اللى عملته الحكومة، واللى عمله زمان
السعد والريان!!؟

— المفروض صناديق المعاشات دى يبقى لها هيئة مستقلة، مش تبع
الحكومة خالص، إيه رأيك فى الفكرة دى؟

▪ ودى عاوزة رأى.. طبعاً.. بس يبعدوا عن الدكتور بطرس غالى.. إنتى
فاكره لما مسك صندوق المعاشات، قال إيه؟

— لأ مش فاكرة، قال إيه؟

▪ قال ماتخافوش، أموالكم فى إيد أمينة!!

— يعنى معترف أهو إنها أموالنا، مش أموال الحكومة

▪ آه ياستى معترف، ده حتى يرجع الفلوس اللى ضاعت أصول
وشركات!!

— يعنى إيه؟

▪ يعنى الشركات الخسارة، اللى مش عارفين يبيعوها، يدوها للصندوق
المعاشات وييقوا خلصوا ذمتهم

— وده يحل المشكلة إزاي .. إذا كان المشكلة دلوقتى إن مافيش سيولة وعشان كده مش عارفين يدفعوا المعاشات، لما يدوهم أصول وشركات إيه اللى حيتغير؟!!!

▪ مالك خدتى الموضوع جد قوى كده!! ده كلام فض مجالس

— أصل الكلام ده بيتكرر طول الوقت .. والدكتور غالى مش أول مسئول يقول إن زيادة عدد أصحاب المعاشات وإرتفاع سنهم هو سبب كل المشاكل، ومش حيكون آخر مسئول يقوله

▪ تاهت ولا قيناها

— قصدك إيه؟

▪ قصدى حل المشكلة بالطريقة اللى الحكومة عاوزاها

— إزاي يعنى؟

▪ يفضلوا يقولوا التصريحات بتاعتهم دى، ويعتبروها زلة لسان

— وبعدين!!

▪ بس .. بحرقوا دمننا ويقصروا عمر أصحاب المعاشات .. وهم مش عاوزين أكثر من كده

٢١ أبريل ٢٠٠٩

سعيدة... سعادتك !!!

- سعادتك إتأخرت كده ليه؟! الساعة واحدة ونص.. قلقتنى.. كنت
فين؟
- سعيدة!
- مين؟!
- بأقول لك سعيدة.. يعنى إزى سعادتك
- وكمان جاى فايق ورايق.. ما تقول كنت فين!
- كنت عالقهوة
- تانى.. إيه اللى جرى لك؟! مش كنت بطلت تقعد عالقهوة؟
- قابلت واحد صاحبى وقعدنا شوية، فيها حاجة دى؟!!
- وإتأخرت قوى كده ليه؟!
- القعدة كانت حلوة.. ما بطلناش ضحك
- على إيه إنشاء الله!!
- أبدا، واحد كان بيتريق على الإستطلاع ده اللى بيقول ان المصريين من
أكثر الشعوب سعادة
- يا سلام!! وإيه اللى يضحك فى كده؟!!
- قال إيه، ثلاثة وثمانين فى المية من المصريين سعداء!!
- أنهم مصريين دول؟!!

— الى عملوا عليهم الإستطلاع..بس الى مزعلنى إننا أخذنا المركز السادس من خمسة وخمسين دولة عملوا نفس الإستطلاع، المفروض ناخذ الأول، مش كده؟!!

▪ طبعاً، ولو فيه ترتيب قبل الأول يبقى أحسن!!

— بس إيه، عشرة فى المية من السعداء دول يشعروا بسعادة طاغية!!

▪ فى دى ماشي

— ماشى إزاي؟!!

▪ ما هو يا دوب، مش أكثر من عشرة فى المية من الشعب عندهم كل حاجة، وواخدين خير البلد كله، لازم يحسوا بالسعادة الطاغية..طبعاً

— ده بقى على أساس إنك مصدقة الإستطلاع ونتايجه

▪ مش بتقول طول القعدة عالقهوة مابطلتوش ضحكك، يعني سعدا أهو،

الحكومة مش مخلية حاجة تعدى من غير ما تضحكنا، حتى لو مش

لاقين ناكل

— إيه مش لاقين ناكل دى!!إذا كان الإستطلاع بيقول إن إثنين وسبعين

فى المية دخلهم بيكفيهم، وسبعتناشر فى المية بس هم الى صرفوا

مدخراتهم عشان يكفوا مصاريف البيت

▪ زينا!!طب حد من الإثنين وسبعين فى المية دول يفهمنى دخله كفاه

إزاي والنبي..إلا بالمناسبة، دخلهم كام دول؟!!

— الله أعلم..بس أنا عاوز أسألك، لو كانوا عملوا الإستطلاع ده معاكى،

كنتى حتقولى إيه؟

— يمكن تكون حكاية الهجرة دي مالهش علاقة بالإعتزاز.. مش يمكن لو هاجر وأخذ جنسية ثانية، يفضل معتز بمصريته برضه، ومايتنازلش عنها!!

■ آه، ماهي ماتخسرش.. عارف ابن الجيران اللي في أمريكا، ماهو معتز بمصريته ومايتنازلش عنها، بس لما جه مصر دخل بالباسبور الأمريكاني، بيقول المعاملة في المطار بتبقى أحسن بكثير!!

— طب قفلى عالموضوع ده أحسن بيزعل، وإحنا النهارده آخر سعادة

■ تصبح على خير

— سعيدة

■ تاني سعيدة!! إيه الحكاية؟

— أصلى إفتكرت إننا زمان كنا بنسلم على بعض بالكلمة دي، مش عارف ليه بطلنا

■ آه والله عندك حق.. طب فاكّر صاحب السعادة وسعادة البيه.. راحت فين؟

— سعادتك وسعادة البيه وسعادة الوزير.. دي كلها لسه موجوده.. السعادة بقت حكر على الكبار. سعيدة بتاعتنا إحنا هي اللي راحت عليها

■ مش حنام بقى؟ إيه الورق اللي معاك ده كله؟

— صاحبي إداهم لي.. لما قرا عن الإستطلاع خلى إينه دخل على النت وطلع له حاجات كتير عن الموضوع وطبعهم له، ماسكهم وماشى بيهم، أخذته أقرأه.. خلى بالك من الورق أحسن موصيني أرجعهم له

■ والله إنه فاضى !!

— من غلبه .. بصى الحاجات الى معلم عليها، الإستطلاع يقول إن تسعين في المية من المصريين يفضلوا إن الملكية في البلد تبقى للقطاع العام

■ ماتفرقش

— لأ تفرق كثير، مادامت الحكومة بتاعتنا مصدقة إن المصريين سعداء،

تصدق كمان إنهم مش عاوزين يبيعوا القطاع العام .. مش الإستطلاع ده

يمكن نعتبره جزء من الحوار المجتمعى بتاعهم، ولأ هى خيار وفاقوس،

يصدقوا الى عاوزينه، وما يصدقوش الى مش عاجبهم !!

■ بقولك ماتفرقش، هم من الأول مصدقين إننا سعداء، يقولوا معانا

موبايلات وبتفرج عالدش، يبقى مش ناقصنا حاجة .. لازم نبقي سعداء

— سعيدة يا حكومة .. طب شوفى الى فى الورق

■ الساعة بقت إثنين ونص، نام بقى !!

— أنا شارب أربعة قهوة ومصحصح عالاخر، وشايفك برضه إن مش

كابس عليكى النوم

■ الفجر قرب يدن .. إحنا كده مش حنام خالص

— ما إحنا أجازة .. إسمعي بس، الإستطلاع ده عملوه على ثلاث تلاف

واحد، نصهم تقريبا من الطبقة المتوسطة

■ قول لى بس الأول، الإستطلاع ده معمول إمتى؟

— قريب .. تفرق معاكى إيه؟! !!

■ عاوزه أعرف .. أكيد عملوه قبل الأهلى مايتغلب من فريق الشرطة

— ممكن

■ تعرف.. بيتهىالى هم عملوه أول ما مصر أخذت كاس الأمم الأفريقية،
ساعتها كل المصريين كانوا سعدا بجد، كلهم مش تمانين فى المية بس
— كويس إنك فكرتيني عشان أقول لهم على الحكاية دى لما نتقابل بكرة
عالقهوة

■ لسه حتروح بكرة!!
— ما أنا وعدت صاحبى أرجع له الورق.. بصى بقى، دى كلها دراسات
عن السعادة، يمكن نعرف المصريين سعدا على إيه.. فيه دراسة بتقول إن
السعادة وراثية، يعنى كل واحد عنده جينات هى بتخليه سعيد أو
تعييس

■ يبقى المصريين كلهم عندهم جينات السعادة، أكيد الحكومة عارفة
المعلومة دى وعشان كده بتعمل فينا ده كله من غير ما تخاف
— لأ وانتى الصادقة، إحنا جتتنا نحست من كتر اللى إتعمل فينا.. فيه هنا
أكثر من دراسة معمولة فى بريطانيا وأمريكا، دول بقى بيعرفوا يعملوا
دراسات بصحيح، يقولوا إيه، كل اللى عبروا عن عدم سعادتهم كانوا
بيعانوا من البطالة أو مرتباتهم ضعيفة.. ومعظم اللى قالوا إنهم سعدا
كان عندهم حرية إختيار نوع حياتهم، يعنى إختاروا شغلهم وبيوتهم
وصحابهم.. وحتى حكوماتهم

■ واضح إن اللى عملوا الدراسات دى مايعرفوش مصر
— الدراسة دى بقى عجبتنى قوى. بتقول إن أكثر الناس سعادة هم
الفقرا، عشان...

■ إيه!!! يبقى الإستطلاع بتاعنا مضبوط أهو

— إفهمى..الفقير أول ما دخله يزيد ولو بنسبة بسيطة، يحس إن مستواه
إتحسن شوية، ويبقى سعيد قوى قوى أكثر من الغنى لما فلوسه تزيد
■ آاه.. يعنى الفلوس بتجيب السعادة!

— مش بالظبط.. الفلوس بتسعد صحيح بس لما نصرفها..الى عملوا
الدراسات لقوا إن الى بيصرف الفلوس على غيره، وفى الخير، بيبقى
أسعد من الى شايل فلوسه ويصرفها على نفسه

■ ما أكيد لما يوصل إنه يصرف على غيره، يبقى كفى نفسه عالاخر

— يمكن..الى عاجبنى بعد ما قرئت ده كله، إن أتارى السعادة دى سر
كبير قوى

■ تعرف إن النوم سبب مهم جداً للسعادة!!

— إستنى لما نصلى الفجر وبعدين ننام..هو إحنا حتغدى إيه النهاردة؟

■ لما نفطر نبقى نفكر فى الغدا

— أصلى حاسس إن نفسى مفتوحة عالأكل..هى اللحمة بتاعة العيد
خلصت؟

■ مش قلنا يومين بس لحمة، وباقى الأسبوع نريح معدتنا!!

— إحنا ريحنا معدتنا قبل العيد، مش فضلنا أسبوع وأكثر ناكل الوجبة
القومية بتاعة وزارة الصحة، فول وبصارة وكشرى، مالحقتش تتعب

■ إنت حر، لسه عندنا كيلو، عاوز تاكله دلوقتى أو بعدين، زى ما
يعجبك

.. طيار طار طام .. طيار طار طام .. طيار طار طام ..

— ناكله النهاردة خلى سعادتنا تكمل

▪ ماشى .. الحمد لله، الفجر بيدن .. نقوم نصلى وننام

— طب سعيدة

▪ وإنت من أهله

٩ ديسمبر ٢٠٠٨

شكوى فى الحى

القهوة الكبيرة فى المنطقة أصبحت المكان الذى يقضى فيه المدير معظم وقته، يجتمع كل يوم مع سكان الشارع بعد أن تعرضوا لأزمة خطيرة.. ولأول مرة يتفق الجميع على المواجهة..

شكوى رقم ١

السيد المحترم رئيس الحى

بعد التحية،

نتقدم لكم - نحن سكان الحى - بهذه الشكوى حيث فوجئنا ليلة أول أمس أن هناك أعمال هدم تجرى فى فيلا بالشارع رغم مخالفة هذا للقانون. وقد سارعنا فى الصباح بالتوجه للحى وتقابلنا مع المهندس المسئول الذى أخبرنا بأنه سيحضر فى نفس اليوم للمعاينة، ولكن للأسف لم يحضر، وعاد العمال ليلة أمس لاستكمال العمل. ولا ندرى لماذا يقومون بعملية الهدم بعد منتصف الليل ولكننا نعتقد أن هذا يعنى أن صاحب الفيلا يعلم أنه يقوم بأعمال مخالفة..

نرجو من سيادتكم إصدار التعليمات بسرعة المعاينة قبل أن تقع الفاس

فى الراس

شكوى رقم ٢

السيد رئيس الحى

نود أولا أن نشكر سيادتكم لاستجابتكم السريعة. فقد إتصل بنا السيد مدير خدمة المواطنين وأخبرنا باتخاذ اللازم، وبالفعل حضر مهندس الحى وقام بمعاينة العقار محل الشكوى ثم أكد لنا أن كل هذه الأعمال فعلا مخالفة وأنه سيرفع تقريره بوقفها فورا، بل أخبرنا بأنه سيقوم بتقديم بلاغا للنيابة للتأكد من تنفيذ القرار.. والحق يقال، فقد توقفت عملية الهدم فعلا ولكن لمدة يومين فقط، حيث فوجئنا فى منتصف الليلة الثالثة بعودة العمل، فاتصلنا بشرطة النجدة التى أرسلت مشكورة أحد الضباط لكنه لم يستطع فعل شيء لأننا لا نملك أوراقا تؤكد ما نقول.. وعندما تضررنا من الإزعاج الذى تسببه الأعمال فى الليل طلب من العمال إيقاف العمل حتى الصباح فاستجابوا له لكنهم عادوا لمواصلة العمل بعد نصف ساعة.. وقد فوجئنا فى الصباح بأن الفيلا أصبحت على الأرض وأن مخلفات الهدم تسد الشارع..

نرجو من سيادتكم سرعة اتخاذ اللازم قبل فوات الأوان

شكوى رقم ٣

نشكر سيادتكم مرة ثانية على سرعة الاستجابة، حيث حضر المقاتل وقام بإزالة المخلفات. ولكننا علمنا أنه حصل على تقرير جديد يفيد بأن ما يقوم به غير مخالف للقانون، وأن هذه الفيلا لم تكن فيلا وإنما مبنى صغير

لا ينطبق عليه قرار رئيس مجلس الوزراء الخاص بحظر هدم الفيلات والقصور. وقد علمنا أيضا أن هذا المقاول اشترى الفيلا وقام بهدمها لبنى مكانها برجاً سكنياً، مما سيتسبب في مشاكل بالمنطقة ويزيد الشارع ازدحاماً، رغم أن القانون مئة وستة لسنة ستة وسبعين يمنع بناء أى عقارات يزيد إرتفاعها مرة ونصف على عرض الشارع..

لذا نهيب بسيادتكم سرعة التدخل لمنع هذا التعدى على القانون

شكوى رقم ٤

فوجئنا - نحن سكان الشارع - ببدء أعمال الحفر فى قطعة الأرض.. وقد أخبرنا المقاول بأنه مسنود وتحدى أن نستطيع إيقاف العمل.. وقد علمنا بأنه معروف بحوث المنطقة، حيث اعتاد شراء الفيلات والمباني القديمة والتفاهم مع السكان بالحسنى وبالعافية، ثم يقوم بهدمها وبناء أبراج مكانها، مما تسبب فى تكديس عدة شوارع بالحصى. ولكننا هذه المرة قررنا التصدى له لمنع هذا التعدى علينا وعلى القانون.. وهذا بالطبع لن يتم إلا بمساعدة سيادتكم، حيث أدت أعمال الحفر التى يقوم بها إلى تشقق أحد العقارات المجاورة له لأنه لم يلتزم بالمسافة المقررة قانوناً بين المباني. وقد حضر مهندس الحصى وقرر إخلاء هذا العقار حتى يتم ترميمه حفاظاً على أرواح السكان، وهم الآن فى الشارع وما زالت أعمال هذا الحوت مستمرة

برجاء عمل اللازم قبل ما نروح فى الرجلين

شكاوى رقم ٥

نحيط سيادتكم علما بأن أعمال البناء المخالفة التى يقوم بها حوت المنطقة المسنود تجرى على قدم وساق، وقد تم حتى الآن بناء عشرة أدوار، ويجرى حاليا صب سقف الدور الحادى عشر. وقد ضرب هذا المقاول رقما قياسيا يستحق عليه الدخول إلى موسوعة "جينيس" للأرقام القياسية فى سرعة الهدم والبناء.. وقد أخبرنا أحد جيراننا بأن هذا الحوت يدفع مبالغ كبيرة لمسؤولين فى الحى حتى يتغاضوا عن أعماله المخالفة، ولكننا نرفض تصديق ذلك لكى لا نظلم أحدا دون دليل، رغم أن مسؤولين كبار فى البلد اختلفوا فيما بينهم حول هل وصل الفساد فى المحليات إلى الرقبة أم أنه مازال واقفا عند الركب.. ونلفت انتباه سيادتكم أن البرج قد تجاوز بالفعل الارتفاع المسموح به ورغم ذلك مازالت أعمال البناء مستمرة

ملحوظة: مرفق لسيادتكم صورة حديثة من الموقع وذلك بناء على طلب السيد مهندس الحى

شكاوى رقم ٦

نحن سكان الشارع نتعرض لتهديد مستمر من المقاول الحوت الذى قال لنا أنه تضرر من الشكاوى التى نقدمها لسيادتكم وكذلك من ظهورنا فى برنامجى "العاشرة مساء" و "تسعين دقيقة".. وقد أخبرنا المقاول أيضا أن سيادتكم زعلان من هذا الظهور فى الفضائيات وتعتبر أننا أسأنا لكم

شخصيا.. ونحن إذ نعتذر لسيادتكم ونؤكد أننا لم نقصد أبدا أية إساءة، ولكننا لم نكن ندرى ماذا نفعل ولمن نلجأ وسعدنا فعلا بمشاركتكم في البرنامج بمداخلة تليفونية تعهدت خلالها بحل المشكلة سريعا، ولكن لم يحضر أى مسئول من الحى حتى الآن، وما زال العمل مستمرا، وقد هددنا المقاول بأنه سيحصل على قرارات من الحى بإزالة بيوتنا بحجة أنها آيلة للسقوط إذا لم نوقف مطالبنا.. ولكننا على ثقة كبيرة بعدالة سيادتكم وبحرصكم على الحق وتنفيذ القانون

ونلفت انتباه سيادتكم أن أعمال البناء فى البرج قد إنتهت بالفعل بعد بناء الدور الرابع عشر وتجرى حاليا أعمال التشطيبات الخارجية

شكوى رقم ٧

نحيط سيادتكم علما بأن المقاول الحوت سيقوم ببيع جميع المحال أسفل البرج وهذا ما يؤكد عدم تخصيص مساحة كجراج للعقار، وهذه مخالفة أخرى للقانون، وقد واجهنا المقاول وأخبرناه أن هذا سيزيد الزحام وتكدس السيارات فى المنطقة، ولكنه رد علينا قائلا: "وهى جت على دى".
نتوسل لسيادتكم سرعة التدخل قبل أن ينتهى من بيع المحلات وتزيد المشكلة صعوبة

استغاثت

لكل من يهمة الأمر

نستغيث بسيادتكم - نحن سكان الشارع - لإيقاف أعمال الهدم الجارية للبرج السكني الذي أقيم مكان الفيلا بمعرفة المقاول حوت المنطقة.. فقد فوجئنا بعد ظهورنا في برنامج "البيت بيتك" بأن المحافظة قد قامت بإرسال قوة لهدم العقار.. وبقدر سعادتنا في البداية بنجاح جهودنا بعد رحلة طويلة، بقدر حزننا الآن بعد أن علمنا أن المقاول قد باع شقق العقار لأكثر من خمسين أسرة دفعوا تحويشة عمرهم ثمننا لشقة تسترهم وتحمي أبنائهم.. ولم يخبرهم أحد بأن هذا العقار يخالف رغم أنهم توجهوا للحى وقاموا بتوصيل الكهرباء والمياه والتليفونات، وحصلوا على كل الموافقات اللازمة، ودفعوا الرسوم المقررة، ولم يخبرهم ولا مسئول واحد يوحد الله بالمشاكل والمخالفات التى إرتكبها هذا المقاول.

لقد تقابلنا مع هؤلاء الضحايا أمام البرج، ونحن مقتنعون أنهم تعرضوا لعملية خداع وتم التغرير بهم سواء من المقاول أو من المقصرين فى الحى، وليس لهم ذنب ولن يعرضهم أحد عن ضياع أموالهم وممتلكاتهم، ونحن - سكان الشارع - لا نريد أن نشارك فى هذه الجريمة ونستغيث بأى صاحب ضمير أن يوقف الهدم

لقد كان هدفنا هو وقف المخالفات من البداية ومادام لم يحدث، ومادامنا قد وصلنا لهذا الحال، فخلاص

كفاية.. حرام..

١١ نوفمبر ٢٠٠

المؤلفة في سطور



- حاصلة على بكالوريوس إعلام قسم الصحافة والنشر من كلية الإعلام جامعة القاهرة عام ١٩٧٨
- تعمل في "مجلة صباح الخير" منذ عام ١٩٧٦
- عملت في مجلة "سيدتي" لمدة ست سنوات
- حررت صفحة "حسبك في الدنيا" في جريدة "العائلة"
- رئيس تحرير برنامج "إقلب الصفحة" قناة "إم بي سي"
- رئيس تحرير برنامج "اليوم السابع" قناة "إم بي سي"

الفهرس

الموضوع	الصفحة
التقديم	٧
المقدمة	١١
١ الميكروباص	١٥
٢ بطاقة التمويل	٢١
٣ الثانوية العام	٢٩
٤ إمتحانات السنة الجاية	٣٥
٥ إبنى أستاذ فى الجامعة	٤١
٦ تشتري وظيفة ؟!	٤٩
٧ مدرس بالحصه	٥٧
٨ سوق السيارات	٦٥
٩ طيار طار حلمه	٧١
١٠ ناكل إيه النهاردة ؟!	٧٩
١١ القمح أمن قومى .. طب والفراولة ؟!	٨٥
١٢ إنت مصرى ؟!	٩٣
١٣ الشارع لمن ؟!	١٠١
١٤ اللجنة	١٠٩
١٥ الغسالة الى حيلتى .. باللاظت	١١٥

طيار طار حلمه

من يوميات مدير

منذ حوالي سنتين بدأت ناهد تكتب أسبوعيًا في مجلة صباح الخير سلسلة من الحوارات تحت اسم يوميات مدير. تتخيل ناهد أسرة مكونة من أب موظف علي درجة مدير إدارة وأم موظفة حكومة أيضًا. وابنة وابن في التعليم. وكل أسبوع يمر علي الأسرة موقف معبر عما يحدث في الأسر المصرية. تناقش ناهد الموقف عن طريق حوارات بين أفراد الأسرة.

تضع ناهد علي لسان كل شخصية مجموعة من المعلومات والآراء. تستخدم لغة عامية قريبة من الفصحى تجعل القارئ يشعر بصدق الحوار ويتفاعل معه.

نتيجة سلسلة الحوارات وعمقها اقترحنا نحن زملائها أن نحولها إلي مسلسل تليفزيوني أو علي أقل تقدير تجمعها في كتاب.

لم تناقش ناهد فكرة التليفزيون معنا واكتفت بابتسامة غامضة. لكنها بدت مستعدة لوضع فكرة الكتاب موضع التنفيذ.

نصحناها أن تختار الموضوعات التي لا علاقة لها بالأحداث الجارية حتي لا تحتفظ في الكتاب بموضوع قديم.

المفاجأة أننا اكتشفنا أن أغلب الموضوعات صالحة. المشاكل لا تخل ولا

تنتهي. يقول المدير ردًا علي دهشة زوجته من تكرار المشاكل كل عام في

نفس الموعد ونفس الطريقة (مستغربة ليه. قولي لي عن أزمة حصلت

قبل كده والحكومة بتاعتنا عرفت تواجهها ببساطة..

بتتحرك بترتيب.. الأول الأزمة تحصل. وبعدين تتفاقم. ساء

تصريحات. وبعدين تتحرك. وجهودها تتعثر وتفشل.. خطوط

تخلص لوحدها.. وأنا وإنيت أهو. السنة الجاية حيحصل نفس

Bibliotheca Alexandrina



0807549

Y BOOKSHOP

مكتبة مدبولي

SQ. Tel:25756421

٦ ميدان طلعت حرب- القاهرة - ت : ٢٥٧٥٦٤٢١

boulybooks.com - info@madboulybooks.com